





g. h. 124



BENEDICTVS XIII
PONTIFEX

*Creatus die XXIX.
Obijt XXI Feb.*

Arnoldus Van Wyckhout Sculp.

VR SINVS ROMANVS
MAXIMVS

*Maij MDCCXXIV.
MDCCXXX.*

BENEDICTI XIII.

ROMANI PONTIFICIS

Ex Ordine Prædicatorum

84.129

VITA

COMMENTARIO EXCEPTA

ET

BENEDICTO XIV.

DICATA

AB

ALEXANDRO BORGIA

Archiepiscopo & Principe Firmano.



ROMÆ MDCCXLI.

Typis & sumptibus Bernabò, & Lazzarini ad Fontem Trivii.

SUPERIORVM PERMISSV.

THE [illegible] [illegible]

[illegible]

[illegible]

[illegible]

[illegible]

[illegible]

[illegible]

[illegible]

BEATISSIMO PATRI AC DOMINO NOSTRO
BENEDICTO XIV.

ALEXANDER BORGIA
 ARCHIEPISCOPUS FIRMANUS
FELICITATEM.



ITAM BENEDICTI XIII.
*Prædecessoris tui, quam
 ego sub finem peregrinationis ejus brevi
 Commentario excepi, Tibi, sapientissime*
 a 2 at-

*atque optime Pontifex, nuper ad istam
Dignitatem divinitus elato, gratulationis
loco sisto, ut nominis tui auctoritate at-
que praesidio munita in lucem hominum
prodeat. Magna ac humanum modum
supergressa virtus illius facile vicisse vide-
tur vulgi obrectationem atque invidiam,
nec mihi, cum Pontificis defuncti vitam
edam, verendum est, ne in suspicionem
adducar, quasi haec scripserim non veri-
tatis ac virtutis amore, sed alio fine vel
spe ductus. Cum enim Sanctissimi illius
Pontificis vita palam & in oculis om-
nium fuerit, & quidem aetate nostra, fe-
rè tot habeo veritatis testes, quot homines;
praeterea nihil mihi ex laudibus Defuncti
sperandum est praeter conscientiam rectè
facti.*

Atta-

Attamen nominis tui præsidium implorare consultum duxi ad ornandam potius, quàm defendendam Pontificis memoriam, & ad me excusandum, si quid ausus sum, quod ingenii mei vires excedat. Et ad ornandam quidem defuncti Pontificis memoriam; quamquàm enim plurimæ sint laudes ejus, & magna de republica Christiana merita, in hoc tamen maximè ille meruisse videtur, quod debitum jampridem integritati, ac sapientiæ tuæ in Cardinalium Sanctæ Romanæ Ecclesiæ Collegio locum tribuerit Tibi, atque ita effecerit, prospexeritque, ut Tu aliquando fores, quod modò es. Sciebat ille ex Apostolo, plures factos esse Pontifices idcirco quod morte prohiberentur permanere; quamobrem ut respublica Christiana levius ferret

*ret desiderium sui, ferè biennio antequam ex hac vita migraret, Te, quem semper maximi fecerat, quemque Fidei Promotorem, & Sacri Concilii Tridentini interpretem libenter consueverat audire, miratus ingenium eloquentiamque tuam, Cardinalem nuncupavit, cā sibi a Deo Optimo Maximo inditā mente & consilio, ut aliquando foret, qui Benedictum restitueret, qui ardens illud amplificandi divini cultus studium, quo Benedictus XIII. semper flagavit, qui perpetuum illius verumque laborem in procuranda Christifidelium salute non solum alacriter susciperet, sed etiam ingenii simul, & corporis viribus diū sustineret, qui è Christiana republica calamitates averteret, qui mores compo-
neret, humanumque genus beneficiis omni-
bus*

bus demereretur, non quodd Clemens XII. immediatus Prædecessor tuus ulla in re officio suo defuerit, laboravit enim pro republica quantum novit ac potuit, sed quod corporis ægritudine, ac temporum acerbitate adversantibus satis consulere nequiverit omnibus.

Videmus præclara Pontificatus tui initia, ex quibus non modò spem, ac votum felicitas publica, sed ipsius voti fiduciam ac robur accepit: & quamquàm non deceat Te, sapientissime Pontifex, arbitrio popularis auræ, aut ullâ humanâ ratione duci; omnia enim infra magnitudinem animi ac majestatis tue jacent, nihilominus liceat mihi pro officio, quo in hac Provincia fungor, Tibi significare, tantam de electione tua in Romanum Pontificem

ficem ab omni hominum genere, atque ordine apud nos conceptam esse letitiam, quantam nunquam credo fuisse, aut fore; cum enim Te quinque & amplius annis in Anconitana Cathedra Picenum tenuerit, recens adhuc salubris regiminis tui memoria, ac beneficiorum recordatio undique prædicantium vocibus, ac editis publicæ exultationis signis non solum hic, & Anconæ, sed ferè in singulis civitatibus, atque oppidis statim personare cœpit, erectis omnium animis in spem diurnæ felicitatis, qui cum non pauci aut multi sint, sed planè omnes & hic, & ubique, falli eos posse quis unquam existimet?

Siquidem licet cum fortuna quandoque commutentur ingenia eorum, qui in colenda virtute non satis sibi constant, in

Te

Te tamen, qui sicut dignitate, ita etiam sapientiâ cæteris mortalibus præstas, non cadit hujus inconstantiae suspicio: tua est bene agendi, ac de omnibus benemerendi perpetua voluntas: nihil hætenus in vita tua varium, nihil mutabile, nihil ad instabilis fortunæ modum compositum vidimus, sed omnia, quæ constantem, sapientem, ac doctissimum Virum decent. Itaque talis in suprema Beatissimi Petri Cathedra eris, qualis in Anconitana primùm, ac deinde in Bononiensi fuisti, nisi quod modò tanto ampliora facies, quantò major Tibi faciendi contigit facultas. Quod si hætenus proferens de thesauris sapientiæ tuæ nova & vetera, lucubrationibus plurimis Clerum & Populum Tibi commissum egregiè instituisti, & ad purioris discipli-

nae traduxisti rationem, quid non praestabis modo, cum non unius Dioecesis, aut Provinciae, sed universae Christianae reipublicae suprema cura & moderatio Tibi incumbat? Et quidem divino consilio actum est, quod sicut Benedictus XIII. post minorum Ecclesiarum regimina ad primam universae Ecclesiae Sedem fuit evectus, ita etiam Tibi, BEATISSIME PATER, evenisse videamus, ut non solum virtute ac nomine, sed etiam ipsis honorum gradibus nobis Benedictum XIII. repraesentares. Quare non immerito puto Benedicti XIII. Vitam ex nomine tuo maxime ornandam fore, cum ex Te laudum cumulus illi accedat, ad quem referri oportet quidquid Episcopus, quidquid Cardinalis fecisti, quidque modo Romanus Pontifex aut facere

*cere cœpisti, aut facies. Ille etenim Te
& Episcopum decrevit & Cardinalem,
effecitque ut aliquando Romanus Pontifex
facile fores.*

*Quod autem ad alterum caput perti-
net excusationis meæ, paucis dicam. Olim
Tu de me ingenioque meo longè supra
meritum meum honorificè sentiens, mihi
peramanter commendasti, ut, quæ in Ope-
re Alphonfi Ciacconii desunt, Romanorum
Pontificum & Cardinalium vitas scribe-
rem, quod ego aggressus sum, & scripsi
aliquas: at deindè præoccupatam hanc
provinciam intelligens ab aliis, Romæ de-
gentibus, ac minimè impeditis, quos pu-
tabam opus citiùs absoluturos, quàm a me
in hoc laborum plenissimo Archiepiscopatu,
& ab Urbe recessu fieri posset, datis qui-*
b 2 bus

busdam, quas absolveram, Operi inferendis, a cæteris abstinui, sed hanc Benedicti XIII. Vitam mihi servavi, ad quam diligentius incumberem. Itaque ut videas me Tibi, quantum è re fuit, obsecutum fuisse, accipe, BEATISSIME PATER, scriptiorem hanc, qua si quid minus affecutus sum judicium de me tuum, veniam mihi dabis: si quid rectè scriptum esse cognoveris, non meum scias esse, sed tuum, cum Tu me ad hanc scriptionem impuleris.

Cæterum Deum rogo, ut qui Tibi dedit egregiè velle ac incipere, idem Tibi perficere tribuat, quiete temporum ac vitæ diuturnitate concessâ, ex qua salus publica magnoperè pendet; vitio enim infirmitatis humanæ tardiora sunt remedia,
quàm

quàm mala, & sapientis quoque viri confilia quandoque cunctatione indigent ac die. Propterea summis votis omnes a Deo petimus, ut postquam Ecclesie luctum ac viduitatem longius productam, quàm è recentioribus sæculis memoria supersit, electionis tuæ mercede & gaudio pensavit, hæc nobis dona diutissimè servet, addito Tibi inaudito a sæculis annorum numero, cum quo ità publica felicitas conjungitur, ut vix arctius quidquam conjungi posse videatur. Firmi Kalendis Septembris MDCCXL.

IMPRIMATUR,

Si videbitur Reverendissimo Patri Sacri Apostolici Palatii Magistro.

Phil. Archiepiscopus Theodosiæ Vicesgerens.

APPROBATIONES.

I.

QUAS jam pridem ex publica fama tacitè demirabar omnes virtutum species in Eminentissimo Domino Cardinali Ursino, & postea in maxima luce collocatas, oculis meis perspexi per aliquot annos, quibus hic commoratus fui in sanctæ & recolendæ memoriæ Benedicto XIII. accuratè, & juxtà temporum seriem descriptas jucundissimè perlegi in brevi istius Sanctissimi Pontificis vitæ historia ab Illustrissimo & Reverendissimo D. Archiepiscopo Firmano nitidè & eleganter elaboratâ. Quare ut demandatâ mihi provinciæ de isto opere meum qualecumque sit judicium proferendi, faciam satis, illud dignum judico, quod in lucem prodeat, cum ad nutriendam, & augendam in dies magis in omni fidelium genere pietatem, & ad zelum Domûs Dei ardentius accendendum in veris Ecclesiasticis, tum ut clarè pateat omnibus etiam in istis postremis & senescentibus sæculis non deesse Ecclesiæ Dei, & præsertim præexcelsæ Petri Cathedræ Ministros & Pontifices Summos, qui priorem Ecclesiæ ætatem referant, & Apostolorum premant vestigia. Romæ die XIII. Maji MDCCXLI.

Josephus Episcopus Cavallicen.

BENE-

II.

BENEDICTI XIII. Pontificis Optimi Maximi Ordinis Prædicatorum Vitæ Commentarium ab Illustrissimo, & Reverendissimo Alexandro Borgia Archiepiscopo, & Principe Firmano eruditè scriptum libenter vidi, expendique: Quippe quambrevissimè plura complectitur, quibus ætas postera admirabitur, universusque Sacerdotum ordo exindè habet quod imitetur. Ardens Divini cultus amplificandi studium, & pro tuenda Ecclesiastica libertate zelus constans, quo in terris agens, quæ Episcopus, quæ Cardinalis, quæ tandem Summus Pontifex flagrabat, in eo præsertim elucet: qua de re, si ei, cujus mandatis obsequor, ita videbitur opus publicis typis cudi, publicæque luce donari posse censeo. Romæ in pervigilio Pentecostes decimo tertio Kal. Junias MDCCXLI.

*Jobannes Andreas Tria Episcopus Larinatum Sanctæ
Universalis Inquisitionis de Urbe Consultor.*

IMPRIMATUR.

Fr. Aloysius Nicolaus Ridolfi Ordinis Prædicatorum
Sacri Palatii Apostolici Magister.

BE-



BENEDICTI XIII. ROMANI PONTIFICIS V I T A



BENEDICTUS XIII. antequàm
ad Romani Pontificatus fa-
stigium eveheretur, Frater
Vincentius Maria Urfinus
appellabatur. Is Patritius
Neapolitanus ac Venetus,
sed genere Romanus, ubi
Urfinam Gentem, summo quidem loco sem-
per habitam, alii sanctitate præstantes Viri,
& Romanæ Ecclesiæ Cardinales, atque etiam
Pontifices Maximi, multæque Regiæ Cognat-
iones, excelsique honorum gradus, amplif-
simæque Ditiones illustrarunt, Ferdinando
A Gra-

Benedicti genus,
ortus 1649. edu-
catio.

Gravinatum Duce , & Joanna Frangipane Tolphia postremo germine hujus præclarissimæ stirpis , quæ eadem cum Anicia censetur , Parentibus natus est Gravinæ iv. Nonas Februarii anno MDCXLIX. Petri Francisci nomen sortitus . Adolescens humanioribus literis , Philosophiæ , ac utrique Juri in Patria operam navavit , optimis Præceptoribus in disciplinam traditus ; utrumque enim illi contigit , benè institui ac feliciter nasci . Adeò verò in literis profecit , ut Epigrammatum libellum tenerâ adhuc ætate in lucem ediderit : Epigrammatum autem argumenta omnia sacra , nihil prophanum . Ferdinando patre defuncto , Petrus Franciscus posthabito Familiæ Principatu, sibi uti Primogenito debito , divino afflante spiritu , specie quadam ac obtentu lustrandi Italiam, Venetias se contulit, ibique Prædicatorum Ordini in S. Dominici Coenobio nomen dedit , Vincentius Maria appellatus , cessitque Dominico fratri secundo loco nato avitas opes , amplasque Ditiones majori abrenunciandi studio , quàm alii acquirendi cupidine hæc maxima fortunæ bona prosequantur .

Principatui Familie præfert Iredinem Prædicatorum Fr. Vincentius Maria appellatus .

II. At hujus rei nuntius adeo Matrem , & Consanguineos perculit, ut non solum apud Præ-

Præfules Ordinis Prædicatorum , sed etiam apud Clementem IX. tunc Romanum Pontificem eorum querelæ invaluerint . Dicebant , Petrum Franciscum juvenili potiùs fervore , quàm maturo consilio , divinaque vocatione sacrae Religionis Claustra ingressum . Rem , ex qua nobilissimæ Familiæ spes pendebat (parabantur enim illi splendidissimæ nuptiæ) non inconsultâ , inauditâque Matre , & Consanguineis transigi oportere . Clemens Adolescentis animum exploraturus , jussit illi , ut Romam veniret . Ubi Frater Vincentius Maria coram Pontifice fuit , ita vehementer causam oravit vocationis suæ , ut Clemens , nonnisi divinâ voluntate id factum esse , intellexerit . Non solum itaque querelas Matris , & Consanguineorum compressit , consiliumque Adolescentis laudavit , verùm etiam probationis annum , sacris legibus indictum iis , qui Religionem professuri sunt , ad sex menses contraxit , adeò pro certo habuit , Fratrem Vincentium Mariam divino Numine è sæculo ad Ecclesiam traductum , præmatura virtute excellere , & majora quæque portendere . Ille lætus & alacer , quasi de sæculo victoriâ adeptâ , regressus ad suos , virtutum omnium splendore inter Tyrones enitere , infimo loco esse , vilissima

Clement IX. consilium probat re-
jellis querelis
Consanguineo-
rum .

Solemnis professio
 1668. & reli-
 qua ejus in Clau-
 stris.

quæque officia sibi deposcere, nunquam de genere & Patria quidquam locutus. XIII. Februarii anno MDCLXVIII. solemnibus Religionis votis se obstrinxit; mox in Philosophiæ ac Theologiæ curriculo Theses Neapoli, Bononiæ, ac Venetiis propugnavit magna cum laude ingenii sui: coeperat enim virtus animum, mentemque illius insidere ante diem. Indè, sacris initiatus, Brixie Philosophiam docuit: ibi Antonium Cardinalem Barberinum, Ordinis Prædicatorum Protectorem defunctum, funebri Oratione, quæ typis mandata fuit, disertè laudavit, & Apologeticam Epistolam pro regulari Habitu a Regularibus Episcopis deferendo in Josephum Ciantes ex Ordine Prædicatorum Marforum Episcopum, qui adversam sententiam tuebatur, edidit. Ut sacrarum literarum studiis prolixius vacaret, incœnatum dormire, & post nocturnam Psalmodiam somnum non repetere, mos illi fuit. Contracto itaque cibo ac somno, a vino quoque abstinuit, ut animam suam transferret ad sapientiam. Vigesimo secundo ætatis anno vix expleto a Palutio Cardinali de Alteriis ex Apostolica dispensatione Presbyter ordinatus, amantissimam Parentem consolaturus, Gravinam accessit; ibique, cum ad Aram

Aram faceret, eâ casulâ usus est, quam dum Mater prægnans Phrigio opere in Gynæceo cum Ancillis suis pingebat, a Religioso Viro Ordinis Prædicatorum intellexit, a Puero, quem gestabat in utero, futuro Divi Dominici Alumno, primò deferendam fore.

III. Indè cum Bononiæ moraretur, proximo tunc sacratissimæ Quadragesimæ tempore Conciones in ea Diœcesi habiturus, Clemens X. xxii. Februarii anno MDCLXXII. ne tanta virtus, cujus pleni, ac uberes supra ætatem fructus undique apparebant, inornata jaceret, quasi prænosceret Fratrem Vincentium Mariam Ursinum, tunc vigesimum tertium annum agentem, futurum aliquandò Apostolicæ Sedis decus atque præsidium, Presbyterum Cardinalem renunciavit. At ille, qui delitescere magis, quàm apparere cupiebat, ubi Cardinalatus honorem sibi delatum esse intellexit, averfari, refugere, obsecrare, & deprecari a se eminentissimam dignitatem. Longa cum illius modestiâ pugna fuit; nec sanè acquievisset, nisi Clemens datis Kal. Martii Literis Apostolicis in forma Brevis, misso etiam Generali Ordinis Prædicatorum Magistro de Roccabertis interposito præcepto ex religione sacramenti coegisset, ne

Clemens X. invitum cogit Cardinalatus honorem accipere
1672.

ne promotioni suæ diutius obsisteret. Itaque Romam profectus, Titulo S. Sixti ornatus, novum Romanæ Aulæ invexit exemplum; pristina enim vivendi consuetudine nihil admodum immutata, ea animi moderatione, cultûs modestia, victûs parsimonia, eo religionis ardore, ea vigilandi ac precandi assiduitate, & in Ecclesia Dei strenuè laborandi studio vitam instituit, ut Dignitatis suæ splendorem fide tantum, ac operibus quæreret.

IV. Sacræ Congregationi Cardinalium Concilii Tridentini Interpretum Præfectus, aliisque Cardinalium Congregationibus annumeratus, quantum doctrinâ valeret luculenter ostendit: sed cùm ille Animarum salutî sese propiùs impendere vehementer cuperet, amplissimâ Præfecturâ, quam Romæ præcipui inter Cardinales optare solent, ultrò dimissâ, Archiepiscopatum Sipontinum ad oram Adriaci Maris longè ab Urbe dissitum, a Barbaris direptum, cœlo insalubrem, pensionibus prægravatum, quem Benedictus Cappelletus spontè cesserat, die xxviii. Januarii MDCLXXV. a Clemente X. accepit, prætulitque Archiepiscopatui Salernitano multis nominibus, ac divite censu percelebri, qui eidem a Carolo II. Hispaniarum & utriusque Si-

Archiepiscopus
Sipontinus re-
nunciatur 1675.
Ejus gesta Si-
ponti.

Siciliæ Rege offerebatur. A Palutio Cardinali de Alteriis Archiepiscopo Ravennate, Viterbiensi, & Imolenfi Episcopis cooperantibus, III. Februarii eodem anno in Templo SS. Dominici, & Sixti consecratus, sublato a Clemente ætatis defectu (non enim ipsi XXVII. annum vix ingresso Pontificalis consecrationis munus recipere per ætatem licebat) Sipontum proficiscitur, indè Gravinam, ubi Fratri Jacobo Mariæ Conilio Veneto Ordinis Prædicatorum, a quo Priore Venetiis religiosum habitum acceperat, vices magnificè reddidit, illum enim ex Apostolico mandato in Episcopum Zacynthi, & Cephallenia ordinavit. At Siponti primùm summa illa Pastoralis vigilantia illuxit, qua deindè Dioeceses alias ac universam Ecclesiam Cardinalis Urfinus erat illustraturus. Annuo censu reparationi Metropolitane Ecclesiæ consuluit. Seminarium Clericorum, postrema Turcarum invasione, sublato, restituit, in quo viginti quatuor Alumni numerati sunt. Xenodochium etiam pro Infirmis & Peregrinis, Mons Pietatis, & alius frumentarius ad Cardinalem Urfinum Archiepiscopum referunt initium. Synodum Dioecesanam anno MDCLXXVIII. coegit, cuius decreta uno volumine, altero Appendicem

cem complexus est, utrumque verò typis edidit: sed & nova editione in memoriam, ac usum hominum revocavit Statuta Provincialis Concilii Sipontini sub Ptolomæo Galio Cardinali & Archiepiscopo habiti anno MDLXVII., quæ oblivionis caligine obruta jacebant.

Transferretur Cæ-
senam 1680. In-
dò Beneventum
1686.

V. Verumtamen anno MDCLXXX. XII. Januarii ab Innocentio XI. ad Cæsenatensem Ecclesiam translatus, dum ibi Cleri mores emendare, multis propositis Edictis christianam disciplinam tueri, sacris missionibus Populum excolere, Cathedralem Ecclesiam instaurare, aliaque pietatis officia exhibere satageret, coepit adversa valetudine laborare, quòd ipse abstemius Cæsenatenses aquas graves admodum & insalubres ferre non posset. Quare Neapolim valetudinis causâ se contulit, divinoque consilio factum est, quod Metropolitana Ecclesiæ Beneventanæ, ex obitu Hieronymi Cardinalis Gastaldi tunc vacanti, ab eodem Innocentio XI. XVIII. Martii MDCLXXXVI. præficeretur, ut Pastoralis ejus sollicitudo pateret latiùs, & amplior Dominici gregis portio tanti Pastoris munere frueretur. Pacificam Epistolam ad Clerum & Populum sibi concreditum Neapoli xxx. Martii dedit, ubi Archie-

chiepiscopali Pallio in Templo Divi Philippi Nerii Congregationis Oratorii xxvi. Maji recepto ad novæ sponsæ amplexus Beneventum properavit, instituto ibi xxx. ejusdem mensis solemnî ingressu magno Exterorum accursu, plausu, ac lætitiâ.

VI. Primas inter curas Metropolitanî Templi, Ecclesiæ S. Bartholomæi, Sacri Seminarii, fatiscentis Archiepiscopii, Domorumque campestrium instauratio, quibus reparandis triginta aureorum millia biennio impendit. Kalendis Junii MDCLXXXVI. Sabbato, de laudibus Deiparæ sermonem ad Populum habere cœpit, quem morem servavit semper, quoties ipse in Civitate præsens fuit, ferè bis millies dixit Sanctissimæ Virginis laudes & vitam per singula profecutus, sed centum tantum ex his sermonibus pietate plenis & sacra eruditione refertis typis vulgavit. Perpetuum tamen hoc obsequii genus in Deiparam esse voluit statuta dote, ut unus ex Ordine suo Prædicatorum in Metropolitana Basilica illud per singula Sabbata præstet. Decima quinta ejusdem mensis Junii Diœcesis visitationem aggressus fuit, eique eâ methodo operam dedit, ut bienniis singulis universam Diœcesim lustraverit tanto Divini cultus incremento, ut

Gesta Beneventi.

B bre-

brevi in ea Archidioecesi (quæ olim diù caruerat proprii Pastoris præsentia) facies alia fuerit rerum sacrarum . Die XXIV. Augusti ejusdem anni primam Diocesanam Synodum coegit , & mox alteram XXV. Octobris , quam peculiari ritu Litaniarum vocant , servavitque hunc morem quotannis : propterea cum Cardinalis Ursinus triginta octo annis , antequam supremam Beati Petri Cathedram conscenderet , huic Ecclesiæ præfuerit , totidem etiam celebravit Synodos ; si tamen addamus Synodos diocesanas , quas post adeptum Pontificatum Romanum celebravit , earum numerus ad XLIV. excurrit præter illas in Litanis . Nullus ex tot Synodalibus conventibus optimis sanctionibus caruit ad retinendam , servandamque Ecclesiasticam disciplinam , quarum Synodorum Constitutiones sigillatim prius editas , deinde in egregium & grande volumen collegit , quod *Synodicon Diæcesanum S. Beneventanæ Ecclesiæ* inscripsit , continens XXXVIII. Synodos ante Pontificatum Romanum ; illudque ex Typographia Archiepiscopali vulgari jussit anno MDCCXXIII. Divi Philippi Nerii Patrocinium in Clerum ad universam Civitatem ampliavit , curavitque Clerum suum in Urbe & in Diocesi excolere , institutis
in

in singulas hebdomadas collationibus de sacris ritibus, ac de regulis morum.

VII. At dum hæc Pastoralis regiminis initia felicibus successibus, ac uberi fructu procederent, quinta Junii anno MDCLXXXVIII. Sabbato sacratissimæ Pentecostes repentè Terra tremuit, cujus vehementes motus universam Civitatem quassarunt. In ipsa Metropolitana Ecclesia transversa Crux cum Odeo, Pastophoriis, & novo Secretario everfa; quinque ejusdem Naves concussæ, & ipsæ itidem corruissent, nisi novi laterales parietes illas sustentassent. Archiepiscopium, unâ aulâ maximâ exceptâ, totum corrui, & ipse Cardinalis Archiepiscopus, qui tunc in sacram Basilicam descendere, ac Vespertinis horis operam dare meditabatur, à summis ædibus ruinis murorum & laquearium involutus cecidit, sed Divi Philippi Nerii imaginibus, quæ in armario erant, obtectus, insigni planè miraculo servatus fuit. Cætera quoque Civitatis Tempia prostrata fuerunt, itaut nulla sacra Ædes superesset, in qua Missæ sacrificium offerri Deo posset. Duo & amplius hominum millia in Civitate ac Diœcesi inter ruinas perierunt. Stetit tamen infractus Cardinalis Archiepiscopi animus, qui quamvis oculis læsus, nihil

Ingens Beneventi ex Terræmotu clades 1688. Archiepiscopus mortuus occurrit.

de pastoralis sollicitudine remittens primò Virginibus Sanctimonialibus consuluit, easque ad Montis Herculis oppidum suæ Diœcesis, ac indè Neapolim transtulit, distribuitque plura per Asceteria. Animum tunc adjecit reparandis Templis, Archiepiscopo & Cœnobiis; & brevi adeo restituit rem, ut absque ulla cunctatione, postquam interfuit Comitibus, quibus Alexander VIII. ad Apostolicæ Sedis fastigium evectus est, Româ Beneventum reversus mense Majo MDCXC. novum Archiepiscopium cœperit inhabitare, & mox Moniales Neapoli Beneventum reduxerit. Anno verò MDCXCII. die XXVI. Maji feria secunda Pentecostes Divi Philippi Nerii (in cujus memoriam grati animi ergo propriam Missam a Sede Apostolica impetravit) festo recurrente, Metropolitanam Basilicam optimè instauratam & Aram maximam solemniter dicavit; aliis vero diebus septemdecim minores Aras ejusdem Basilicæ.

I. Provinciale
Concilium Bene-
venti 1693.

VIII. Insequenti anno MDCXCIII. mense Aprili Provinciale Concilium celebravit, in quo quatuordecim Suffraganei Samnii Provinciæ Episcopi, ac insuper tres honoris causâ cum Abbate Generali Montis Virginis, aliisque Abbatibus interfuere, in quo nihil planè
ad

ad sacræ rei splendorem, præclarumque totius actionis ordinem, nihil ad instaurandam, retinendamque in universa Provincia Ecclesiasticam disciplinam, cui optimis sanctionibus non consuleretur, desideratum fuit. Marcus Battaglinus Episcopus Nucerinæ in Umbria totius rei seriem in Annalibus suis Sacerdotii & Imperii Tom. IV. summis laudibus commendavit. Ingens hujus Provincialis Concilii pro universis Neapolitani Regni Ecclesiis pretium ac fructus; nam datâ Synodicâ Epistolâ ad Innocentium XII., quâ Concilii Patres postulabant, ut ille spolia Episcoporum, quæ ad Cameræ Apostolicæ jus referebantur, Cathedralibus Ecclesiis remitteret, clementissimus Pontifex benignè annuit edita de hac re Constitutione Apostolica, cujus præclari beneficii hoc monumentum Cardinalis Archiepiscopus in Metropolitana Basilica excitavit.

NEAPOLITANI REGNI
 SVBLIMIA TEMPLORVM TECTA ÆTERNVM
 QVATIAI ALLELVIA:
 NE DEINCEPS NVDA SINT PASTORVM SPOLIIS DITAVIT
 INNOCENTIVS XII. PONTIF. OPT. MAX.
 INSTANTE PROVINCIALI BENEVENTANO CONCILIO
 CELEBRATO
 MENSE APRILI ANNO MDCXCIII.
 DIVINO CERTE CONSILIO FACTVM.
 PSEVDO-CLEMENS VII. HIS ADINVENTIS SPOLIIS
 VRBANVM VI. NEAPOLITANVM PONTIF. MAXIMVM
 SPOLIARE NIXVS EST.
 INNOCENTIVS XII. NEAPOLITANVS
 SPOLIORVM ABOLITIONE
 CONCIVS MEMORIAM ET NATIONALIVM ECCLESIAIVM
 INOPIAM DECORE VESTIVIT.
 TANTO HIERARCHÆ BENEFICENTISSIMÓ.
 HOC IN MARMORE
 NOVVM TROPHÆI GENVS
 NON EX ADEPTIS SED EX REMISSIS SPOLIIS
 FR. VINCENTIVS MARIA ORDINIS PRÆDICATORVM
 CARDINALIS VRSINVS METROPOLITA
 AC CÆTERI DVO DE VIGINTI
 SAMNITIVM PROVINCIAE PONTIFICES
 EREXERVNT
 ANNO AB ORBE REDEMPTO MDCXCIV.

Alterum Provinciale Concilium mense Ma-
 jo MDCXCVIII. celebravit , cui interfuerunt
 tres

tres supra viginti Episcopi , plerique Suffraganei , ac cæteri honoris causâ : eoque tempore sacra Divi Bartholomæi Apostoli lipsana perscrutatus stato ritu & cultu post solemnem supplicationem porphyretica in urna ad Aram maximam in novo & eleganti ejusdem Apostoli Templo condidit . Vetus enim Divi Bartholomæi Templum ultimo Terræmotu disiectum anno MDCLXXXVIII. corruerat . Ubi inter confossionis ruinas sacra lipsana in arca ærea inaurata adinventæ , statim in Metropolitana Æde deposita fuerant , donec idem Templum ab Archiepiscopo restitueretur . Adeo populo frequens , ac etiam apud externos celebris actio fuit , ut a Dominico Viva Societatis Jesu Presbytero , & ejusdem Concilii Theologo accuratè descripta , typisque vulgata etiam ab Innocentio XII. Romano Pontifice legeretur , qui captus splendore ac ordine rerum , eundem ordinem in translatione , quæ tunc instabat , sacri Corporis Divi Pii V. ad tumulum in Sacello Sixtino in Exequiis magnificè paratum , servari mandavit . Illud non prætereundum , quod in solempni supplicatione Beneventi ducta per Urbem , quamvis Concilii Patres in gestatione sacræ urnæ cum Archiepiscopo per vices alternarent,

rent, ipse tamen Archiepiscopus nunquam succedi sibi voluerit.

Clemens XI.
usum Mitræ Ca-
nonicis Beneven-
tanis indulget.

IX. A Clemente XI., cui in Pontificiis Comitibus suffragatus fuit, usum Mitræ cum indumentis, & paramentis instar Abbatum pro Dignitatibus & Canonicis suæ Metropolitanæ Basilicæ amplissimo Diplomate impetravit, ac in pervigilio Nativitatis Domini anno MDCCI. solemni ritu Mitras benedixit, imposuitque Dignitatibus & Canonicis suis. Aliàs etiam ab Alexandro VIII. Pontificalium ornamentorum usum pro Pompejo Sarnello insignis Collegii Sancti Spiritus Abbate, viro eruditissimo, & multis sacris lucubrationibus satis noto, tunc Auditore suo Generali, atque inde Vigiliarum Episcopo impetraverat. Sed iterum XIV. Martii MDCCII. Terræmotu Civitas concussa fuit. Tempia, ædes, ac ædificia omnia vel eversa vel labefactata. Cardinalis Archiepiscopus in Archiepiscopio degens, piasque preces in Divi Philippi Nerii honorem recitans, ejusdem ope etiam hac vice servatur incolumis: Archiepiscopium stetit fatiscens tamen, atque inde nova enituit Archiepiscopi sollicitudo pro Sanctimonialium tutela, ac Templis, aliisque ædificiis reparandis. Quicumque sanè vir cæteroquin sapiens
& for-

Beneventū 1702.
iterum Terræ-
motu quatitur.
Mitra Archiepi-
scopi constantia
in propulsandis
malis.

& fortis in ea tempora incidisset , ad hanc secundam Civitatis cladem despondisset animum , atque iisdem iterum supervenientibus malis tandem cedere, non indignum putasset . Sed contra Cardinalis Urfinus audentior ivit . Ipsi enim Deus excelsam adeo , erectamque mentem dedit , ut adversa omnia infra spei magnitudinem , quam in Divina Providentia collocaverat , arbitraretur . Talem siquidem semper se exhibuit Episcopum , qualem Magnus Gregorius docet Episcopum esse oportere : *qui scilicet cunctis carnis passionibus moriens jam spiritaliter vivit , qui prospera Mundi postponit , qui nulla adversa pertimescit , qui sola interna desiderat* . Tantæ virtuti defuisset occasio , nisi hæ publicæ calamitates , atque ærumnæ summam illam animi vim , fortitudinem , patientiam , tolerantiam acriùs explorassent , atque acuisent . Ipso secundi Terræmotus anno , ut pauperes pueri in literis , ac moribus diligenter instruerentur , Clericos Regulares Matris Dei , quos a piis Scholis appellant , Beneventum evocavit , iussitque ut Collegium erigerent octo ducatorum millibus in foundationis subsidium erogatis .

X. Ecclesiam cum Coenobio S. Mariæ Angelorum Fratrum Ordinis Servorum Be-

C

tæ

Episcopum qualem esse oportet .

In Pastoralis par. l. cap. X.

Archiepiscopi
magnificentiâ, ac
liberalitas in ope-
ribus pictatis.

tæ Mariæ, donatis decem millibus, perfici mandavit; absoluto tamen opere, ac Fratribus postliminio reversis, marmoreo in monumento, proprio eorumdem fervorum ære, Ecclesiam cum Cœnobio a fundamentis erectam fuisse, jussit inscribi, ne tam pii operis gloriam sibi vindicaret in terris, qui mercedem unice præstolabatur in Cœlis. Presbyteris Societatis Jesu primo pro absolvenda Templi ædificatione multum æris tribuit, deindè propriis sumptibus construere cœpit Collegii Aedes, quæ amplitudine sua Conditoris magnificentiâ satis superque demonstrant. Pro restituendo verò Templo, Cœnobioque Sancti Dominici sui Prædicatorum Ordinis septemdecim, & amplius ducatorum millia impendit. Pro fundatione Cœnobii Fratrum Carmelitarum Discalceatorum decem ducatorum millia contulit. Hos enim, & Fratres Minores Sancti Francisci, quos Reformatos vocant, & Clericos Regulares Ministrantes Infirmis, quos Cruciferos dicunt, multis sumptibus in Urbem inexit. Pro quotidiana Officii B. Mariæ Virginis recitatione a Metropolitanæ Basilicæ Canonici, ac Mansionariis peragenda viginti quinque ducatorum millia cum septingentis quinquaginta erogavit. Novum in-
Vi-

Vitulani oppido crexit Canonorum Collegium, quorum quatuor ab ipso dotem acceperunt. Divi Bartholomæi Xenodochium, bis dirutum, semel atque iterum ædificavit, in quo singulos Peregrinos diebus tribus alere, iisque pedes abluere, mensæque humiliter ministrare consuevit.

XI. At non licet ire per singula, quæpius, ac munificentissimus Archiepiscopus Cardinalis in diuturno sui Archiepiscopatus regimine gessit, ne scriptio nostra modum excedat. Ut itaque paucis multa complectamur, nullus præteriit annus, non mensis, non dies, qui præclaro aliquo aut pietatis, aut liberalitatis opere notari, ac signari non possit Præsulibus ad exemplum, posteris ad memoriam. Nullum est officii Pastoralis genus, in quo ipse non fuerit diligentissimè, ac frequentissimè versatus. Quidquid ad Dei cultum, ad Templorum ornatum, ad sacræ suppellectilis nitorem, ad sacrarum Reliquiarum custodiam, ad veteres Ecclesiæ ritus retinendos, ad servanda Ecclesiasticæ libertatis jura: quidquid ad animarum salutem, ad prædicationem verbi Dei, ad erudiendum Clerum, & Populum, ad imbuendos in sacra Catechesi pueros, ad emendandos mores, & corruptam disciplinam

Reliqua Bene-
venti, quæ ad
Archiepiscopale
officium spectant.

reparandam: quidquid ad pauperes Peregrinos, Infirmos, Orphanos, Viduas, Defunctos fovendos, ac juvandos excogitari potest, omnia præstitit, cuncta implevit. Unum in ipso semper stetit in clade illa, & calamitate, quam semel, atque iterum Benevento Terræmotus intulit, fractis perditisque rebus præsidium. Nulla fuit in Civitate, ac Diœcesi Ecclesia, Coenobium nullum, nullum hominum genus, quod ejus providentiam, ac profusam in omnes liberalitatem non senserit: & ne præsens tantum ætas, sed & futura quoque ejus beneficentiâ uteretur, Sacras Missiones a Presbyteris Societatis Jesu per Diœcesim singulis trienniis obeundas, statutâ dote, produxit in ævum. Montem unum sex millium ducatorum dote constituit ad reparandas pauperiores Archidiœcesis Ecclesias. Pro pauperum verò annona frumentarium unum in Civitate, in Diœcesi verò centum sexagintasex ære suo aut erexit, aut auxit. Tantum etiam studium, curam, diligentiam adhibuit in conservandis, & augendis Ecclesiarum suæ Diœcesis bonis, quamvis duplici Terræmotûs clade imminutis, ut quæ sub initium sui regiminis in unum omnia collata vix septem supra sexaginta ducatorum millia in redditibus quotannis excede-

debant , ductâ ratione anno MDCCXV. quinque supra centum triginta millia quotannis excedere compertum sit . Ita enim misericors Dominus addidit ei omnia , quæcumque fuerunt , duplicia .

XII. Unum ne prætereamus ; cùm Beneventum , quamvis inter duos amnes conditum , fontibus careret , ac propterea summa Civitatis pars aquarum penuriâ laboraret , Cardinalis Archiepiscopus Theodoretum Cyrensem Antistitem , qui hujusmodi beneficium Civitati suæ præstitit , egregiè imitatus , longo ductu , decem aureorum millibus impensis , largas in Urbem intulit aquas , illasque in fontem deduxit ante Templum S. Sophiae , cujus Monasterium vetus olim ac celebre , postquam ex resignatione Benedicti Cardinalis Pamphili commendatum sibi fuit , splendidè restituerat , S. P. Q. B. tanti beneficii memor ad fontem in Divi Bartholomæi foro postmodum extructo hoc monumentum posuit .

Archiepiscopus
longo ductu a-
quas Beneventum
infert .

FRATRI VINCENTIO MARIE ORDINIS PRÆDICATORVM
 EPISCOPO PORTVENSI S. R. E.
 CARDINALI VRSINO ARCHIEPISCOPO
 QVOD POST CLXVII. FRUMENTARIOS MONTES
 ESURIENTIBVS ERECTOS
 SALVBRES SITIENTIBVS SVFFECERIT AQVAS
 TANTI BENEFICII MEMORES S. P. Q. B.
 BENEFACTORI INSIGNI
 PERENNE MONVMENTVM POSVIT.
 ANNO MDCCXVIII.
 CLEMENTE XI. PONTIFICE MAXIMO.
 IOSEPHO ERCVLANO GVBERNATORE
 IOANNE HIERONYMO DE ALBINO ET
 BARTHOLOMEO DE LEONE
 HVIVSCE FONTIS STRVCTVRÆ DEPVSTATIS.
 GAVDETE CIVES AC PASTORI OPTIMO
 QVI VESTRAM SEMPER SALVTEM SITIENS
 NE VOS SITIENTES ASPICERET
 LARGAS INTVLIT AQVAS
 VBERES GRATES PERSOLVITE.

XIII. Qui rationes impensarum Cardinalis Urfini inierunt, ferè sexies centena ducatorum millia in Archiepiscopatu Beneventano illum erogasse in pias causas testantur, antequàm Romanus Pontifex eligeretur. Ingens profecto pecuniæ vis, & quasi supra fidem insignis liberalitas, præsertim si Archiepiscopatus redditus computentur. Sed his accede-

Rationes impensarum in pias causas Beneventi.

debant alii Ecclesiastici proventus, & annuæ præstationes è re familiari, præsertim à pia genitrice Joanna, quæ Filium imitata Monasterium Sanctimonialibus Ordinis Divi Domini Gravinæ condiderat, in quo Religiosum habitum induit, Professionem verò emisit sub finem vitæ anno MDCC. legatis Filio, qui Matri decedenti omnibus pietatis officiis præsto fuit, xxv. millibus ducatorum. Et hac quidem pecuniâ anno MDCCII. ille potitus statim ad levandas ærurnas secundi Terræmotus, cum quibus tunc luctabatur, usus est. Magnas præterea vires habuit frugalitas Archiepiscopi, quæ multis impendiis, multis erogationibus sola sufficere videbatur; ac propterea mirandum non est, si Beneventum, quod unâ cum Diœcesi informe acceperat, ac duplici Terræmotu bis quassatum, splendidum ornatumque reliquerit, meritò habitus post Diomedem Ætolia Regem, & Achasim Ducem tertius conditor Urbis.

XIV. Et hæc quidem omnia Beneventi, cujus tamen Civitatis & Archidiœcesis fines Cardinalis Urfini zelus, vigilantia, pietas prætergressa, universam illam, & quidem amplissimam Samnii Provinciam implevit, & ad alias quoque Diœceses Neapolitani Regni se

Clemens XI. decernit Cardinali Urfino Legationem ad Cæsarem 1716.

se extendit . Si quod enim grave & arduum negotium in regionibus illis emerfit , fidei , ac sapientiæ Cardinalis Urfini Sedes Apostolica committere consuevit . Visitavit propterea Apostolicus Delegatus Diöceses plures , ubi optimis decretis Ecclesiasticam disciplinam , pacem , tranquillitatem aut restituit aut firmavit . Comitibus Congregationis Monachorum Montis Virginis , & aliorum Regularium Ordinum compluriès præfuit . Sed & extra Italiam quoque Clemens XI. Legationem , Apostolicam illi decreverat anno MDCCXVI. mense Febuario : Cum enim Christiana Republica Turcarum armis Corcyraë , & Italiæ imminentibus in summum discrimen esset adducta , & spes propulsandi periculum in Cæsare tantum foret , Clemens XI. Cardinalem Urfinum Romam evocavit , ut Legatus a Latere ad Cæsarem proficisceretur , quem ad suscipiendam communis salutis causam , & inferenda contra Turcas victricia Germanorum signa vehementer hortaretur . Confestim paruit Cardinalis ; nec ullâ valetudinis suæ ratione , non hyemis magnitudine , non viarum asperitate commotus Romam venit plenissimam laborum Legationem suscepturus ; sed cum inter hæc Cæsar jam arma pararet , nec am-

amplius mittendi Legatum urgeret necessitas, ab hujusmodi Legationis onere Cardinalem Urfinum Clemens absolvit, summis laudibus ejus fidem, & ardens pro Christiana Republica studium, & alacrem paratamque adeundi voluntatem profecutus.

XV. Titulum Sancti Sixti, donec inter Presbyteros Cardinales fuit, retinuit; sed tertiâ Januarii anno MDCCI. ex ordine Presbyterorum ad Episcoporum ordinem ascendit; consuetô optandi jure Tusculanam Ecclesiam affecutus, ex qua deindè anno MDCCXV. decima octava Martii ad Portuensem & S. Rufinæ transivit. Utrobique præclara pietas ac liberalitatis suæ vestigia. Utrumque lustravit Episcopatum, & in Tusculano Dioecesanam celebravit Synodum, cui ejus vice præfuit Franciscus Maria de Aste Archiepiscopus Hydruntinus Salentinorum Primas anno MDCCIII. & mox Synodales Constitutiones typis vulgatæ magno illius Ecclesiæ bono. Accidit verò anno MDCCXVIII. ut Nicolao Cardinali Acciajolo Episcopo Ostiensi, ac Veliternensi Sacri Collegii Decano graviter ægrotante, Cardinalis Urfinus Romam vocaretur, ut præfens in Curia foret, cum ille decederet: atque ita servatâ Constitutione Pauli Papæ IV. an-

D

no

Cardinalis Urfinus Episcopus Tusculanus 1701. Portuensis 1715. Pro Ecclesia Ostien. ac Velit. tenuit judicio contendere 1718. sed Jus ad Ecclesiam Ostien. ac Velit. & Decanatus Sacri Collegii illi detractum 1724.

no MDLV. die xxiii. Augusti editâ, Ecclesiam Ostiensem ac Veliternensem optaret, & Decani munere in Sacro Collegio fungeretur. At qui præsto fuit, cum de suscipienda ad Cæsarem Legatione laboris plenâ propter communem Christianæ Reipublicæ causam agebatur, renuit ire, cum de pinguiori Episcopatu ac de honoris incremento res erat, ne scilicet amantissimi Fratris & Collegæ sui Cardinalis Acciajoli mortem præstolari videretur; nec ei suaderi potuit, ut viâ se committeret, nisi certo nuntio præhabito de illius obitu, ac Beneventi principe in Templo defuncti Decani exequiis religiosissimè celebratis. Tusculum tunc accessit, inde in suburbani Sancti Pastoris, ubi ad Clementem XI. Summum Pontificem literas dedit, quibus adventum suum significavit, non tamen animo contendendi cum Fulvio Cardinali Astallio antiquiore ex Episcopis Cardinalibus, qui Romæ præsentibus erant, cum Decanus obiret, memor Apostolicæ vocis; *Servum Dei non oportet litigare*: & rursus, *si quis videtur contentiosus esse, nos talem consuetudinem non habemus, neque Ecclesia Dei*; sed juri suo se libentissimè cedere & enixè rogare, ut optio Ecclesiarum Ostiensis & Veliternæ cum Decanatûs honore Cardinali

dinali Astallio permetteretur : cupere tamen , ut Apostolico judicio decerneretur , an Residentia Cardinalium apud proprias Cathedralles aut majores Ecclesias sit publica ac necessaria causa , vel potius privata & voluntaria , a Paulina Constitutione excepta , cum hoc non ad sui tantum , sed & multorum Cardinalium , qui jugiter & laudabiliter in propriis Episcopatibus residebant , jus referretur . Clemens animi moderationem , ac sapientissimi Cardinalis prudens consilium vehementer probavit , quod & cæteri summis laudibus extulerunt . Contigit tamen illi , ut defuncto Innocentio XIII. cum Romæ esset in Vaticanis Comitibus , Sebastianus Antonius Tanarius (cujus memoria in benedictione est) Episcopus Ostiensis & Veliternensis , & Sacri Collegii Decanus decederet , ut Divina providentia palàm testaretur , & hunc honoris gradum Cardinali Ursino deberi , quamvis tunc ad supremum honorum omnium apicem provectus , & Romanæ Ecclesiæ Pontifex renuntiatus , illo fungi non potuerit .

XVI. Inclytum Prædicatorum Ordinem , cui adolescens nomen dedit , receptamque eo in Ordine regulam , quam semel professus est , coluit semper , & quantum Episcopo licet , ad

Cardinalis Ursinus regule Divi Dominici tenax & ejus amor & beneficia in Ordinem Prædicatorum .

unguem servavit. Perpetua illi a carnibus, immò & a vino abſtinentia; perpetuus etiam lanearum veſtium uſus: aſſiduum orandi & pſallendi ſtudio. Generalem Ordinis Magiſtrum, quaſi unus ex Fratribus, ſingulari obſervantiâ, cæteros verò Ordinis Fratres ac univerſam Divi Dominici Familiam omnibus charitatis ac benevolentiae officiis diligentiffimè proſequabatur. Ordinis ſtemma inferuit gentilitio ſuo, retinuitque etiam cum Romanus Pontifex eſſet. Expleto quinto ab inſtitutione Ordinis ſæculo rei memoriam ſæculari feſto integris octo diebus Beneventi in Eccleſia Metropolitana celebravit menſe Junio anno MDCCXVII. pluribus Episcopis illuc honoris cauſâ convenientibus. Nobiles Oratores ac præcipui muſicæ artis magiſtri præclaras illius celebritatis actiones exornarunt. Quatuor ducatorum millibus ſtetit impenſa, quibus Cardinalis Archiepiſcopus adjecit inſignem Divi Dominici ſtatuam ex argento opere fuſorio conſtatam, quam à ſe ritè benediſtam Eccleſiæ ſui Ordinis dono dedit. Præter inſtauratum Beneventi Cœnobium, & Eccleſiam Ordinis ſui, etiam in oppido Sancti Georgii de Molaria Cœnobium aliàs ſuppreſſum eidem Ordini & Congregationi Fratrum, quos

quos vulgo Gavottos vocant , attribuit : do-
temque auxit .

XVII. Plura ingenii ejus præclara mo-
numenta apud sacrarum literarum studiosos
in pretio habentur ; etenim præter Sermones
Marianos , & Synodicon Diœcesanum , quo-
rum supra meminimus , edidit etiam anno
MDCXCV. Synodicon Provinciale Beneventa-
num , in quo collectis actis omnium Concilio-
rum Provincialium , quæ in ea Metropoli vel
a Summis Romanis Pontificibus , vel a supe-
rioribus Archiepiscopis celebrata fuerunt ,
eruditas addidit notas , inseruitque primum
suum Provinciale Concilium , & in egregium
volumen opus excrevit . Duo quoque edidit
volumina Lectionum in Exodum , ac duode-
cim Conciones ad Populum de tempore sacra-
tissimæ Quadragesimæ ac Paschatis , & sexa-
ginta Sermones de purgatione Animarum è
corporibus excedentium , suffragiisque adhi-
bendis , & alia Opuscula : nec mirum has &
plures alias ineditas a Cardinali Urfino exta-
re lucubrationes ; ipse enim (ut de Nepotiano
scribit Hieronymus) *lectione assiduâ , ac medi-
tatione diuturnâ pectus suum Bibliothecam fecerat
Christi* . Præstantes etiam sacris literis viros
semper inter Familiares habuit , quos benignè
re-

Ingenii monu-
menta , & sacra-
rum literarum
studia .

Lib. 3. Epist. Fa-
mil. in Epitaph.
Nepotiani .

respicere & pro meritorum ratione beneficiis augere consuevit. Quindecim ex his Episcopatus honore dignati fuerunt, antequam Cardinalis Urfinus Romanus Pontifex eligeretur; plures deindè, quorum aliqui etiam Romanæ Ecclesiæ Purpura fulgent. Porro Beneventanum Archiepiscopium sub Cardinali Urfino non Aulæ speciem referebat, sed vetus Athenæum, sive, ut aptius loquamur, Pictaviense Episcopium sub Hilario, aut Hispalense sub Leandro repræsentabat; ibi enim sub tali ac tanto Magistro Ecclesiastici Ordinis viri erudiebantur in spem aut rectè Ecclesias administrandi, aut doctis lucubrationibus, quarum plures in lucem prodierunt, sacras literas illustrandi. Nec in Familiaribus suis tantum, sed & in aliis bonarum artium studia Cardinalis Urfinus amavit, ac fovit. Iis se Mæcenatem ac patronum præbuit: multi propterea Scriptores insignia volumina Cardinali Urfino nuncuparunt, cujus patrocinium, ac beneficentiam experti fuerunt. Sed hæc in minori fortuna: Jam hoc nostro Commentario libello prosequamur quid ille in majori, cum ad Romanæ Ecclesiæ fastigium evectus est.

XVIII. Romæ itaque justis persolutis Innocentio XIII., & invocatâ Divini Spiritus ope,

ope, habitaque a Francisco Blanchino Veronensi utriusque Signaturæ Referendario, & Liberianæ Basilicæ Canonico, gravi elegantique de eligendo Summo Pontifice Oratione, xx. Martii anno MDCCXXIV. Cardinales Vaticana Comitia inchoarunt, quæ celer & inopinatus Pontificis obitus multis difficultatibus implicaverat. Longa fuit animorum suspensio, cum modò de uno, modò de alio eligendo ageretur, donec Patres omnes quasi Divino Spiritu ducti in Fratrem Vincentium Mariam Urfinum Ordinis Prædicatorum, Episcopum Portuensem & Archiepiscopum Beneventanum, ætate tunc & dignitate Sacri Collegii Principem vota sua mirabili consensione intenderunt. Et sanè cum jam annus Jubilæi immineret, gravissima quoque Sedi Apostolicæ instarent negotia, tum in Galliis, ubi Constitutioni Clementis XI., cujus initium *Unigenitus*, adhuc quamplures refragabantur, qui ad saniores mentes redigendi erant; tum in Italia, ubi de restitutione Comacini a Cæsarianis militibus occupati nondum res transacta erat, nil magis opportunum, ac publico bono profuturum videbatur, quam in Apostolica Sede constituere Cardinalem Urfinum, cujus viri sanctimonia, sapien-

Fr. Vincentius
Marius Cardina-
lis Urfinus invi-
tus eligitur in
Romanum Ponti-
ficem Benedictus
XIII. appellatus
1724.

piencia, & pro Domo Dei zelus tantam apud omnes vim auctoritatemque haberet, ut libenter ei omnes obsequerentur. Itaque xxix. Maji anno MDCCXXIV. suffragantibus omnibus, Pontifex Maximus renunciatus est. Plura ille electioni suæ objecit, ætatem gravem, fixumque propositum, propter suæ infirmitatis conscientiam, Romanum Pontificatum non capeffendi, & hæc quidem non specie, quadam ac simulatione virtutis, sed ex animo. Verumtamen Cardinalibus urgentibus, ut Christianæ Reipublicæ opem ferret, tandem acquievit, ac Benedicti XIII. nomen assumpsit, ut Beatum Benedictum XI. ex Ordine Prædicatorum, virum sapientiâ ac vitæ sanctimoniâ celebrem, qui brevi paucorum mensium Pontificatu multa præclara complexus est, in memoriam hominum revocaret. Ubi primùm res Populo ritè nuntiata a Benedicto Cardinali Pamphilio Diaconorum primo, ingens omnes incessit lætitia, ac mirum gaudium universam pervasit Christianam. Rempublicam, omnibus inde non temerè sperantibus magnum publici boni incrementum. Cum enim in ore hominum versarentur, quæ & quanta in Archiepiscopatu Beneventano, & in toto longævæ vitæ decursu benè ac sapienter

ter Cardinalis Urfinus fecisset , atque ejus animi religio , fortitudo , liberalitas ubique prædicarentur , quid non sperandum ab illo Pontifice Romano , qui tot ac tanta Cardinalis & Archiepiscopus Beneventanus præstitisset ? Quod si exempla rectè vivendi ac singulis benefaciendi in minori fortuna ab eo petebantur , quanto magis in maxima ? Si Beneventum Terræmotibus quassatum bis restituerat , si Clerum ac Populum ad religionis cultum , & meliorem vitæ rationem traduxerat , eadem meritò quisque sibi ab illo pollicebatur in Ecclesiæ universæ administratione . Inter plaudentis igitur Populi acclamationes , cum jam advesperasceret , ad Vaticanum templum deductus ; ubi primum ad sacræ Basilicæ limina venit , è gestatoria sella descendit , pronus oravit , & sacræ limina non sine lacrymis osculatus est , ac nonnisi pedes ipsam Basilicam ingredi voluit , in qua gestatoria sellâ uti ex veræ humilitatis studio recusavit .

IV. Junii Dominica sacratissimæ Pentecostes ad eandem Basilicam solemniter apparatu descendit : ibi ab Annibale Cardinali Albano ejusdem Basilicæ Archipresbytero hac salutatione exceptus : *Factus est etiam nuper , ut olim in Apostolos hac ipsa die de Cælo sonus , tamquam*

Annibal Cardinalis Albanus Benedictum XIII. in Pentecoste Vaticanam Basilicam ingredientem alloquitur ,

E

ad-

advenientis spiritus vehementis, cum omnium eligentium mentes, & vota Te, Beatissime Pater, invitum licet ac reluctanter adegerunt ad supponendos Apostolicæ sarcinæ humeros pares. Imperii igitur tui auspiciatus initia, Basilicam hanc sacros Petri Cineres veneraturus ingredi, cui in Te ipso dignissimum Successorem exhibes: Ecclesiæ autem toti Pastorem optimum, nec sacræ doctrinæ copia, & absoluta vitæ sanctimonia primis ejusdem sæculis invidendum. Post solemne Sacrum, ante fores ejusdem Basilicæ a Petro Cardinali Othobono more majorum coronatus est.

XIX. Principibus electionem suam significavit. Cardinalibus in consueto Senatu die XII. Junii gratias egit his verbis Patres allocutus: *Venerabiles Fratres: Est quidem Divinis institutionibus traditum, ut gloriatur Frater humilis in exaltatione sua; quo dextera Domini magnificetur in laude; & qui dixit de tenebris lucem splendescere, mirabilium suorum gloriam in figmenti infirmitate luculentius ostendisse videatur. Nos tamen dignis Apostolico ministerio virtutibus destitutos, nostrique reatus conscientia pavidos, vicem magis nostram dolere decet, atque a judicii ejus potius timere, quam de exaltatione gloriari. Propterea cum primum de sollicitudine omnium Ecclesiarum Nobis imponenda agere cœpistis, meri-*

tò

Benedictus XIII.
Cardinalibus gra-
tias agit de ele-
ctione.

tò verebamur, ne Deus terribilis in consiliis super
filios hominum elevans allideret nos; ac ne fortiora
suscipientes incusso pondere contereremur, aut ir-
rumpentes in sancta, opprimeremur a gloria. At
verò dum ingenti metu perculsi ministerium nostræ
imbecillitati jure formidandum detrectaremus, mi-
ra illa, & officii plena Fraternitatum vestrarum con-
sensus certissimo Nobis argumento fuit cælestium
mandatorum, quibus nefas esse duximus diutius
obluclari. Primum igitur Omnipotenti Deo, qui
per vestra suffragia humilitatem nostram in hac
sublimi Apostolatus Cathedra collocavit, immorta-
les submisso corde gratias agentes, fore confidimus,
ut qui vocatione sancta sua compulit ad inchoan-
dum, vires quoque sufficiat ad perficiendum, &
virtutem conferat, qui contulit dignitatem. Præ-
clara deinde Fraternitatum vestrarum de nostra te-
nuitate judicia, fraternæque benevolentiae officiosis-
simam contentionem, etsi nulla verborum vi satis
ornare possumus, grato certè semper animo recole-
mus, neque ullam referendæ gratiæ, officiique repo-
nendi opportunitatem elabi, aut excidere patiemur.
Supereſt, Venerabiles Fratres, ut qui pro studiis,
judiciisque vestris nostræ quoque administrationis
rationem Pastorum Principi reddituri estis, Ordini
ac muneris vestri memores infirmitati nostræ
subsidiū sedulā operā, & sapientibus consiliis con-
fera-

feratis ; & qui Pontifici eligendo tanta animorum alacritate suffragati estis , trepidantem vero ac defugientem tam studiosè erexistis & confirmastis ; electum jam demùm , impositaque sarcinâ laborantem ac fatiscentem pari pietatis , studiiq; contentione adjuvetis . Ut autem inde ducamus Apostolicæ servitutis initium , unde habent bona cuncta , velut a perenni fonte claritatis & salutis originem , vestrarum in primis obsecrationum apud Patrem misericordiarum suffragia requirimus ; cæteros autem Christifideles Jubilæo proximè indicendo ad divinam clementiam pro salubri Dominicæ Plebis regimine per supplicationes , eleemosynas , jejunia , aliæque Christianæ pœnitentiæ & religionis opera nobis conciliandam excitabimus . Exhibeamus igitur , Venerabiles Fratres , nosmetipsos sicut Dei Ministros ; & Sacrosanctæ Ecclesiæ necessitates , quas sine lacrymis intueri non possumus , sedulò reputantes , in omnibus præbeamus nos ipsos exemplum bonorum operum , ut Christianorum moribus , & Clericali præsertim disciplinâ ad pristinam sanctimoniam reformatis , certius nobis auxilium de sancto polliceri valeamus . Nec sterilis , nec ad speciem tantùm gratiarum actio fuit ; cum enim ipse , cæteras inter virtutes , gratum animum , beneficum , ac maximè liberalem pro viribus exhibuisset semper , jam ad summum rerum arbitrium

bitrium evectus cœpit cum omnibus liberalissimè agere, & post auctas fortunas Cardinalibus illis, qui tenuioribus proventibus Dignitatem suam ægrè tuebantur, Præsulibus quoque, qui in ministerio Sedis Apostolicæ sunt, honesta pro modo laboris, atque industriæ stipendia aut dedit, aut auxit. Siquidem Romæ multis & gravibus muneribus, ac publicis procurationibus nulla erant constituta stipendia. Carebant enim his omnes fermè Præsules, qui Sacris Cardinalium Congregationibus a Secretis erant, quique in iisdem Congregationibus causas aut proponebant, aut dirimebant, viri sanè de Republica optimè meriti, & multis nominibus illustres. His profectò omnibus, aliisque Magistratibus Benedictus XIII. certos ac liberales proventus attribuit.

XX. Interim sicut statim post electionem suam per aliquot dies, cæteris sepositis curis, segregatus ab hominibus, consilium & opem a Deo rogaverat, ut universæ Ecclesiæ regimen feliciter auspicaretur; ita etiam in eandem causam ab omnibus Christifidelibus pias preces & bonorum operum suffragia postulavit, indicta in Urbe ad xxv. Junii supplici Processione ab Ecclesia S. Mariæ supra Minervam
ad

Dei opem implorat. Jubilæum indicit. Ecclesiæ Regni Neapolitanæ spoliis Episcoporum: Animas purgatorii in locis detentæ suffragiis juvat.

ad Ecclesiam S. Mariæ in Vallicella , peccatorum omnium Indulgentiâ , & remissione concessâ , sicut Anno Expiationis Romani Pontifices largiri solent . Tunc Regni Neapolitani Ecclesiis consuluit, quibus ipso authore, primi Beneventani Concilii Patribus rogantibus, Innocentius XII. spolia decedentium Episcoporum , quæ olim ad jus Apostolici ærarii referebantur , attribuerat : cavitque ne Metropolitanæ , aut Cathedrales in eo Regno Ecclesiæ hujusmodi spoliis privarentur , etiamsi Archiepiscopus , aut Episcopus extra Dioecesim suam diem obiret. Mox Fidelium Animabus , quæ purgatoriis locis detinentur , piam adhibuit curam , potestate factâ Orthodoxis Præsulibus totius Orbis , ut in unaquaque Patriarchali Metropolitana seu Cathedrali Ecclesia unum ex Altaribus seligerent , in quo ex Apostolico privilegio (si eo Ecclesia caret) quotidie posset quilibet Sacerdos uni ex illis incruento sacrificio suffragari , ut a pœnis ignis Purgatorii erueretur .

XXI. Cum autem ipse natus omnino esset ad sublevandas generis humani calamitates , adeo facilem audiendis cunctis , adeo benignum excipiendis singulorum votis se exhibuit , ut naturæ necessitatibus tempus subduceret,

Facilitas & ordo
singulis audien-
dis .

ceret, quod aliis benefaciendo impertiretur. Multis diebus a primâ luce usque ad vesperam nullo sumpto cibo, nulla indultâ corpori quiete, omnibus ad se accurrentibus, nulla majestatis suæ objecta specie, volens libensque se impendit, ac superimpendit; nec tot ad se confluentium, si non planè iniqua postulassent, vacuum ullum, tristemque dimisit. Deindè verò ut faciliùs & ex ordine posset facere omnibus satis, hebdomadæ dies pro unoquoque hominum genere distribuit; pro Præfulibus, pro Clero sæculari, pro Regulari, ac denique pro laicis, ut unicuique statâ die liceret ad ipsum accedere. His sanè laboribus in plures menses, atque inter æstivos calores exantlatis, publicam addidit populi audientiam, ut nulus planè esset, cui copiam sui non faceret.

XXII. Enituit præsertim summa ejus animi benignitas, atque clementia in excipiendis Episcopis, quos non tantum nomine, sed & re dilexit ut fratres; agens cum ipsis familiariter, non passus est illa sibi ab eis exhiberi obsequia, quæ a cæteris exhibentur. Libentius ad fraterna oris, quam ad communia pedum oscula admittere, nec flexis genibus, sicut reliquos homines, sed stantes, aut sedentes Episcopos audire decentiùs duxit. Quatuor

Episcopi a Benedicto XIII. benigne excipiuntur.

*Patriarcharum
privilegium.*

tuor primis Patriarchis Constantinopolitano, Alexandrino, Antiocheno, & Hierosolymitano, ut exomide super amiculo breviori in Urbe, & ubique uterentur, indulgit. Ipse enim præ omnibus Episcopalem dignitatem maximi semper fecit. Propterea tot sub initium ejus Pontificatûs externos Episcopos, famâ ejus benignitatis illectos Roma vidit, quot fortasse post ultimum generale Concilium Lateranense vix unquam viderat. Multas eorum causas, quæ jamdiù in Romana Curia magnis sumptibus, nec levi Ecclesiarum incommodo agebantur, mirâ sapientiâ brevi explicavit, atque diremit, ut qui plures in annos inter multarum litium anfractus Romæ detinebantur, compositis rebus ad commissi sibi Gregis curam, atque custodiam alacres, atque omnibus difficultatibus unâ Summi Pontificis voce expediti regrederentur.

*Vestigalia subdi-
tis imminuta.*

XXIII. Animum tunc adjecit ad imminuenda subditis vestigalia, quæ superiorum temporum calamitas invexerat. Inter hæc populo maximè grave ac plebi acerbum vestigal erat, quod ex unaquaque libra carnis, quâ quis uteretur ad vescendum, pendebatur, non solum quia nec miser ullus, aut infimæ plebis homo immunis ab eo habebatur, verum
rum

rum etiam quia pauperibus rusticis injuriæ opportunis durus instabat exactor, si fortè aut ovis, aut vitulus extinctus statim non fuisset repræsentatus. Hujusmodi itaque vectigal planè sustulit; & cum nonnulli publici ærarii angustias objicerent, quod vix ferendis sumptibus par esse poterat, si hujusmodi vectigalis redditibus ad septuaginta & amplius aureorum millia quotannis excurrentibus minueretur, Pontifex sapienter respondit, malle se à superfluis sumptibus temperare, & exhausto ærario parcere, quam tanto subditorum incommodo parari sibi unde sumptus faceret, & pecunia in ærarium inferretur. Alia etiam vectigalia Romæ abolevit, quæ plebi injuriosa videbantur.

XXIV. Ipso Pontificatûs exordio cœpit Benedictus detestari usum comæ fictitiæ, qui, rarus olim inter laicos, paulatim in Clerum irrepperat adeò frequens, ut nonnulli viri, Ecclesiasticis Dignitatibus etiam primariis conspicui, comis supposititiis uterentur. Siquidem Pontifex existimabat, hujusmodi morem Clericali tonsuræ adversari; quibus enim propriam comam nutrire interdicitur, fas esse non potest assumere alienam. Ubi hæc Pontificis sententia innotuit, statim Ecclesiæ

Comæ fictitiæ usus a Benedicto è Clero sublatus.

F

Prin-

Episcopi è Regularibus Ordinibus assumpti morientur de servandis Ordinibus institutis.

Principes, mox Aulici, quorum exemplum alii in Urbe, indè extra Urbem secuti fictas cæsaries deponere, ita ut nondum ullo vulgato Edicto, nondum ullis propositis poenis, brevi ubique locorum mos malè coeptus è Clero tolleretur. Eâdem facilitate & alios sustulit, qui exteriorem Clericorum habitum, & cultum, quem a laicis discretum esse voluit, deformabant. Sapienter etiam monuit illos, qui a Regularibus Ordinibus ad Episcopatum assumuntur, ut memores professionis suæ, quantum cum Episcopali dignitate liceret, proprii Ordinis instituta servarent, cum Episcopatus semel emissâ vota non solvat, sed potiùs impleat, atque perficiat.

Promotor fiscalis pro omnibus Curiis Ecclesiasticis Romæ statuitur.

XXV. Indè ne Clericorum delicta impunita manerent, qui proprii Episcopi disciplinam refugere tentantes, ejus sententiis beneficio Appellationis ad Romanam Curiam illudebant, in qua cum Episcopi proprias sententias magnis impendiis tueri aut nollent, aut interdum nec possent, Promotorem Fiscalem pro omnibus Curiis Ecclesiasticis in Urbe delegit, eique ex Apostolico ærario stipendium constituit, ut Causas susciperet, & Episcoporum judicia adversus criminum reos tueretur. Sustulit hoc pacto Pontifex Appellatio-

lationum invidiam , ac veteres compressit querelas, olim a Divo Bernardo Claræ Vallis Abbate ad Eugenium III. delatas ; nam salvo primæ Sedis jure , ad quam unicuique , qui se Judicis sententiâ gravatum putat , confugere licet , consuluit quieti ac tranquillitati Episcoporum , sumptibus eorum pepercit , æquitatemque judicii restituit ac vigorem disciplinæ .

XXVI. Infelicem deindè Pastorum animarum conditionem miseratus , qui gravibus pensionibus obnoxii proprias Ecclesias a temporis injuriis vindicare , & paternam pauperum curam gerere non poterant , prout quinquaginta annorum , quos sanctissimè in Episcopali officio transegerat , experimento didicerat , Apostolicâ Constitutione cavit , ne deinceps Parochiales Ecclesiæ ullo pensionum onere gravarentur . Decrevit etiam ut Cardinalibus Episcopis , quamvis Româ absentibus , apud proprias tamen Ecclesias commorantibus , nihil juris deperiret , quominus Decanatus Sacri Collegii , & optio Episcopatus Ostiensis ac Veliterni eis deferretur , ne alienæ mortis detestabile votum in Ecclesia Dei appareret . Vix enim hujus mali species poterat arceri , si graviter ægrotante Sacri Collegii

Parochiales Ecclesiæ a pensionibus immunes .

Cardinalibus Episcopis apud proprias Ecclesias commorantibus Decanatus jus , & Episcopatus Ostiensis ac Veliterni optio datur .

Decano, Cardinales Episcopi (quod tamen interdum accidebat) amicorum literis incitati, confestim Urbem aut Suburbia peterent, ut ibi Decani mortem præstolantes tamquam in Romana Curia præsentis ex Apostolica Constitutione Pauli Papæ IV. jus suum tuerentur.

Benedictus non solum publicè & semipublicè, sed etiam privatim per Urbem incedit.

XXVII. Mens illi erat singulas in Urbe sacras Ædes invisere, memoriis Martyrum, aliorumque Sanctorum frequenter adesse, Xenodochia visitare, & pastoralis vigilantiaæ atque Apostolicæ charitatis officia palàm omnibus, & ferè quotidie exhibere; sed his conceptis votis mos Aulæ obstabat, quod Summus Pontifex nonnisi solemnibus apparatu & erectâ Cruce, & magno Præfulum, Aulicorum, aliorumque Nobilium comitatu, multis prætorianis militibus circumseptus, ac levis armaturæ Equitibus, partim præeuntibus, partim subsequen-
 tibus è Palatio pedem efferre, & in publicum prodire solet; quæ cum non sine totius Aulæ commotione fieri possent, idcirco superiores Pontifices rarò in publicum producebant majestatem suam. Hunc morem seu ad tuendam summam Pontificis dignitatem, seu ad parcendum Aulicorum incommodis, seu potiùs ne supremus Princeps cuncta inspicere,

cere , scrutari , ac sui copiam omnibus facere posset , sed Adminiftrorum fidei committere , & ex aliorum relationibus agere cogeretur , jamdiù receptum , probandum non putavit Benedictus ; feignius enim irritant animum dimiffa per aures , quam quæ sunt oculis fubjecta fidelibus ; ac propterea voluit fibi licere , non folùm folemni publicoque apparatu , fed & minùs folemni & quafi femipublico ; ac in-fuper omni apparatu pofthabito , quafi privato in Urbe homini , exteroque Epifcopo palàm prodire . Quo pacto cœpit Religioni largiùs indulgere , luftrare fingula , & ad omnia charitatis officia fe ultrò demittere ; ferè quotidiè , cum per graviffimas Pontificatûs curas liceret , facras Ædes adire , Martyrum , aliorumque Sanctorum memorias venerari , valetudinaria invifere , infirmis humiliter miniftrare , pauperibus , ægrotis , & in agone cum morte luctantibus opem ferre : & quod ad fervandam ritè pfallendi difciplinam plurimùm contulit , in fingulis Basilicis atque etiam in aliis Ecclefiis , ubi a Canonicorum , aut ab aliorum Clericorum collegiis Divinæ laudes perfolvuntur , choro intereffe , exemploque fuo cæteros docere , Divinum opus pro dignitate diligenter agere .

Sacras Ædes Valetudinaria &c. vifitat , & Choro pfallentium intereff in fingulis Ecclefiis .

XXVIII.

Consecrationes
Episcoporum ac
Pallii traditionē
Benedictus sibi
reſervat.

XXVIII. Consuevere veteres Romani Pontifices Episcopis, qui Romæ ordinabantur, consecrationis munus impertiri; quod si hujusmodi officium implere non possent, id jure ad Ostiensem Episcopum pertinebat, cujus est & Romanum Pontificem consecrare. At cum & Summi Pontifices magnis distenti curis, & Episcopi Ostienses, plerumque annis prægravati, non levem hujus actionis laborem refugerent, sæpè diù electi Episcopi detinebantur in Urbe, incerti a quonam ordinarentur. Verùm Benedictus delicias suas in sacris actionibus ponere assuetus, omnem sustulit difficultatem, ac pristinum morem restituit; ipse enim quotquot peterent, & quandoque etiam non petentibus Consecrationis munus impertiri decrevit: ac propterea factum est, ut sicut in cæteris Pontificalibus actionibus omnium frequentissimus fuit, ita & plures Episcopos ipse unus consecraverit, quàm multi superiores Romani Pontifices. Deinde etiam Pallia, quæ de Beati Petri corpore sumpta electis Archiepiscopis Apostolica Sedes largiri consuevit (in ipsis enim est plenitudo Pontificalis officii) statim ritibus Archiepiscopis in Urbe præsentibus sacratissimis suis manibus tradenda fore existimavit, cum antea a Cardinali Dia-

Diaconorum Primo tradi consuevissent , & mihi quidem Archiepiscoporum minimo humillimè petenti , cum me a Nucerina ad Firmanam Ecclesiam transtulisset , VII. Idus Januarii anno MDCCXXV. in Templo SS. Domini & Sixti primum Archiepiscopale Pallium imposuit , postquam Antonium Fonsecam ordinasset in Episcopum Æsinum , eo scilicèt in Templo , quo & ipse Benedictus in Archiepiscopum Sipontinum fuerat consecratus , cujus accepti a sanctissimo Pontifice ac benignissimo Principe insignis beneficii memoriam numquàm animo meo excessuram puto . Solemnnes quoque Ecclesiarum & Altarium dedicationes , quæ in ipsa Urbe Religionis magistra infuetæ ferè erant , in usum revocavit , nil planè labore deterritus longæ & gravis actionis . Prima autem , quam Romæ sacrauit , Basilica fuit duodecim Apostolorum . Hanc olim a Constantino Augusto conditam , atque indè plurium Romanorum Pontificum ope instauratam , jam vetustate fatiscentem Fratres Minores Conventuales a fundamentis restituere cœperunt sub Clemente XI. qui primum novæ constructionis lapidem jecit . Opere magnificè & eleganter absoluto , Benedictus XIII. die XVII. Septembris , qua anniversaria Sacrorum

Basilica XII. Apostolorum Romæ consecratur .

rum Stigmatum memoria ex alterius Benedicti scilicet XI. Romani Pontificis ejusdem Ordinis Prædicatorum institutione recolitur, Basilicam unà cum Ara maxima solemniter dedicavit, mirantibus cunctis, Pontificem ætate gravem, & quintum ac septuagesimum annum agentem multarum horarum laborem, & operam alacriter sustinuisse. Cessit tamen quæcumque admirationis occasio iis, quæ subsequuta sunt, magis adhuc ingravescentibus annis, quorum hæc præludia tantum, & initia fuerunt.

Basilicæ Divi
Pauli via Ostien-
subsidia collata.

Preces ad auro-
ræ, meridiei, ac
noctis signa flexis
genibus recitan-
das esse Benedi-
ctus exemplo doc-
et.

XXIX. Instaurationi Basilicæ Divi Pauli viâ Ostiensi decem aureorum millibus attributis consuluit. Ut reparationis nostræ mysterium devotè Fideles recolerent, statas preces ad auroræ, meridiei, ac noctis signa flexis genibus recitandas censuit, quem morem primò exemplo suo è rheda descendens, dùm eâ per Urbem veheretur, invexit: deindè sacram Indulgentiarum largitione firmavit.

Lateranensis Ec-
clesiæ solemnem
intra possessionem
1724.

XXX. Hæc omnia præstabat Pontifex, & adhuc propter æstivos calores non tam sibi, quam aliis ut parceret, nondum Lateranensis Ecclesiæ solemnem inierat possessionem. Mense verò Septembri die xxiv. in quam incidit Dominica xvi. post Pentecosten, insti-

instituto omnium Romanæ Curiaë ordinum
solemni equitatu, ipse albo equo vestus ad
Lateranense Patriarchium processit. A Qui-
rinali Palatio usque ad proximum ibi Tem-
plum Divi Silvestri Philippus Ursinæ Fami-
liæ Princeps jure inclytæ Gentis suæ Pontifi-
cio Solio Assistens, Gravinæ Dux, & Bene-
dicti XIII. ex Fratre Nepos, inde Populi
Romani Conservatores, & Prior stratoris of-
ficio functi sunt. Marius Marchio Frangipani
Urbis Senator eum in Capitolio excepit his
verbis gratulatus: *Vetustos Capitolii triumphos
instauras & refers, Beatissime Pater: hic olim Se-
natus, Populusque Romanus lati excipiebant Cives
suos in patriam reduces, bellicâ virtute conspicuos;
hic modò Senatus Populusque Romanus Te præ-
clarissimo Civium suorum sanguine genitum vene-
rabundi excipiunt, ad patriam veluti reducem, exi-
miis virtutibus, & Dignitate omnium maximâ
ornatum. Tibi itaque, Sanctissime Pater, Civi,
Principi, Pastorique suo omnia venerationis, obse-
quii, fidelitatis argumenta pollicentur, & offerunt.*
Decreverat Senatus Populusque Romanus
triumphalem Arcum optimo Civi, Principi,
ac Parenti, quem statuere consuevit Summis
Pontificibus Romano sanguine progenitis; sed
Benedictus XIII. mirâ humilitate ac mode-

Senator Urbis
Benedicto gratu-
latur, qui trium-
phalis Arcus ho-
norem respicit.

G

stia

50 BENEDICTI XIII.

Dux Parmæ &
Placentiæ de mo-
re struit ad Hor-
tos Palatinos.

stia hos honores inhiuit, mortales caducos-
que titulos deprecatus; sciebat enim ubi sita
vera sit gloria. At in Romano Foro ad Pala-
tinos Hortos Franciscus Farnesius Parmæ &
Placentiæ Dux, S. R. E. feudatarius trium-
phalem Arcum erexit hoc titulo:

BENEDICTO XIII. PONT. MAX.

Heroum, Pontificum, Divorum

Virtute, Sacerdotio, Pietate,

Nepoti, Successori, Hæredi.

Christiani Orbis Principi,

Parentique optimo

Franciscus Farn. Parmæ & Plac. Dux &c.

In quo hæc legebatur Inscriptio:

Ad supremam Petri Cathedram

Triumphantis, militantisque Ecclesiæ votis

Jamdiu evocatum,

Sacras cum Ecclesiarum omnium Matre

Cælo, Terraque plaudentibus

Feliciter nuptias adeuntem

BENEDICTUM XIII.

Lætitia ac veneratione prosequitur

Franciscus Farnesius Dux.

Inter lætas ac faustas acclamantis populi vo-
ces in Lateranura venit, ubi a Benedicto Car-
dinali

dinali Pamphilio Lateranensis Basilicæ Archipresbytero gratulatoriâ & eleganti Oratione exceptus, solemnem adeptus est Romani Pontificatus possessionem. Præ foribus Basilicæ hæc legebantur inscripta :

Inscripta præ foribus Basilicæ Lateranensis.

*Occurre Sponso , gratulare Principi ,
Excipe Patrem , venerare Pontificem
BENEDICTUM XIII.*

*Primogenita Christi , Domina Gentium ,
Omnium Mater & Caput Ecclesiarum
Lateranensis Ecclesia .*

*Reclude hos Postes Æneos , illosque repera ,
Qui plausibus exultantium respirantibus
Inclytum reboent , quo decorantur ,
Nomen Cælestini III.*

*Ut sacros Atavi hîc quiescentes Cineres
Virtutum omnium triumphans comitatu ,
Et faustè nunc , feliciterque ingrediens
Exhilaret Pronepos .*

Intus verò :

*Ingredere Sanctam Hierusalem novam ,
O Doctor optime , maxime Principum ,
Tot , tantisque meritis ipsis a cunis
Sanctissime Pontifex
BENEDICTE.*

G 2

Id

*Id omnium una vox, & singulorum omnis
Plurimis, & ex innumeris firmat argumentis.*

Sed Populi flegant, mirentur Principes,

Et sacri tantum resonent concentus,

Ne sublimis, & constans tua

Humanis, quas semper respuit, laudibus

Tristetur Humilitas:

Hæc Te nam docuit Avitos fugere,

Sed ut celsissimo, licet invitum,

Muneraret Principatu.

Ad Aram verò maximam hæc habebantur :

Ascende primum Majestatis Solium,

Summos, & plures quod adhuc Pontifices

Gemino tibi sanguine cognatos redolet Parentum

Utrisque dignus, ac non impar Avis,

Quos inter satis Felix, & Gregorius.

Sanctorum, & Magni celebres Insignibus,

Apostolorum Petri, ac Pauli Capita,

Et Christum Pacis hic Largitorem

Pari quo Proavus tuus

Nicolaus III.

Cultu supplex adora,

Ut Pacem Tibi, Sponsæque servet Tux,

Quam in Te uno, plurimosque in annos

Mirè dum datus es proximiori

Et experimur, & deprecamur omnes.

XXXI. At

XXXI. At Benedictus de spirituali salute illorum, qui ægritudinis causâ in Valetudinariis Urbis commorantur, sollicitus, Clementem X. imitatus, singulos Præfectos Regularium Ordinum ad se accersitos paternè monuit, ut per vices aliquos Religiosos viros ad Xenodochia submitterent, qui spiritualem opem Infirmis ferrent. Inerat dictis non solum imperantis auctoritas, sed & illa, quæ efficacior est, vis exempli, cum ea Pontifex aliis mandaret, quæ frequenter ipse exequeretur. Templum S. Mariæ in Domnica propriis sumptibus instaurandum curavit. Cathedrali verò Ecclesiæ Civitatis Aquilæ in Aprutiis jampridem, anno scilicet MDCCIII. Terræmotu dejectæ, spolia Clericorum illius Diœcesis ad decennium attribuit, ut tandem instauraretur.

Infirmorum spiritualis salutem in Valetudinariis Urbis Benedictus curat.

XXXII. Anno MDCCXXIV. jam ad finem vergente, consilium iniit Synodum celebrandi cum Episcopis peculiaris Romanæ Provinciæ, quæ inter Capuanam, Senensem, & Pisanam ad inferum, inter verò Firmanam, & Urbinatam ad superum Mare sita est, & cum aliis, qui nulli Metropolitæ subsunt, ut rogatis Episcoporum sententiis, certiùs de communi Ecclesiæ bono statueret, atque primæ Se-

Concilium Provinciale Romanum indicit.

Sedis exemplo cæteros Metropolitas ad cogendas Provinciales Synodos vehementiùs excitaret. Cum enim Romæ, ubi primis Ecclesiæ temporibus frequenter hujusmodi Episcoporum conventus agebantur, jam a pluribus sæculis cessarent, & post Innocentii III. Pontificatum nulla Provincialis Synodus habita fuisset, alii etiam Metropolitæ ab hujusmodi conventibus abstinebant, quamvis & Sacrorum Canonum autoritas, & Generalis Tridentinæ Synodi Decreta, ut singulis trienniis a Metropolita Provincialis Synodus celebretur, disertè præcipiant. Ut itaque restitueret rem, communicato prius in Consistorio secreto cum Cardinalibus consilio suo, in pervigilio Nativitatis Domini anno MDCCXXIV. Concilium Provinciale indixit in alma Urbe ad diem Dominicam in Albis proximi tunc anni MDCCXXV. celebrandum.

Promotiones
Cardinalium.

XXXIII. Cum autem post ornatos Sacræ Purpuræ Præfules in Romana Curia emeritos Joannem Baptistam Alterium Clementis X. pronepotem, & Clericorum Cameræ Apostolicæ Decanum, Alexandrum Falconerium Urbis Governatorem, & Vice-Camerarium, Vincentium Petram S. Congregationis Episcoporum & Regularium consultationibus præ-

præpositæ a Secretis, & Prosperum Marefchum Auditorem suum, eundem honorem decrevisset Fratri Augustino Pipiæ Ordinis Prædicatorum Generali Magistro, ut Ordini honorem redderet, quem ipse Pontifex in eo acceperat, magnificè contenderunt Benedictus, & Nepos ejus Philippus Urfinus Gravinatum Dux in proferendis grati animi erga inclytum Ordinem argumentis: quem enim Patruus inter Cardinales promovit, Nepos ejus multis largitionibus est profecutus, annuâ etiam oblatâ pensione sexcentum ducatorum, primò ipsi, deindè uni ex Cardinalibus Ordinis Prædicatorum ab Urfinæ Familiæ Principibus solvendâ.

Philippus Urfinus Gravinatum Dux in Cardinalis Ordinis Prædicatorum beneficia confert.

XXXIV. Annus Jubilæi xv. præ foribus erat. Hunc Benedictus Apostolicis literis universis Christifidelibus denunciaverat in natalitiis Sanctorum Apostolorum Petri & Pauli: subindè Episcopos monuerat de iis, quæ agenda erant, ut qui religionis causâ Romam peterent, ritè ac rectè piam peregrinationem aut susciperent aut prosequerentur. In pervigilio verò Nativitatis Domini, post indictum Provinciale Concilium, Portam Sanctam Vaticanæ Basilicæ solemni ritu, magnoque populi accursu aperuit. Sacræ actioni duo Bavariæ

Annus Jubilæi Benedictus indicit, & Portam Sanctam in Vaticano aperit.

variæ Principes, qui devotionis causâ Romam venerant, interfuere. In aliis verò Patriarchalibus Basilicis idem præstiterunt officium Legati ab eo Cardinales de Latere, scilicet in Basilica Divi Pauli via Ostiensis Fabricius Cardinalis Paulucius Episcopus Portuenfis, ægrotante tunc Francisco Cardinali de Judice Episcopo Ostien. ac Velit. Sacri Collegii Decano: in Lateranensi Benedictus Cardinalis Pamphilius Archipresbyter, & denique in Liberiana Petrus Cardinalis Othobonus Archipresbyter & S. R. E. Vice-Cancellarius.

 1725

Annus Jubilæi
perstringitur.

Benedicti laus &
pietatis opera.

XXXV. Optatissimus & frequens advenis ac Peregrinis fuit annus Jubilæi & remissionis. Horum enim plurimi etiam ex magnis Principibus (inter quos Violantis Beatricis de Bavaria Magno Hetruriæ Principe viduæ pietas enituit) Romam venerunt religionis causâ, famâ sanctitatis Summi Pontificis illecti. Unum Hospitium Sanctissimæ Trinitatis tot Peregrinorum millia in singulos menses excepit, quot ductâ totius anni ratione tercentum & amplius millium numerum excederent. Pia etiam Sodalitia charitatis officiis decertarunt, quibus unumquodque posset Confratres de longinquo Romam venientes liberaliùs ac splen-

splendidiùs excipere . Summus verò Pontifex post adhibitam rebus omnibus, & advenarum, peregrinorum, ac pauperum commodo singularem providentiam, cæteris exemplo præire, sacras Basilicas religiosè ac frequenter invisere, peregrinorum hospitia adire, pedes peregrinis lavare, atque eorum mensæ ministrare in deliciis habuit, mirantibus exteris in Pontificia majestate culmen veræ humilitatis. Plures eorum post explorata Romæ, quæ & quanta Pontifex aut egerat, aut agebat, aut in dies agere meditabatur, iisque non ex vulgari fama (quæ summis Principibus quandoque invidet, quandoque blanditur) acceptis, sed proprio oculorum perspectis intuitu, asserere de Benedicto non dubitarunt quidquid olim de Rege Salomone Regina Saba; dicebant enim: *Verus est sermo, quem audivimus in terra nostra super sermonibus tuis, & super sapientia tua, & non credebamus narrantibus nobis, donec ipsi venimus, & vidimus oculis nostris, & probavimus, quod media pars nobis nuntiata non fuerit. Major est sapientia & opera tua, quàm rumor, quem audivimus. Beati viri tui, & beati servi tui, qui stant coram te semper, & audiunt sapientiam tuam. Sit Dominus Deus tuus benedictus, cui complacui- sti, & posuit te super thronum Israel.* Pontificis

3. Reg. cap. x.

H

excm-

exemplum Cardinales, & Præsules statim secuti. Unum illis fuit in explendis religionis & charitatis operibus commune certamen. Sed nec prætereundum, quàm religiosè Jacobus III. Magnæ Britanniae Rex, & uxor ejus Regina Clementina Sobieschi, Romæ degentes, sacris actionibus interesse, Basilicas visitare, aliisque pietatis operibus, sicut semper, ita & hoc anno magis operam dare studuerint. Ne autem ob suspensas juxtà veterem morem Indulgentias omnes populus, statis ad lucrandam Jubilæi remissionem Sacrarum Basilicarum visitationibus contentus, ad cætera torpesceret, Pontifex indulxit, ut quisque posset consuetas Indulgentias lucrari, non sibi tamen, sed Animabus in Purgatorio igne detentis, suffragii jure applicandas.

Funeribus Cardinalium, & anniversariis Exequiis Clementis X. Benedictus intererat.

XXXVI. Cum autem hujus anni initio Franciscus ab Aquaviva & Aragonia Cardinalis Episcopus Sabinensis Romæ diem obiisset, pius Pontifex, vetus quoddam Benedicti III. decretum in mores revocare cupiens, funebribus Exequiis voluit interesse, & solemnè supra cadaver absolutionis officio fungi, quod deindè aliis omnibus S. R. E. Cardinalibus in Urbe decedentibus præstitit, quos etiam ægrotantes invisere consuevit. In his verò, aliis-

aliisque funebribus actionibus, ac præsertim in anniversariis Exequiis Clementis X. quibus interfuit semper, gratus & memor Purpuræ, qua ab illo fuerat donatus, pluviali veste violacei, non autem rubri, ut antea, coloris ei placuit uti, quod & violaceum & atrum aut nigrum colorem sacras summi Sacerdotis vestes decere, pro temporum ac officiorum ratione, juxta veterem Romanæ Ecclesiæ disciplinam sit arbitratus.

Violacea veste utitur.

XXXVII. Interim celebris ætate nostrâ Sedis Apostolicæ causa, ex justitia & æquitate Cæsaris, Benedicto summopere urgente, finem accepit. Res erat de Comaclo in Ferrariensis Legationis Provincia non obscurâ civitate in palustri ad Adriacum mare sinu conditâ, piscationibus divite, & ad Pontificiæ ditionis fines protegendos opportunâ: insignis quoquæ ex ea census in Apostolicum ærarium quotannis inferebatur. Hanc Pipinus Francorum Rex, è potestate Aistulphi Longobardorum Regis vindicatam, Stephano II. Romano Pontifici anno DCCLV. restituerat. Carolus deindè Imperator ex rerum gestarum amplitudine cognomine Magnus, interceptum a Desiderio Longobardorum Rege Comaclum Adriano I. anno DCCLXXIV. reddiderat. Inde

Comaclum receptum anno Julij. 1745.

H 2

plu-

plurium sæculorum decursu Sedes Apostolica Comaclum tenuit, donec sub initium sæculi XIV. Principes Atestini, receptâ a Romanis Pontificibus Vicario jure Ferrariâ, Comaclum quoque, tamquam Ferrariensis ditionis oppidum seu civitatem a Ferrara dependentem obtinuerunt. Paulus II. Borsum Atestinum Ferrariæ, aliorumque locorum illuc pertinentium, Ducis titulo ac dignitate ornavit; ita deindè Atestini Principes Ferrariam unâ cum Comaclo, beneficio Sedis Apostolicæ, fiducia-rio jure tenuerunt, præstitâ clientelâ, & censu quotannis soluto. Sed Alphonso II. postremo Ferrariæ Duce defuncto, Clemens VIII. anno MDXCVII. universum Ferrariæ Ducatum, una cum Comaclo, tamquam ad Sedem Apostolicam jure directi domini devolutum, recepit. Exindè Romani Pontifices pacificè Comaclo potiti sunt, quamvis interdum Principes Atestini modò sibi, modò Romano Imperio in Civitatem & valles Comaclenses jura obtendere non intermiserint. Tandem anno MDCCVIII. cum universa Italia magno bellorum incendio conflagraret, de Hispanicæ Monarchiæ successione summis Principibus Germanis & Gallis decertantibus, Cæsariani milites, nihil tale Clemente XI. suspicante, ex im-

improvise Comaclum adorti sunt, atque oppido nullo negotio occupato præsidium imposuerunt. Quæ & quanta Clemens XI. tum paternis ad Cæsarem adhortationibus, tum prolatis Apostolicæ Sedis juribus, atque iis, quæ ex adverso inferebantur, rejectis, ad recuperandum Comaclum gravi & assiduâ hujus rei tractatione præstiterit, non est hic narrationis locus. Porro sub finem Pontificatûs, Alexandro Albano ejus ex fratre nepote causam hanc apud Cæsarem solerter agente, spes erat recipiendi Comaclum, quæ magis etiam sub Innocentio XIII. confirmata fuit sapientissimi Pontificis curâ. Res tamen adhuc infecta erat, Divino Numine postremam, sed maximam servante confectæ rei gloriam Benedicto XIII. & sacri Jubilæi anno, quo apud Hebræos unicuique licebat ad agrorum suorum possessionem redire. Hoc enim anno, compositis inter Pontificem & Cæsarem rebus, mense Februario Cæsariani milites ultrò Comaclo excesserunt, & Apostolica Sedes primæva possessionis suæ septemdecim integris annis interceptæ jura recepit: atque hinc facile patet, quàm altè summis Principibus insita sit erga Apostolicam Sedem reverentia, ut si quid unquam, quod & aliàs retroactis temporibus

Allocutio Benedi-
dicti ad Cardina-
les de Comacino
recepto.

ribus accidit, ex ejus patrimonio attigerint, ocyùs seriùs religione ducti ex integro, & quandoque etiam cumulatius restituerint. Benedictus rem in consueto Senatu habito XXIX. Januarii Cardinalibus significavit, nil sibi, sed Deo optimo in primis, deindè Clementi & Innocentio, ac denique Cæsari felicem rei exitum gloriæ ac laudi vertens, his verbis Cardinales allocutus: *Venerabiles Fratres, Respexit Dominus in hæreditatem suam, & sanctuarii jura, collatis concordi fœdere Sacerdotii, & Imperii officiis, per Cæsaream pietatem, justitiamque reparavit. Diuturnis quidem studiis, curisque, ut Fraternitatibus vestris exploratissimum est, nihil intentatum reliquerat felicitis recordationis Clemens XI. prædecessor noster, ut in pristinam possessionem Civitatis Comacensis hæc Sancta Sedes restitueretur. Ac licèt adversa temporum conditio fructum Pontificiæ sollicitudinis retardaverit, rationes tamen hujus Sanctæ Ecclesiæ asserere eximiâ cum sui nominis gloriâ, ad extremum usque vitæ spiritum ille non destitit. Pari quoquè sollicitudine, prudentiâque, quod vos rescire non dubitamus, rem ad optatum propè exitum perduxerat felicitis recordationis Innocentius XIII. prædecessor itidem noster; sed mors intercurrenti et si illi de solertiæ laude nihil decerpfit, confecti tamen operis lætitiâ interceptit. Nobis ve-*
rò,

rò, qui nostram agnoscentes, ac testantes infirmitatem in labores eorum introivimus, gaudium hujus prosperi successus consolator humilium Deus referavit, in hoc operam & labores adhibendo dilecti Filii nostri Cardinalis Cienfuegos, quod vobiscum hodiernâ die ex hoc loco, ut moris est, communicandum duximus, Fraternitatibus vestris significantes, charissimum in Christo Filium nostrum Carolum Romanorum Regem in Imperatorem electum, pia & illustria Majorum suorum exempla prosequentem, suæque religioni, & æquitati, ac nostrorum simul, quos laudavimus, Antecessorum, paternisque nostri Apostolatus officiis obsecutum, possessionem Comacii dimisisse, ut in eam hæc Sancta Sedes restitueretur ut prius. Quo autem pacto res ipsa peracta sit, præstat ex tractatibus conventionibus, quas vobis recitari volumus, Fraternitates vestras accipere. Magnificemus igitur, venerabiles Fratres, Deum protectorem, & demus gloriam laudi ejus, qui ad nostræ imbecillitatis ministerium propterea opus misericordiæ suæ distulisse videtur, ut nomini suo, quidquid est prosperè gestum, unice assignaretur. Eiusdem præterea charissimi in Christo Filii nostri laudes digno præconio celebremus, qui in colenda justitia, Sanctæque Ecclesiæ rationibus tuendis præcipuam Austriaci sanguinis, & Cæsarei nominis gloriam collocare gessit. Ita Benedictus vir-

virtute in perficiendo, verecundia in prædicando, adeptus laudem & gloriam apud omnes, invidiam apud neminem.

Xenodochium
Divi Gallicani
coëptum.

XXXVIII. Xenodochii Divi Gallicani in regione Urbis Transtiberim pro mundandis curandisque iis, qui scabie laborant, novum ædificium ac Templum, Petro Marcelino Cardinali Corradino Pro-Datario maximè procurante, hoc anno a Pontifice coëptum: qui in majori Hebdomada sacris actionibus, quas Romani Pontifices eo tempore in Vaticano obire solent, additâ etiam Chrismatis, & Olei Catechumenorum atque Infirmorum consecratione, minimè contentus, Sabbato ejusdem Hebdomadæ cæteris solemniter functus est in Laterano, ubi post baptismalis Fontis, qui a Constantino Magno nomen habet, benedictionem, plures ad regenerationis lavacrum veteri Ecclesiæ ritu salutaribus aquis immerfit, ac omnibus, quæ ad ejus diei officium pertinent, expletis, reliquum tempus expiandis sacra exomologesi quotquot accurrebant, impertiit. Feriis IV. V. & VI. Paschalis Hebdomadæ ceris, quæ ab impressa Agni Dei imagine nomen accipiunt, solemniter benedixit, prout Romani Pontifices primo Pontificatûs sui anno Paschalibus diebus

Gesta a Benedicto
in majori hebdomada
anno Jubilæi 1725.

bus facere consueverunt . Ingens distributa , copia, & ad exterar quoque regiones adducta . Illas Christifideles exceperere magnâ animorum devotione . Ensem & Pileum in Natalitiis Servatoris nostri ritè benedictum , quibus Apostolica Sedes Principes viros , Ducesque summos pro Christiana Republica strenuè ac feliciter pugnantes interdum ornat , Antonio Emmanueli de Vilhena Magno Magistro Ordinis & Militiæ Hierosolymitanæ dono misit, ablegato Melitam Joanne Francisco Oliverio , qui sibi erat ab honore Cubiculi . Dedit id Benedictus non meritis tantum Magni Magistri, quæ cæteroquin multa ac præclara erant, sed & Ordinis totius , cujus Milites nobilitate generis , ac fortitudine animi præstantes ex ea Insula , veluti præcipuo Christianæ Reipublicæ propugnaculo Africæ objecto adversus Turcas , aliosque Barbaros Piratas jugiter dimicant .

XXXIX. At imminebat tempus Provincialis Concilii ad Dominicam in Albis indicti, cum Summus Pontifex dedit literas prorogationis ad Dominicam secundam post Pascha , quæ incidit in xv. Aprilis , ut Episcoporum , qui jam in itinere erant , præstolaretur adventum . Statutâ verò die cum Romam conve-

Concilium Romanum, ejusque acta summatione

I nif-

nissent plurimi ex Prælatiſ, quos ad Synodum vocaverat, ii verò, qui Canonicâ præpediti-
 one detenti adeſſe non poterant, vices ſuas ido-
 neis Procuratoribus demandarent, initium
 operi dedit in Patriarchali Lateranenſi Baſili-
 ca; nam poſt ſolemneſ cum Cardinalibus &
 Synodi Patribus ſupplicationem, verba fecit
 ad univerſum conventum, omnes vehementer
 hortatus, ut ſepoſitis domeſticis curis, & quæ
 carnem & ſanguinem ſapiunt, Dei gloriæ &
 Eccleſiæ utilitati vacarent. Septem ſeſſioni-
 bus peracta res eſt, præmiſſâ unicuique ſeſſio-
 ni Congregatione Patrum præſynodali, in qua
 quidquid in ſeſſione decernendum erat, ad
 trutinam revocabatur. Poſtremæ ſeſſioni ad-
 dita fuit ſolemniſ ſupplicatio ad Templum
 S. Crucis in Hieruſalem die xxix. Maji, quæ
 Benedictó XIII. electionis ſuæ anniverſaria
 erat: xxx. verò ejuſdem menſis in Sacello
 Sixtino ad Vaticanum *Benedictus S. Eccleſiæ Ca-
 tholicæ Episcopuſ ſynodalibus conſtitutis a ſe proba-
 tis atque firmatis, ſubſcripſit.* Tunc ſubſcribere
 Cardinales S. R. E. xxxii. Archiepiſcopi vi.
 Episcopuſ xxxix. Abbates iii. Procuratores
 abſentium xxxv. Quantum in hiſ actionibus
 ſapientia ac zelus Summi Pontificis enituerit,
 referri vix poteſt. Multa Eccleſiaſtica diſci-
 pli-

plinæ capita fuerunt, de quibus salutaria decreta condita sunt: & ne Romanæ tantum Provinciæ consuleret, qui universæ Ecclesiæ supremam curam ac sollicitudinem gerit, plures addidit Apostolicas Constitutiones, dum Romanum Concilium celebraretur, sapienter editas, ut earum usus cæteras Provincias pervaderet. Hujusmodi sanctionibus multas sustulit difficultates, quibus quædam saluberrima Concilii Tridentini decreta, ac præsertim de Præbenda Theologali & Pœnitentiali in qualibet Cathedrali Ecclesia instituenda, & de Seminariis Clericorum in unaquaque Diocesi erigendis, frustrabantur. Consuluit etiam reparationi Ecclesiarum Cathedralium, aliarumque, quæ Canonorum Collegiis fulgent, attributâ eisdem medietate proventuum, qui a novis Beneficiariis ex Ordinaria autoritate Beneficia obtinentibus primo anno percipiuntur. Quæstiones etiam omnes diremit, quæ frequenter suboriebantur de Ecclesiastica Libertate & Immunitate, dum celebrem de hac re Constitutionem Gregorii XIV. diversimodè unusquisque pro suo libito, ac proprii ingenii licentia interpretabatur. Præterea efficacem normam præscripsit coercendi Clericos, qui Ecclesiæ proventibus gaudentes,

habitu tamen & cultu laicos imitantur. Canonorum collegia peculiaribus legibus muniri, firmarique jussit. Abbatibus Regularibus, ut Episcopalem benedictionem fusciperent, anni tantum a die electionis inducias statuit. Parochis quartam funerum portionem multis privilegiis a Monastico ac Regulari Ordine iisdem præreptam, Benedictus XIII. & ipse ex Ordine Regulari, nil tamen æquitati ac justitiæ præponens, restituit. Apostolicas literas Sixti V. de recensendis bonis, ac redditibus Ecclesiasticis ad usum revocavit: multaque addidit de Ecclesiarum Archivis, ubi tabulæ & documenta tutò servantur, rectè ordinandis & custodiendis. Denique celeberrimi Monasterii Cassinensis privilegia, & jus quasi Episcopale in civitate S. Germani, multisque in oppidis confirmavit.

Divi Philippi
Nerii cultum Be-
nedictus augeat.

XL. Verum neque inter Concilii Romani actiones a cæteris, quæ religionis erant, Pontifex abstinebat. Nam gratum animum erga Divum Philippum Nerium, cujus precibus salutem suam inter ædificiorum ruinas Beneventi referebat acceptam, multis modis aucto ejusdem cultu, testatum voluit. Postquam enim XVI. Kalendas Junias ad Templum Sanctæ Mariæ in Vallicella Aram Sacelli interior-

rioris, in quo mortales Divi Philippi exuviae
 conduntur, solemnī ritu dicasset, plura pri-
 vilegia largitus est: festumque Divi Philippi
 diem in Urbe & agro Romano vacatione ab
 omni servili opere quotannis servari voluit.
 Presbyteri Congregationis Oratorii accepto-
 rum beneficiorum memoriam marmoreo mo-
 numento contra fores Sacelli statuerunt.
 Hanc Lector accipe, ut rem penitus intelligas.

BENEDICTVS XIII. PONTIFEX MAXIMVS

EX ORDINE PRÆDICATORVM

DIVI PHILIPPI NERII SVI LIBERATORIS

SACELLI INTERIORIS ARAM XVI. KALENDAS IVNIAS

OCTAVO DIE ASCENSIONIS ANNO IVBILÆI

A PARTV VIRGINIS MDCCXXV. SACRAVIT.

IN DIEM DOMINICVM EIVSDEM FESTI

ANNIVERSARIA DEDICATIONIS TRANSLATA MEMORIA.

QVORVM VNI PLENARIAM LARGITVS EST INDVLGENTIAM

ALTERI L. POENALIVM ANNORVM

TOTIDEMQVE QVADRAGENORVM DIEVM VENIAM

INVISENTIBVS QVOTANNIS INDVLISIT.

ET LIBERANDI QVOTIDIE A PVRGATORIIS POENIS

CHRISTIFIDELIVM ANIMAS SACRIFICIQ INCRVENTO

ALTARE EXTERIVS PERPETVO PRIVILEGIO AVXIT.

COMPROBATO SACERDOTVM CONGREGATIONIS VSV

QVO RECVRRENTE SOLVM DEFVNCTORVM COMMEMORATIONE

NIGRIS IN EO VESTIBVS DIVINA MYSTERIA PERAGVNTVR.

S. PHILIPPI DEMVM DIE FESTO IN VRBE EIVSQVE DITIONE

AB OMNI SERVILI OPERE VACARI IVSSIT.

AC

AC VTRVMQVE ILLIVS ALTARE PRIVILEGIARIVM

PONTIFICIO DIPLOMATE SANXIT,

IBIQUE ORANTIBVS POENITENTIÆ SACRAMENTO EXPIATIS

VEL EXPIARI FIRMITER DELIBERANTIBVS

INTEGRAM TOTIES OMNIVM CRIMINVM RELAXATIONEM,

DEFUNCTIS ETIAM COMMVNICANDAM

PERENNI MVNERE IMPERTIVIT.

ORATORII CONGREGATIO TANTIS DEVINCTA BENEFICIIS

SVPREMO ECCLESIAE PASTORI BENEFICENTISSIMO

QVAMVIS MERITO LONGE IMPAR

GRATI ANIMI MONVMENTVM POSVIT.

Præterea festivitatis D. Philippi solemne Officium eo in Templo celebrandum inter illa retulit, quibus Romanus Pontifex cum Sacro Cardinalium Collegio interesse solet: & non solum Benedictus quotannis, cum Romæ esset, interfuit, servatusque deinceps est mos, sed etiam ipse ferè quotidie, præsertim cum in Vaticanum reverteretur, ad Templum Vallicellanum descendere, & ad illud Sacellum orare consuevit, aluitque etiam pauperes, qui eo in loco assidue orarent.

Pax inter Christianos Principes
anno Jubil. 1725.

XLI. Dum hæc Romæ agebantur inter multiplices adeò Ecclesiæ curas nil Pontifex intermittebat de studio pacis inter Christianos Principes, ac præsertim inter Carolum VI. Cæsarem, & Philippum V. Catholicum Hispania-

spaniarum Regem procurandæ, inter quos postquam de Hispanica successione diù certatum est, licet ab armis foret temperatum, nihilominus xxv. annis animorum dissensio interjecta adhuc erat. Tandem his conditionibus composita res est, ut salvis utrique amplissimorum Regnorum titulis, Cæsari quidquid in Italia, & in Belgio, Philippo verò ipsa Hispaniarum Regna, & quidquid in Asia, Africa, & America ad Hispanos pertinet, cederent. Divinâ providentiâ factum puto, quod vix Romæ confectâ Provinciali Synodo, Pontifex nuntium acciperet confectæ tandem optatissimæ pacis, ut satis mortalibus omnibus constet, quantum Divina clementia majorum Sacerdotum studia atque operam in publicum Christianæ Reipublicæ bonum fortunare dignetur, si Sacerdotes ipsi Regnum Dei primò quærant, atque ad ea, quæ Religionis sunt, præcipuam animi curam intendant. Unum tamen conceptam compositæ pacis lætitiâ turbavit, quod cæteras inter condiciones ea erat, qua Carolo Hispaniarum Principi ex secundis nuptiis Philippi V. cum Elisabetha Farnesia Primogenito, non solum Hetruriæ, sed Parmæ etiam ac Placentiæ successio adjudicabatur: cum enim Farnesii Principes has civi-

civitates beneficiario jure a Sede Apostolica obtinerent, nihil de his statuendum videbatur, nisi ex Summi Pontificis placito. Quare Benedictus, accepto pacis nuntio, in Senatu habito XI. Junii coram Cardinalibus de servandis juribus Sedis Apostolicæ in Parmam & Placentiam adversus initæ pacis conditiones protectus fuit.

Ecclesia S. Mariæ in Domnica in titulum Presbyteralem, altera S. Mariæ ad Martyres in Diaconiam erigitur.

XLII. Præterea eodem in Senatu Pontifex cum Præfules duos, scilicet Nicolaum Cosciam Archiepiscopum Trajanopolitanum, cuius operam multis in rebus xxv. annorum experimento probaverat, & Nicolaum de Iudice jamdiu sub Clemente XI. Innocentio XIII. atque ipso Benedicto Apostolicis Palatiis Præfectum in Sacrum Cardinalium Collegium cooptasset, alio deinde in Senatu Ecclesiam S. Mariæ in Domnica, quæ Diaconia erat, in Presbyteralem titulum erexit, & Cardinali Cosciæ attribuit: Ecclesiam verò S. Mariæ ad Martyres, quæ vetus fuit Romanorum Pantheon, magnificentissimè a Marco Agrippa conditum non solum firmissimæ molis magnitudine, præcelsis columnis pretiosisque varii generis marmoribus conspicuum, sed etiam sacris Religionis nostræ monumentis celebre, Cardinalium Diaconiam esse voluit, eam-

eamque primò contulit Nicolao Cardinali de Judice. Mox Cingulo nobili in Piceno oppido Auximanæ Diœcesis antiquum Cathedræ Episcopalis honorem, & civitatis jura restituit, ac Cingulanam Ecclesiam Auximanæ æquè principaliter unitam fore decrevit. Oppido etiam Pontis Curvi, in quo Aquinates Episcopi commorari solent, Civitatis jura dedit, & Cathedram Episcopalem, quam Aquinati conjunxit. Ac denique post restitutam veterem Setinæ Ecclesiæ Cathedram, Privernati quoque Ecclesiæ restituendam censuit, itaut unus Tarracinensis Episcopus idem Setinus ac Privernas esset, ac tribus Cathedralibus Ecclesiis, Tarracinensi scilicet, Setinâ, ac Privernate potiretur.

Cingulo, Ponti Curvo, Priverno Cathedræ Episcopalis honor accedit.

XLIII. Metropolim quoque Urbinatem Benedictus benignè respexit, quam non solum antiquus Principum splendor, & præclara in bonis artibus civium nomina ei commendabant plurimum, sed potissimum felix & faustus ortus Clementis XI. prædecessoris sui, qui natale solum ibi sortitus Catholicam Ecclesiam diù sanctèque administraverat, cujus Nepotes duo Annibal & Alexander Albani in Sacro Cardinalium Collegio grandium virtutum laude florebant & adhuc florent. Itaque

Urbinum Benedictus beneficiis prosequitur.

K post-

postquam sub initium Pontificatûs Dignitatibus & Canonicis Ecclesiæ Urbinatis, ut mitris aliisque sacris indumentis instar Abbatum uterentur, indulisset; hoc anno editâ Constitutione Apostolicâ x. Kalendas Junii, alteram Pii IV. confirmavit, qua Urbinum Metropolis honorem accepit, ac inter Suffraganeas Ecclesias Eugubinam quoquè esse voluit, quæ hætenus jus Metropoliticum detrectaverat, omni sublatâ disputatione, ac veteri lite, quæ adhuc vigeat, extinctâ. Præterea Rosam auream Ecclesiæ Urbinati donavit pro amoris sui significatione & honoris incremento. At ne Poësis quidem sine honore apud Benedictum fuit; cum enim Bernardinus Perfectus Senensis summam extemporanei carminis gloriam adeptus, non ad lasciviam, ut plerique faciunt, verum ad honestatem & sapientiam cantare paratus, atque his artibus apud magnos Principes gratiofus foret, Pontifex coronam poetici cantus in Capitolio Romano illi decrevit. Maximâ omnium ordinum frequentiam III. Nonas Maji Laurea data, mirantibus cunctis non tam insuetæ actionis celebritatem, quàm mentem, ingeniumque Poetæ, qui ad quodcumque italici carminis genus (multa enim ab eruditissimis viris meditata pro-

proferebantur) eodem servato metro extemplo respondit non minus appositè, quàm eleganter.

XLIV. Sed non ita his Benedicti animus detinebatur, quin ad ea, quæ Religionis sunt, etiam in remotis ab Italia provinciis pastoralis vigilantia sollicitudinem adhiberet. Cùm foederatum Belgium, in quo nostrâ etiam ætate ferè quingenta millia Fidelium Catholicorum capita censentur, postquam ab iis, quos Apostolicæ Sedis mandatis refragantes vel in doctrina error, vel pervicacia in moribus accusabat, miserè in varias partes, factionesque distractum foret, illa videbatur salutis spes, quòd Sacerdotibus refractariis paulatim aut resipiscentibus, aut deficientibus, alii Operarii inconfusibiles ritè ordinati, ac missi ab Apostolicis Nuntiis seu Vicariis stationes decedentium implerent; qua in re Jo: Baptista Cardinalis Bussi cum in Belgio Internuntium, & deindè Colonia Agrippinæ Nuntium Apostolicum ageret, ac Missiones illas etiam præsens lustrasset, summoperè laboravit, ut fileam de me, quem, post ornatum Purpura Bussium, Clemens XI. iisdem Missionibus præesse voluit, ac etiam de aliis, qui Cardinalis Bussii vestigia sunt secuti. At Re-

In Belgio foederato a Refractariis attentata a Benedicto compressa.

fractarii interitum sui pertimescentes, ut pravitatem, quam fovebant, posteris traderent, quosdam errorum suorum consortes ab exteris Episcopis perperam ordinari, & a Domino Maria Varlet Episcopo Babylonensi, nullam in foederato Belgio potestatem habente, Sacramentum Confirmationis administrari curarunt: illo scilicet Episcopo alienæ plebis homines usurpare tentante, quem gravibus ex causis suspectâque doctrinâ Sedes Apostolica ab ordinis Episcopalis usu, & executione suspenderat, etiam antequam Episcopatus possessionem iniret. Et nihilominus cum septem Clerici, Canonorum Capituli Ultrajectini, quod a centum & amplius annis intercidit, nomen præsumentes, Cornelium Steenoven Ecclesiasticis censuris obstrictum in Archiepiscopum Ultrajectinum nullo jure elegissent, ejusque electio a Sede Apostolica fuisset rejecta, adhuc illum per sacrilegam præfati Episcopi Babylonensis manuum impositionem, consecrari impetrarunt, duobus aliis Episcopis, qui juxta Sacros Canones interesse, & cooperari debent, non adhibitis. Ad hæc Benedictus insurrexit, datis literis XXI. Februarii MDCCXXV. ad Catholicos in foederato Belgio degentes, quibus electionem Cornelii irri-

irritam , consecrationem verò illicitam , & execrandam fuisse declaravit , additis contra eundem Cornelium poenis , ne quidquam attingeret eorum , quæ ordinis , vel jurisdictionis sunt Episcopalis , & contra alios , ne cum illo præsertim in Divinis communicarent. His literis XVII. mensis Martii in foederato Belgio evulgatis , cum idem Cornelius nil territus Sacramentum Confirmationis administrare , Ordinesque conferre fuisset ausus , statim lethali morbo correptus , paucis interjectis diebus, consumptus est, III. scilicet Aprilis ; brevi etiam alii duo , Presbyter Jacobus Kriis , qui cæteris vehementior auctor fuerat sacrilegæ consecrationis , & laicus Donkens , in cujus ædibus illa peracta erat , perierunt , nullo edito poenitentiae salutaris argumento . Verumtamen iidem Refractarii , visitante Domino in virga & verberibus iniquitates eorum , apposuerunt adhuc peccare ei . Siquidem Lugduni Batavorum iterum inani Canonicorum Ultrajectinorum nomine assumpto , XVI. ejusdem mensis Aprilis alium Cornelium nomine Berckman Clericum suarum partium , suæque pertinaciæ participem , in Archiepiscopum Ultrajectinum eligere non reformidarunt . Rei nuntio accepto, Benedictus vehementer

menter indoluit, occurritque gravioribus, quæ timebantur, malis, editis literis XXIII. Augusti, quibus præposteram, invalidamque electionem Cornelii Berckman rejecit, ac nullam prorsus & irritam declaravit, adjunctâ in eum sententiâ excommunicationis, si Archiepiscopi nomen usurparet, si consecrationis munus ab ullo licet Catholico Episcopo reciperet, sive sacram jurisdictionem in fœderato Belgio exerceret.

Ludus sortium a
Benedicto veti-
tus.

XLV. Ludum sortium seu urnæ sæpius a Romanis Pontificibus interdictum, sed importunis populi precibus tandem utcumque permissum, tùm ad sublevandas Apostolici ærarii angustias, cùm etiam ne illi, qui ejus cupidine tenebantur, ad exteras provincias, reipublicæ damno, pecunias transmitterent, multi apud Pontificem accusabant; objectâ enim spe lucri sæpius inani, at semper magna gliscebatur & augebatur in dies ludendi libido, quæ ferè omne hominum genus, & loca cuncta Pontificiæ ditionis pervaserat non sine domesticæ rei jactura. Benedictus gravibus & sapientibus viris mandavit, ut re penitus exploratâ dicerent, quid fieri præstaret. Illi referebant plura esse, ex quibus ab omni specie mali hujusmodi ludus liberari vix poterat.

Et

Et quidem superiores Pontifices ante Innocentii XIII. tempora compluries diris pœnis lufores damnasse: a Sacris quoque Canonibus ludos omnes vetari, ne ab Ecclesiasticis viris exerceantur, in quibus casus ac temeritas valent, prout in urnæ ludo maximè valere compertum est. Nullum in eo industriæ, nullum honestæ arti locum, nullum ludendi finem; non enim ad moderatam animi relaxationem, sed ad cupidinem lucri videri compositum. Hunc itaque ludum ex Pontificis placito Romæ palam agi, ubi potior incolarum pars ex viris constat in sortem Domini vocatis: hunc in ditionis Pontificiæ provincias invehiri etiam in remotas illas montanasque regiones, quæ severam adhuc, & antiqui moris retinentes Italiam hætenus perniciem hanc ignoraverant, minimè probandum fore. His accedebat, quod nonnulli inconcessam hominibus scientiam futurorum, quæ a nulla naturali ac necessaria causa, sed a Dei tantum nutu, & liberâ actione pueri sortes extrahentis ex urna dependent, temerè tentantes non solum studium omne, cogitationemque vanis sortiendi artibus intendebant, sed quod humanis viribus assequi non poterant, tandem mali Dæmonis ope (cui nec huiusmodi scientia concessa

sa est) per nefas omne frustra impetrare conabantur . Et quamvis hæc , aliaque plura mala non ex natura ludi , sed ex hominum malitia manarent , illud certè ex ratione ludi sequebatur , quod sacræ leges solverentur , & quidquid ærario Principis , quidquid emolumenti conductoribus ludi obveniebat (quod sanè ingens & supra modum erat) cum subditorum detrimento conjungeretur . Pontifex his auditis , & ad sanctuarii pondus expensis , primò religiosis viris , tùm Clero & Populo gravibus propositis poenis illum interdixit , parvi faciens ærarii sui jacturam , quæ cæteròquin ad quinquaginta & amplius aureorum millia quotannis erat , omnia posthabenda ratus , ne subditis suis ulla damni pateret occasio , aut in Christianæ disciplinæ sanctimonia , aut in re familiari , & cum ad compescendas institutorum artes , lusorumque libidinem quælibet poena , quæ pecuniâ redimi posset , vix valere videretur , addidit etiam gravissimas Ecclesiæ censuras , a quibus nemo (ni foret in mortis articulo constitutus) ab ullo Sacerdotum esset absolvendus , nisi a Romano Pontifice . Verrumtamen cum vulgus hominum nitatur in vetitum semper , cupiatque negata , tantis adhibitis poenis adhuc ludendi libido non apud omnes

omnes extincta : idque vitio infirmitatis humanæ: atque indè factum est, ut Clemens XII. qui Benedictum in Pontificatu Romano excepit, ne per contemptum censurarum salus infirmorum prorsus desperaretur, hujusmodi ludi genus, aliis quoque urgentibus causis; Romæ dumtaxat rursus agi permisit; alibi enim ne a Pontificiis subditis agatur, immota manet Benedicti sententia, ut latius patet in sui Motu proprio.

XLVI. Mense Novembri ingentium laborum, quos in consecrandis Ecclesiis & Altaribus, atque in ordinandis Clericis, & Episcopis, aliisque Ecclesiæ Sacramentis ministrandis Pontifex Romæ subierat, minimè pertæsus, etiam extra Urbem operam suam desiderari non est passus. Francisco enim Mariæ Ruspolo Cerveteris Principi summis precibus petenti, ut novum Paroeciæ Templum in honorem Præsentationis Beatissimæ Virginis Mariæ in oppido Vignanello ditionis suæ consecraret, benignè annuit: nec morâ injectâ illuc se contulit, ubi Templum & Aram maximam consecravit, dum alii Præsules cætera novi Templi Altaria dedicarent.

XLVII. Inter hæc anno Jubilæi MDCCXXV. feliciter evoluta, præclaris adeò religionis ac

Vignanello Benedictus adit consecrandæ Ecclesiæ causa.

Anni Jubilæi finis.

L

pie-

pietatis tum exemplis, tum documentis Christiano populo datis, XXIV. Decembris Portam Sanctam in Vaticana Principis Apostolorum Basilica solemniter clausit, quam & in aliis Basilicis Cardinales Legati a Latere clauserunt, scilicet in Basilica Divi Pauli viâ Ostiensi Fabricius Paulutius Ostiensis ac Veliternus Episcopus, Sacri Collegii Decanus, & Urbis Vicarius; in Lateranensi Benedictus Pamphilius Archipresbyter, & in Liberiana Petrus Othobonus Archipresbyter, & S. R. E. Vice-Cancellarius.

1726

SS. Joannis &
Pauli sacra Li-
psana condita, &
alia initio anni
1726.

XLVIII. Nihil tamen elapso expiationis anno de pietatis operibus Pontifex remisit; nam sub finem Januarii MDCCXXVI. Sacra Lipsana Beatorum Martyrum Joannis & Pauli, quos Urfinæ Gentis fuisse ferunt, plumbeis loculis condita in Ecclesia ad eorum nomen & memoriam Romæ olim constructa, & a Fabricio Cardinali Paulutio eleganter instaurata, solemniter in porphyretica urna conclusit. Tunc cognoscendis absolvendisque Causis eorum, quibus Sacræ & Christianæ Apotheosis honor decernendus erat, operam dare, & Regulares Ordines ad sanctiorem veteris disciplinæ normam traducere. Fratribus enim Excalceatis Ordinis S. Augustini, ut ubique lo-

locorum Gregoriano cantu psallerent, & rotundo caputio uterentur: iisdem etiam, & Clericis Regularibus S. Pauli, ut barbam raderent, præscripsit. Præterea inhibuit, ne quis, inconsulto Romano Pontifice, è Religiosis claustris transfret ad alium quemcumque Ordinem, etiam si Hospitalarium, & Militarem, ubi claustralis observantia non vigeat. Decrevit quoque, ut qui ex monasticis, aliisque Regularibus Ordinibus ad Episcopatum assumuntur, si apud Ecclesias sibi commissas non commorentur, aut si illas dimittant, ad claustra Ordinis sui revertantur. Ut verò in Romana Curia, ad quam ex universo orbe causæ dirimendæ confluunt, justitiæ ordo adamussim servaretur, Visitatorem statuit unum ex Romanæ Ecclesiæ Cardinalibus singulis decenniis, ac primo loco provinciam hanc demandavit Vincentio Cardinali Petræ, inter amplissima munera diù in eadem Curia versato.

XLIX. Ad hæc Pontifex, qui Ecclesiis & Altaribus in Urbe dedicandis operam dabat, postquam Eruditorum judicio accepisset, Lateranensem Basilicam, aliàs a Summis Pontificibus, ac præsertim a Nicolao III. gentili suo, qui illam reparavit, exornavitque, conse-

Lateranensis Basilicæ consecratio.

cratam, post plures insequentibus temporibus, ac postremò ab Innocentio X. factas instaurationes, novâ consecratione indigere, die Dominicâ xxviii. Aprilis mdccxxvi. solemniter in honorem Sanctissimi Salvatoris, ac memoriam Sanctorum Joannis Baptistæ, & Joannis Evangelistæ solemniter dedicavit, unâ cum Ara Nativitatis Domini Nostri Jesu Christi, quam nuper ipse instaurari, & marmoreis cancellis muniri jusserat; & hæc quidem sexagesima supra trecentessimam Ecclesia fuit, sicut etiam quartum Altare fixum supra mccccxc. quæ hætenus Benedictus XIII. qua Archiepiscopus, & qua Romanus Pontifex sacraverat. Deinde multa aureorum millia contulit, ut hujus Lateranensis Basilicæ facta tecta servarentur.

Academis Theologicam Romæ
Benedictum fovet.

L. Academiam Theologicam, aliàs sub Clemente XI. operâ præsertim Raphaelis Cosmi de Hieronymis Florentini probatissimi in Romana Curia Præsulis Romæ cœptam, & ab eodem Pontifice Maximo Apostolicis literis firmatam, constituto ei loco in Archigymnasio Romanæ Sapientiæ, multisque gratiis attributis tum illis, qui exercitationibus ejusdem Academiæ operam darent, tum etiam Academiæ Censoribus, singulari amore

re ac benignitate respexit: Non solum enim quidquid Clemens indulserat, confirmavit, verum etiam ex Datariae emolumentis sibi obvenientibus mille aureos inter viginti Academicos distribuendos quotannis assignavit, & quod ad hujusmodi studia adeo necessaria in Urbe Religionis Magistra, fovenda ac promovenda plurimum contulit, placuit Pontifici Maximo hujusmodi Theologicas exercitationes aliquoties majestate sua in Quirinali, vel in Vaticano dignari.

LI. Interim cum Fabricius Cardinalis Paulutius Episcopus Ostiensis & Veliternus, Sacri Collegii Decanus Urbis Vicarius, vir laudatissimae famae, cujus opera veluti primario Administro, ac totius Regiminis a Secretis utebatur, è vivis excessisset, Pontifex vices suas in Urbe Prospero Cardinali Marefusco, quem Sacra Purpurâ donaverat, commisit, a Secretis verò Regiminis Nicolaum Mariam Lercarium Archiepiscopum Nazianzenum, Sacro Cubiculo Praefectum adhibuit, quem etiam meritò inter Sanctae Romanae Ecclesiae Cardinales mox adlegit. Mense Julio decedente Galeatio Cardinali Mariscotto Presbyterorum primo in summa ac bona senectute, qui totius Ordinis Praedicatorum apud Sedem

Fabricius Cardinalis Paulutius Urbis Vicarius, & primus Benedicti Administer mortuus 1726.

Prosper Cardinalis Marefuschus Urbis Vicarius.

Nicolaus Maria Lercarius a Secretis Regiminis.

Apo-

Benedictus protectionem Ordinis Prædicatorum suscipit.

Apostolicam Patrocinium gesserat, Pontifex ipse inclyti Ordinis, quem olim professus fuerat, & impensè semper amavit, protectionem suscepit.

Hyacintha Maris, una Beatarum Virginum albo inscribitur.

LII. Hyacintham Mariscottam Romanam Comitis Marci Antonii, & Octaviæ Ursinæ filiam, Monialem tertii Ordinis Sancti Francisci in Monasterio Sancti Bernardini Viterbii Beatarum Virginum albo VII. Augusti adscripsit: cujus rei solemnes ritus in Vaticana Basilica VII. Septembris ex liberalitate Francisci Mariæ Ruspoli Cerveteris Principis, & ejusdem Beatæ Hyacinthæ pronepotis, splendide celebrati sunt.

Lucensis Ecclesiæ Archiepiscopali titulo ornatur.

LIII. Ecclesiam Lucensem, multis olim a Romanis Pontificibus, & Cæsaribus privilegiis ornatam, Archiepiscopali titulo & honore decoravit, ac Bernardinum Guinifium ejusdem urbis Episcopum primum Archiepiscopum esse jussit. Ad Cæsenatem verò Ecclesiam, cui sex & quadraginta ab hinc annis Pastoralis præfuerat officio, oculos paternæ sollicitudinis convertens, Seminario Clericorum, novis attributis proventibus, ac rectæ Locorum piorum administrationi editâ XVIII. Kal. Septembris Constitutione, consuluit.

Cæsæne collata benedictio.

LIV. Interea parabantur omnia, quæ ad ritè

ritè celebrandam solemnem octo Beatorum Canonizationem necessaria erant. Is honor decernebatur Toribio Mogrovegio Archiepiscopo Limano in America, Jacobo Picenti Ordinis Fratrum Minorum S. Francisci, quos ab Observantia nuncupant, Agneti de Monte Politiano Virgini tertii Ordinis S. Dominici, Peregrino Latiofo Ordinis Servorum Beatæ Mariæ, Joanni a Cruce Carmelitæ Discalceato, Francisco Solano Ordinis Fratrum Minorum S. Francisci, Aloysio Gonzagæ, & Stanisla Koskæ è Societate Jesu. Itaque x. Decembris in Vaticana Principis Apostolorum Basilica Beatorum Toribii, Jacobi, & Agnetis Canonizatio a Summo Pontifice celebrata fuit; & Beatum quidem Toribium Sanctis Confessoribus Pontificibus, Jacobum Confessoribus non Pontificibus, & Agnetem Sanctis Virginibus adscripsit. Die xxvii. eodem ritu, ac in eadem Basilica secundam habuit Pontifex Canonizationem Beatorum Peregrini, Joannis, & Francisci, quos inter Sanctos Confessores non Pontifices retulit; ac denique extremâ Decembris die eundem honorem exhibuit Beatis Aloysio Gonzagæ, & Stanisla Koskæ è Societate Jesu, quos Sanctorum Confessorum non Pontificum albo inseruit, & Bea-

Canonizatio octo
Beatorum 1736.

Toribii

Jacobi Picentis

Agnetis de Monte
Politiano

Peregrini Latiofi

Joannis a Cruce

Francisci Solani

Aloysii Gonzagæ

Stanislai Koskæ.

S. Josephi cultus
auctus.

& Beatum quidem Aloysium Scholarum Societatis Jesu Patronum elegit. Priùs autem Sancti Josephi Beatissimæ Virginis Mariæ sponfi cultum ampliaverat; jusserat enim in Litaniis omnium Sanctorum, atque etiam in Litaniis brevibus, quæ pro commendatione animæ decedentis recitantur, post invocationem Sancti Joannis Baptistæ, Sanctum Josephum invocari, atque inde omnes Sanctos Patriarchas & Prophetas.

1727

Altaria consecrata in Basilica
Vaticana.

Liber Cæremonia-
lis Episcoporum a Benedicto
emendatus.

LV. Inter hæc pietatis opera annus MDCCXXVI. transigebatur, quibus & insequenti anno MDCCXXVII. Pontifex insistendum ratus primo Vaticanæ Basilicæ Altaria consecranda duxit, atque ibi unum supra viginti dicavit. Presbyteris Societatis Jesu, ut magnifico in Urbe Templo Divi Ignatii arcem & forum adjicerent, Romanum verò Clericorum Seminarium ædificiis ampliarent, indulgit. Sed, quod maximè mirabere Lector, Benedictus, qui ubi primum summi Apostolatûs apicem ascendit, de emendando, illustrando, atque etiam ampliando Cæremoniæ librum, quo utuntur Episcopi, cogitare cœperat, ipsemet inter ingentes labores & curas pro studio, quo ferebatur in Sacros Ritus, opus aggressus, adhibitis piis ac doctis viris,

viris, initio hujus anni perfecit, ediditque, ut ab omnibus servaretur. Porro nullus de hac re ipso certiùs decernere poterat, qui annis quinquaginta Episcopi & Metropolitæ munere perfunctus nil habuit antiquiùs, quàm ut Sacros Ritus secundum veterem, & laudabilem Romanæ Ecclesiæ disciplinam adamussum exhiberet. Ad hoc etiam studium referendum est, quod anno Jubilæi fontem regenerationis humanæ veteri ritu instauraverit in Basilica Vaticana.

LVI. Servaverat sibi Pontifex regimen Ecclesiæ Beneventanæ, quam amore nunquam interituro prosequabatur, Divum Leonem IX. & Alexandrum II. prædecessores suos imitatus, quorum primus Tullensem Ecclesiam, alter verò Lucensem, quibus in minoribus præerant, unà cum Romano Pontificatu tenuerunt. Decreverat etiam Pontifex in eadem Beneventana Ecclesia Coadjutorem sibi in spem futuræ successionis Nicolaum Cardinalem Cosciam; sed nihilominus, ut veteres clientes ac diocesanos suos præsens inviseret, & paternâ curâ solaretur, statuit ex Urbe Beneventum sese conferre causâ præsertim consecrandi Templum, quod voti reus ad nomen & memoriam Divi Philippi-Nerii

Benedictus Beneventum proticiscitur 1726. Acta in itinere, & in Civitate.

M

in

in ea civitate construxerat. Postquam itaque profectionem suam Cardinalibus in consueto Senatu significasset, XXIV. Martii modico comitatu Româ discessit, eoque die pervigilio Annuntiationis Beatæ Mariæ Virginis morem suum nihil cocti, & vix aliquid crudi in severioribus jejuniis sumendi, quamvis iter ageret, diligenter servavit, paucis castaneis & brevi aquâ contentus: ad majorem tamen abstinentiæ exercitationem interfuit mensis a Cardinali Lercario primo Benedicti Administro in Albano Familiaribus ejus splendide paratis, ut signo Crucis benediceret, ac Deo gratias ageret. Albano ad Portum Antium profectus, indè per agros Pontinis Paludibus proximos Tarracinam venit, ubi ex veteri Romanorum Pontificum iter agentium more, Sanctissima Eucharistia perpetuò in itinere ante eum deferenda ab uno ex Sacri Sacelli Ministris fuscipiebatur. Mox cum Regni Neapolitani fines attingeret, protinùs Pontifici occurrit Michael Fridericus Cardinalis ab Althan, qui regiâ potestate pro Cæsare Regno præerat, tùm suo, tùm Cæsaris nomine Pontificem veneratus, deindè regio cultu, ac liberalibus mensis, splendidoque apparatu præsto fuit, donec Pontifex in agri Beneventani

tani fines veniret . II. Aprilis Beneventum ingressus est summâ Cleri ac Populi lætitiâ , quem tamen obviam sibi procedere noluit , inhibuitque veræ humilitatis sensu , qui sibi parabantur , honores . Rectâ in Metropolitani Ecclesiâ , ubi Clerum allocutus ex Evangelii verbis : *Oves meæ vocem meam audiunt* , & quasi nil ex itinere fatigatus eodem die sub vesperam Peregrinorum Hospitium adivit , quibus post lotionem pedum in mensa ministravit , servavitque hunc morem reliquis diebus . Et cum Hebdomada major , & Paschales dies imminerent , temporis opportunitate usus est , ut largiùs pietatis operibus indulgeret . Præter enim ea , quæ his diebus unusquisque Episcopus ex Ecclesiæ ritu præstare solet , frequenter ad populum dicere , modò desiderium , quo desideraverat hoc Pascha manducare cum illis , modò ad religionis cultum & pietatis studia inflammare , modò discessum suum prænuntiare ex Evangelii verbis : *modicum & non videbitis me* , modò pueros in sacra Catechesi erudire , modò accurrentibus ex finitimis locis supplici Processione Fidelibus benedicere , modò Dioecesanos suos , & externos quoque benignè audire , & singulorum postulatis satisfacere , singulis ve-

rò Sabbatis de laudibus Marianis differere. Feria II. post Pascha Maffium Farsetum in Ravennatis Ecclesiæ Archiepiscopum solemni ritu ordinavit, novem secum cooperantibus Episcopis, Dignitatibus verò & Canonicis insulatis Metropolitanæ Ecclesiæ ministrantibus, & assistentibus, tradito etiam eidem Archiepiscopo Pallio. Feria IV. novam Ecclesiam Clericorum Regularium ministrantium Infirmis ad nomen & memoriam Divi Philippi Nerii consecravit. Dominica II. post Pascha tribus Abbatibus benedixit. Dominica IV. Templum in castro Padulii Beatæ Mariæ Virginis, & Sanctorum Joannis Baptistæ, ac Joannis Evangelistæ dicavit. Denique postquam Ecclesias omnes civitatis Beneventanæ lustrasset, ac magnæ pecuniæ vim in Templorum instaurationem, aliaque pietatis opera per civitatem ac Dioecesim dispersisset, desiderium sui Beneventanis fecit, apud quos in Arce civitatis rei monumentum Rizzardus Isolanus Gubernator posuit.

BENEDICTO XIII. PONT. MAX.
 QVOD VRBEM HANC OLIM INGENTI
 TERRÆMOTV PENE PROSTRATAM
 TEMPLIS IN ELEGANTIOREM FORMAM
 RESTITVTIS
 NOVISQVE EXCITATIS
 AQVIS PER IV. MILLIARIA PVRISSIMIS
 FONTIBVS DEDVCTIS
 ATQVE IN ARCEM DERIVATIS
 FELICI NVNC FAVSTOQVE ADVENTV
 BEATISSIMAM REDDIDERIT.
 LIBERALISSIMO AC PISSIMO PRINCIPI
 RIZZARDVS ISOLANVS GVBERN.
 P. C.
 ANNO DOMINI MDCCXXVII.

LVII. Discessit itaque XII. Maji, & cum
 ad agri Beneventani fines pervenisset non sine
 lacrymis pro sinceri amoris significatione tel-
 lurem illam maximè beatam, quia diuturnis
 Sanctissimi Pontificis laboribus culta adhuc
 ejus sudore manabat, osculatus, iterùm a Mi-
 chaele Friderico Cardinali ab Althan Nea-
 politani Regni Prorege exceptus, Capuam
 venit, cujus Ecclesiæ Canonicos a biennio mi-
 tris ornauerat. Illic aliquantulùm immoratus,
 ut primum Altare in Sacello Ærarii consecra-
 ret, & Nicolaum Cardinalem Caracciolum
 Ar-

Casimirus Eccle-
 siæ consecratio.

Archiepiscopum ægrotantem inviseret , ad Montem Casinum indè contendit , atque ibi XIX. Maji Casinensem Ecclesiam consecravit , habito ad populum sermone de ritu dedicandi Tempia , quem in triplici Mundi statu Naturæ , Legis scriptæ , & Gratiæ perpetuò servatum fuisse , luculenter ostendit , cooperantibus sibi eodem Cardinali Vaccienſi Episcopo , ac tribus ex Ordine Divi Benedicti , scilicet Nicolao Maria Tedeschio Archiepiscopo Apameæ , Angelo Maria Quirino Archiepiscopo Corcyrenſi , & Alphonſo Mariconda Episcopo Triventino , qui eodem tempore quatuor minores Templi Aras dedicarunt , aliis præterea ex eodem Ordine Prælatiſſis aſſiſtentibus , itaut ſeptem Archiepiscopi , Episcopi etiam ſeptem , ac totidem Abbates Ordinis S. Benedicti Congregationis Caſinenſis numerarentur . Extat rei memoria ad principem Templi portam .

CASINENSEM ECCLESIAM

QVAM FALSI NVMINIS FANO ARAQVE SVBVERSA S. PATEK
 BENEDICTVS ANNO DXXIX. VERO DEO DICAVERT, QVAM-
 QVE A LONGOBARDIS VASTANTIBVS EVERSAM A PETRO-
 NACE ABBATE RESTITVTAM, MOX SARACINIS INCENSAM
 A IOANNE ABBATE REFECTAM, ET A DESIDERIO ITIDEM
 ABBATE AMPLIORI GYRO CONSTRUCTAM ZACHARIAS P. P.
 ANNO DCCXLVIII. PRIMVM, ET ALEXANDER II. ANNO MLXXI.
 SECVNDO CONSECRAVERAT: TERRÆMOTV ANNI MCCCXLIX.
 PRORSVS DIRVTAM, ET VRBANI V. IVSSV IRECTAM, AC
 RVRSVS RVINA OBRVTAM, ATQVE A FVNDAMENTIS ANNO
 MDCXLIX. EXCITATAM, ET RECENS MAGNIFICENTIVS EX-
 ORNATAM BENEDICTVS XIII. P. M. ORD. PRÆDIC. ANNO
 MDCXXVII. DIE XIX. MAII SOLEMNI RITV TERTIO CON-
 SECRAVIT.

LVIII. Indè Aquinum venit patriam.
 Divi Thomæ Ordinis Prædicatorum, & An-
 gelici Ecclesiæ Doctoris ex Aquini Comiti-
 bus orti invisurus. Mox dimisso Cardinali
 ab Althan, qui eousque magno comitatu Pon-
 tificem deduxerat, in fines propriæ Ditionis
 venit, atque in Conventu Fratrum Excalcea-
 torum Ordinis S. Augustini propè Frosino-
 nem festum Ascensionis celebravit. Profedem
 deindè accessit, ac novâ inter abrupti montis
 saxa a Livio de Carolis Profedis Marchione
 apertâ viâ tenuit Setiam, ubi in Cathedrali
 Ecclesia constructum pretiosis marmoribus
 Al-

Benedictus Ro-
 man revestitur.

Altare Divi Philippi Nerii consecravit, & festum diem Sancti Philippi Nerii xxvi. Maji egit. Setiâ Cisternam, atque indè Velitras venit a Francisco Cardinali Barberino Episcopo exceptus, ac tandem xxviii. Maji Albano in Urbem feliciter redux intravit, postquam toto profectionis suæ tempore multa passim & ubique locorum religionis & charitatis exempla ac documenta dedisset: sed illud non omittendum, quod cum in veteri Latio nautam mysteriorum Christianæ fidei penitus ignarum deprehendisset, secum aliò duxit, ut erudiretur, designato etiam qui institueret.

Privilegia a Benedicto Ordini Prædicatorum aliisque indulta.

LIX. Interim Pontifex, ut gratum animum erga inclytum Ordinem suum Prædicatorum solemni aliquâ significatione, ac perenni in ævum monumento comprobaret, susceptique superiori anno uberem patrocinii fructum largiretur, omnia & singula privilegia a Prædecessoribus suis eidem Ordini liberaliter indulta confirmavit, ampliavitque editâ Constitutione Apostolicâ Setiæ vii. Kalendas Junii anno mdccxxvii. eâdemque liberalitate deindè erga plures Regulares Ordines usus eorum privilegiis Apostolicæ suæ confirmationis robur adjecit.

LX. At non levis illi cura ab ipso Pontifici-

tificatus initio de statu Ecclesiarum in ditione Pedemontana incumbibat; ibi enim exortis olim sub Innocentio XII. inter Sedem Apostolicam, & Regem Sardorum Pedemontis Principem dissidiis de Episcopatibus, aliisque Sacerdotiis conferendis, deque jurisdictione & immunitate Ecclesiastica, nondum res composita erat; ac interim decedentibus Episcopis, & Abbatibus ferè omnes illius regionis Ecclesiæ viduæ lugebant Pastores suos non sine gravi rei Ecclesiasticæ detrimento: & quamvis compluries tentatus compositionis modus, nondum controversiarum inveniebatur finis. Sed Pontifex, qui pro Religione ac sapientia sua nihil periculosius arbitrabatur, quàm Ecclesiarum viduitatem & luctum diutius protrahere, probatis ante iter Beneventanum nonnullis capitibus ac regulis, quibus ecclesiastica res contineretur, aliis verò, quæ objiciebantur, difficultatibus posthabitis, Romam regressus novos Episcopos & Abbates hoc anno Ecclesiis illis ac Monasteriis dedit, qui restituerent rem, & Christifidelium Gregem pastorali curâ custodirent, magno sanè religionis bono, quæ statim sub Episcopis, aliisque Præsulibus reflorescere cœpit.

LXI. Post excessum Francisci Farnesii

N

Par-

Clementis è Ducibus Bavariz in Archiepiscopum Coloniensem consecratio.

Viterbii acta a Benedicto.

Parmæ & Placentiæ Ducis, Antonium ejus fratrem beneficiario jure in clientelam, præstito fidelitatis juramento, recepit. Joannem Baz Principem Montis Libani reipublicæ causâ Romam venientem benignè habuit, & Christifidelibus ibi inter Barbaros degentibus paternâ curâ consuluit. Indè Clementem Augustum è Bavaria electum Archiepiscopum Coloniensem, eundemque Monasteriensem, & Paderbornensem Episcopum, Sacri Romani Imperii Principem Electorem, qui unâ cum Violante Beatrice a Bavaria magnâ Hettruriæ Principe ejus amitâ (quam superiori anno Summus Pontifex insignis pietatis ac virtutis amore aureâ Rosâ donaverat) Romam petebat, ut a Benedicto consecrationis munus acciperet, Viterbii jussit consistere: mens enim ipsi fuit, non omnia Romæ danda, sed pontificiis actionibus veterum Pontificum more alias quoquè civitates decorare. Propterea Viterbium proficiscitur, ubi in Ecclesia S. Mariæ de Quercu Ordinis Prædicatorum x. Novembris Francisco Antonio Finio olim Episcopo Abellini, tunc Archiepiscopo Damasceno, & Sacri Cubiculi Præfecto, quem mox non tam ex veteri familiaritate & gratia, operaque præstita in Diocesanis ac Provincialibus Bene-

neventi Synodis , quàm in Romana , additis novis in Sedem Apostolicam meritis inter S. R. E. Cardinales retulit , Massèo Farsetto Ravennati , & Joanne Baptista Gambarucio Amaseno Archiepiscopis , necnon Adriano Sermatthæjo Viterbiensi , & Nicolao Xaverio Santamaria Cyrenensi Episcopis cooperantibus , præsentibus etiam Cathedralis Ecclesiæ Canonicis , quos non ità pridem sacris infulis ornaverant , Colonensem Archiepiscopum consecravit . Sequenti die in Ecclesia Monialium S. Bernardini , ubi conditæ sunt mortales exuviæ Hyacinthæ Mariscottæ , quam Pontifex superiori anno Beatam appellaverat , ad nomen & memoriam ejusdem Aram dicavit , multa de laudibus Galeatii Cardinalis Mariscotti ejusdem Beatæ Virginis nepotis prolocutus , dotemque statuit , ut perpetuò ter in annum ibidem Sacrum fieret , semel die obitus Clementis X. a quo & ipse Pontifex , & idem Cardinalis Mariscottus sacrâ Purpurâ donati fuerant , semel die Promotionis ejusdem Cardinalis ; ac denique semel anniversario die , quo Cardinalis Mariscottus è vivis excessit . Tunc Romam reversus .

LXII. Tot autem suscepti labores , facræque actiones , quas ferè quotidie Pontifex

Decreta Benedicti pro Missionibus Orientalibus , & acta in Imperio Sinarum .

obibat, nihil detrahebant de sollicitudine omnium Ecclesiarum, etiam quæ immensi terrarum spatio ab Italia ac tota Europa sejunctæ in Indiis Orientalibus sitæ sunt. Nam postquam Carolus Thomas Turnonius Patriarcha Antiochenus cum potestate Legati de Latere Apostolicus Visitator, ac deinde S. R. E. Cardinalis, Pudicherii anno MDCCIV. multa sapienter decrevisset de abolendis superstitionibus, quæ inter novos Christianifideles in Regnis Madurensi, Mayssurenfi, & Carnatensi, veluti zizania inter electi frumenti spicas, succrescebant, quæque hætenus Evangelici Operarii, cæteroquin impigri ac strenui, evellere non poterant, licet Clemens XI. datis anno MDCCXII. literis ad Meliaporensis Episcopum, mentem suam de servandis Apostolici Visitatoris decretis opportunè declarasset, nihilominus Benedictus XII. Decembris MDCCXXVII. novis literis ad Episcopos omnes, & Apostolicos Missionarios iisdem in Regnis Fidei propagationi operam dantes, apertius decreta ipsa confirmavit, mandavitque diligenter servari & impleri; potissimum illis commendans, ne vilis conditionis homines, Parreas vocant, a quibus tradito Gentibus more cæteri vehementer abhorrent, negli-

gligerent, sed iis quoque Sacramenta ministrarent, & morti proximis cætera Christianæ pietatis officia exhiberent, cum apud Deum nulla sit personarum acceptio, nulla inter servum & liberum distinctio. Præterea Benedictus ab Imperatore Sinarum epistolas ac dona accepit, & quod ipsi jucundissimum fuit, libertatem Præconum Evangelii consecutus est, qui cum in amplissimis illis Provinciis Domini Nostri Jesu Christi fidem annunciarent, apud Imperatorem accusati in vincula fuerant coniecti.

LXIII. Novum annum MDCCXXVIII. a cultu sacratissimi Nominis Domini Nostri Jesu Christi, quod est super omne nomen, feliciter auspicatus, Indulgentias, quas olim Sixtus V. largitus fuerat, restituit, confirmavitque omnibus Christifidelibus, qui ejusdem sacratissimi Nominis interpositâ invocatione invicem sese salutarent. Virgines Sanctimoniales in Monasterio Divi Ambrosii Ordinis Sancti Benedicti Congregationis Casinensis degentes, ubi olim paternam ejusdem Sanctissimi Archiepiscopi & Ecclesiæ Doctoris domum fuisse ferunt, eamque incoluisse Beatam Marcellinam Divi Ambrosii sororem, quæ virginitatis velum a S. Liberio Romano Pon-

1728

Jesu nominis cultus.

Consecratio Virginum in Monasterio Divi Ambrosii.

Pontifice accepit, feria III. post Dominicam in Albis benedixit, atque sacrauit, ut veteres Ecclesiæ ritus de benedictione & consecratione Virginum, quorum in ipsa Urbe veluti in principe Religionis loco frequentiore usum esse decet, restitueret; addiditque plenariam omnium peccatorum remissionem atque indulgentiam Monialibus cujuscumque Ordinis eo die acquirendam, quo perpetuis futuris temporibus ubique terrarum a proprio Antifite sacrum velum susciperent, ac statim ritibus benedicerentur & consecrarentur. Cultum Beati Serapionis Martyris ex Ordine Beatæ Mariæ de Mercede Redemptionis Captivorum confirmavit. Beatæ Margaritæ a Cortona (ubi ejus corpus incorruptum & suavem spirans odorem conquiescit) nuncupatæ Tertii Ordinis S. Francisci, quæ asperis ac diuturnis pœnitentiæ operibus peccata diluerat, Dominicâ Pentecostes, quæ in XVI. Maji incidit, in Vaticano Templo solemniter Christianæ Apotheoseos honores decrevit. Mox XXIV. ejusdem mensis Fratrem Joannem de Prado Ordinis Minorum Excalceatorum de Observantia Sancti Francisci Beatis Martyribus adscripsit. Ordini verò Excalceatorum Beatæ Mariæ de Mercede Redemptionis

B. Serapionis
cultus.

Canonizatio Be-
atæ Margaritæ a
Cortona.

Joannes de Prado
Beatis Martyri-
bus adscriptus.

ptionis Captivorum , qui proprio Templo in Urbe carebant , Ecclesiam unà cum Parœcia S. Mariæ in Monterone dedit . De identitate Corporis Divi Augustini eximii Ecclesiæ Doctoris Papiæ conditi jussit inquiri , datis literis Papiensi Episcopo , ac duorum tantum mensium induciis , quibus judicium conficere-
tur , ne per infinitas lambages ac disputationes res longiùs iret . His literis Benedictus *Augustinum in profitenda Prædicatorum regula Parentem , in Theologico curriculo ducem , in pastoralis ministerio , cunctisque vitæ rationibus Patronum suum nuncupavit .* Episcopus , multis adhibitis consultationibus , rem diligentissimè exploravit , ac tandem in comperto habuit , illa esse Beati Doctoris sacra Lipsana , quæ Papiæ in Ecclesia Divi Petri in Cœlo aureo aservantur , ubi Luitprandus Longobardorum Rex è Saracenorum manibus magno pretio redempta , olim condiderat .

Divi Augustini
sacra Lipsana .

LXIV. Abrogaverat Clemens XI. Legationis Apostolicæ jus , quod in Regno Siciliae ultra Pharum tamquàm Regiæ dignitati conjunctum ad obitum usquæ Caroli II. Hispaniarum ac utriusque Siciliae Regis sex sæculorum decursu viguerat . Causa abrogationis præsertim ea fuit , quod nonnulli hujus
po-

Legationis Apostolicæ jus Regi Siciliae à Benedicto redditum , contractum tamen ac moderatum .

potestatis, Monarchiam vocant, Administri Apostolicæ Legationis exceſſerant modum: Propterea Clemens novam inierat viam ac methodum Eccleſiaſticas Cauſas in Regno Siciliæ ultra Pharum tranſigendi, quæ tamen cum utentium moribus non ſatis reciperetur, & ex hac Apoſtolici privilegii jactura Sacerdotium & Imperium non rectè convenirent, Benedictus XIII. non ab re eſſe duxit, ut pacem & tranquillitatem in eo Regno perpetuò firmaret, Siculorum etiam commodis conſuleret, Apoſtolicæ Legationis juſ Carolo VI. in Romanorum Imperatorem electo, utriuſque Siciliæ Regi, ac multis & inſignibus nominibus de Apoſtolica Sede, ac univerſa Chriſtiana Republica optimè merito, in Regno Siciliæ ultra Pharum, ſublatis abrogationis cauſis, permittere. Primò enim Potestatis uſum contraxit, & quæ olim nullis ferè circumſcripta legibus, nullis incluſa finibus agere videbatur, ad juſis & rationis modum æquè ac ſapienter revocavit, editis Apoſtolicis literis III. Kal. Septembris anno MDCCXXVIII.

Ronciloni Civitatis juſ, Fabiano Cathedra Episcopalis datur.

LXV. Hæc in Sicilia. In Italia verò oppidum Roncilionis in Faliscis populo frequens & amplum, civitatis nomine ac juſe donavit: novam tamen civitatem Cathedræ Sutrinæ sub-

subjectam esse voluit, cujus Dioecesis erat. Sed oppidum Fabriani in Piceno Camerinen-
 sis Dioecesis, Templorum splendore, sacris
 Lipsanis Divi Romualdi Camaldulensium
 Monachorum Parentis, ac Divi Silvestri Sil-
 vestrinorum Monachorum Authoris, incola-
 rum quoque frequentia ac opibus insigne, in
 civitatem, ac Divi Venantii Ecclesiam, ubi
 praeipuum Canoniconum Collegium, in Ca-
 thedralem, quam Camerinenſi perpetuo con-
 junctam fore decrevit, erexit. Romae vete-
 rem Ecclesiam ac Coenobium S. Sixti, ubi
 Divus Dominicus inclyti Ordinis Praedicatorum
 Institutor diu fuerat commoratus, ma-
 gnis sumptibus instauravit & auxit. Xenodo-
 chium quoque, quod ad curandam valetu-
 dinem eorum, qui mentis infania laborant,
 angusto loco in Foro Columnae extructum
 erat, ad opportuniorem & ampliorem sedem
 apte constructam tranſtulit propè magnum
 Valetudinarium S. Spiritus in Saxia, cui &
 hoc conjunxit, ut pium adeo charitatis offi-
 cium fructuosius ac diligentissime mente la-
 borantibus exhiberetur: ac in Palatio suo
 Praefecti munus, quod Camillus Cybo Pa-
 triarcha Constantinopolitanus gerebat, red-
 dita in Familiares Pontificios jurisdictione,

Coenobium San-
 cti Sixti instau-
 ratum, & Xenodo-
 chium amenitum
 transfertur. Ju-
 risdictio Praefecti
 Palatii. Mensa
 Capituli Vaticani
 aere alieno li-
 beratur.

O

quam

quam cunctarum ferè Gentium more hujusmodi Præfecti obtinent, novis privilegiis munivit. In Basilica verò Vaticana cum Mensa Capitularis frequentibus rei agrariæ jacturis attrita, grande æs alienum paulatim contraxisset, ingenti pecuniæ vi attributa Benedictus penitus dissolvit, ne Clerus illius Basilicæ consuetis stipendiis carere cogeretur, neque divinus cultus ibi languesceret, ubi summo perè vigeat, oportet. Canonici Benedicto statutam ex ære eleganter ornatam, & annuis prò eo sacrificiis statutis, accepti beneficii monumentum in Vestuario Basilicæ posuere addito titulo.

BENEDICTO XIII. PONT. MAX. VRSINO
 ORDINIS PRÆDICATORVM
 QVOD BENEFICIENTIAM
 NICOLAI III. ALIORVMQVE GENTILIVM SVORVM
 ERGA VATICANAM BASILICAM ÆMVLATVS
 MAGNVM ÆS ALIENVM
 OE RENOVATAS PER PLVRES ANNOS
 REI AGRARIÆ CALAMITATES
 A MENSA CVPITVLARI CONTRACTVM
 VNO DIE PONTIFICIA LIBERALITATE
 DISSOLVERIT
 CAPITVLVM ET GANONICI
 ANNIVERSARIIS PRO EO SACRIS
 IN PERPETVVM CONSTITVTIS
 GRATI ANIMI MONVMENTVM POSVERE
 ANNO DOMINI MDCCXXVIII.

LXVI. At

LXVI. At in Galliis major Benedicti cura ac sollicitudo. Ibi enim Constitutioni Clementis XI. *Unigenitus*, qua liber Considerationum moralium Paschasii Quesnelii, ac una supra centum ex eo excerptæ propositiones proscriptæ fuerant, nondum ubique nec ab omnibus paritum erat. Pontifex vix ad universæ Ecclesiæ clavum ac regimen admotus potissimam curam, & officia omnia eo intenderat, ut Ludovicus Antonius Cardinalis de Noailles Archiepiscopus Parisiensis, in cujus nomine & autoritate dissensionis suæ præsidium posuerant pervicaces, tandem cum Romana Ecclesia palàm sentiret ac loqueretur, & in Regia Lutetiæ Parisiorum urbe Apostolica reciperetur Constitutio sincerâ & simplici fide. Magnam eidem Constitutioni Refractorii conflagrant invidiam, quod perperam assererent, editisque libellis in vulgum spargerent, inconcussa ac tutissima Sanctorum Augustini, & Thomæ dogmata eadem Constitutione convelli, quorum calumnias rejecerat Pontifex, datis VI. Novembris anno MDCCXXIV. literis ad universos Fratres Ordinis Prædicatorum, quibus Thomisticæ Scholæ doctrinam, ac præsertim de Gratia per se & ab intrinseco efficaci, & gratuitâ prædestinatione ad glo-

Ludovicus Cardinalis de Noailles Archiepiscopus Parisiensis Constitutionem *Unigenitus* simpliciter & absolute recipit.

Divi Thomæ doctrina de Gratia a Benedicto laudatur.

riam sine ulla prævisione meritorum laudaverat, & Apostolicæ vocis extulerat præconio, Prædecessores suos imitatus, qui Anglicam Divi Thomæ doctrinam summis laudibus fuerant profecuti. Tantum enim aberat, ut Refractarii quidquam possent ex summis Ecclesiæ Doctöribus Augustino, & Thoma ad erroris sui tutelam afferre, quin potius horum autoritate novus ipse error, sicut & veteres hæreses apertè impugnarentur, & Catholica veritas illustraretur. Plurimum hæ literæ contulerunt tum ad confirmandos in Galliis eos, qui benè sentiebant, cum etiam ad erigendos illos, qui dubiæ potius mentis ambiguitate, quàm ingenii perviciaciâ cunctabantur adhuc & hærebant, ne Apostolicæ Constitutioni debitam profiterentur obedientiam. Interim Cardinalis de Noailles frequenter a Summo Pontifice de officio suo admonebatur, nec ille paternis monitis surdas præbere aures, sed libenter excipere, ac diù coram Christo Domino meditari, quomodo & Pontificis Maximi, & Ecclesiæ universæ votis faceret satis. Inveterata enim causa erat, multisque implicata difficultatibus, præsertim ex Pastoralis documento, quod anno MDCCXIX. ipse Cardinalis Archiepiscopus ediderat, quo
Apo-

Apostolica Constitutio in eam detorquebatur sententiam, quam Clemens XI. probandam non putavit. Nec facile poterant in frequentissima totius Europæ urbe, amplissimaque Diœcesi dissidentium ingeniorum æstus componi, exasperatique diuturnis colluctationibus animi ad concordiam & pacem revocari, ut idem omnes sentirent. Vicit tamen veritatis amor; hōc enim Cardinalis de Noailles incensus, Christo inspirante, sapientissimum coepit consilium, datisque ad Summum Pontificem literis, palam professus est, se absolutè & simpliciter Constitutionem *Unigenitus* sincero obsequio, ac debitâ reverentiâ suscipere: librum Considerationum moralium, ac centum & unam propositiones ab eo excerptas eodem modo, & sub eisdem censuris in eadem Constitutione expressis rejicere: & insuper documentum Pastorale, quod anno MDCCXIX. ediderat, ac cætera omnia, quæ hac de causâ ejus nomine prodierant, corde & animo retractare. Neque id his tantum literis præstitit, sed etiam Pastoralis Edicto, quod in Regia urbe proposuit, & per universam Diœcesim vulgavit, ut omnes pari secum fide & religione Apostolicæ Constitutioni obsequerentur. Plenissimis paterni amoris significationibus

oc-

occurrit Benedictus Cardinali atque Archiepiscopo amplissimo, quem quadam temporis procellâ a se divulgum vehementer dolebat, diù expectatam obedientiæ victoriam ei ex animo gratulatus. In Senatu habito VIII. Novembris MDCCXXVIII. gaudium suum Cardinalibus commune fecit: retulit quoquè totius rei seriem, ac sinceræ obedientiæ sensus, quos insignis eorum Collega aperuerat. Is paternæ longanimitatis ac vigilantiae optatissimus fructus meritò cæteris a Benedicto XIII. hoc anno præclarè gestis coronidem ponit: tali enim pacto causa omnium tempestate nostrâ gravissima transacta fuit, quæ post editam a Clemente XI. anno MDCCXII. Constitutionem *Unigenitus* sexdecim integris annis innumeras Apostolicæ Sedi molestias, & assiduam iniecerat sollicitudinem.

In Polonia Benedictus Apostolicam auctoritatem tuctur.

LXVII. Verumtamen ex Polonia non levis Benedicto molestia. Vincentius Santinius Archiepiscopus Trapezuntinus Nuntius Apostolicus quamvis ingenii, ac prudentiæ laude floreret, tamen apud Ordines Regni graviter offenderat; atque indè factum est, ut in Comitibus Grodnensibus mense Octobri MDCCXXVI. novella lex sanciretur, Nuntio, & jurisdictioni Apostolicæ injuriosa, additis dein-

deindè mense Novembri quinque Articulis , quibus ne quis apud Nuntium Apostolicum causam diceret , aut ejus censuras promulgarer , atrocibus interjectis poenis , cavebatur . Multa Benedictus egerat ad conciliandos animos , & propulsandam injuriam non solum literis , & officiis apud Regem , & Rempublicam , sed etiam ablegato extra ordinem in Poloniam Camillo Paulutio Archiepiscopo Iconii Nuntio Apostolico . Monita Pontificis pium Regis animum permoverunt , ut Ordines a præfatæ legis executione temperarent , non tamen ut acta rescinderent ; quapropter Benedictus ne Apostolica authoritas , & Ecclesiastica libertas detrimenti quidquam acciperent , gravi , & præclarâ editâ Constitutione xxv. Septembris novellam legem damnavit , & quæ indè acta fuerant , abolevit .

LXVIII. In Natalitiis Servatoris Nostri pietas ac religio Benedicti summoperè enituit , nam totam Nativitatis noctem inter sacras actiones insomnis transegit , Divinisque Officiis in Sacello Sixtino celebratis ad alterum Divi Pii secessit , ubi consecrationem Vincentii Antonii Muscettolæ , quem Benedicto Bussio immaturâ morte sublato in Episcopatu Recineti & Laureti suffecerat , peregit .

Acta in Natalitiis
D. N. 1728.

git. In festo S. Joannis Evangelistæ post solemnia habita in Vaticano ad Lateranum migravit, ubi per aliquot dies commoratus Altaria plura Lateranensis Basilicæ, novumque Sacellum, quod in eadem Basilica erexerat in memoriam Dormitionis Beatæ Virginis Mariæ, ac SS. Dominici & Philippi Nerii dicavit.

1729

Agricolæ Benedi-
dicti liberalitatem
sentiant.

LXIX. Pluvium Cœlum initia novi anni MDCCXXIX. fecdaverat, itaut agricolæ, qui ex variis regionibus Romam confluerant Romani agri colendi causâ, otio & fame languescerent, quibus Benedicti liberalitas præstò fuit, affatim pane ex annonâ Urbis in plures dies inter agricolas distributo, donec, cessantibus pluviis, iisdem liceret ad agrorum culturam redire.

B. Joannis Nepo-
muceni Canoniza-
tio.

LXX. Interim agebatur de referendo inter Sanctos Martyres B. Joanne Nepomuceno, olim Pragensis Ecclesiæ in Bohemia Canonico, atque etiam de Fratre Fideli a Sigmaringa Svevo Ordinis Minorum Divi Francisci, quos Cappucinos vocant, Missionum Apostolicarum in Rhætia Præfecto, in quibus anno MDCXXII. Martyrii palmam accepit, Beatorum titulis ornando, & quidem XIX. Martii cum Divi Josephi Beatissimæ Virginis Mariæ sponsi festa coluntur, in Basilica Lateranensi ele-

Fr. Fidelis a Sig-
maringa Beatifi-
cacio.

eleganter ornata Benedictus Beatum Joannem Nepomucenum canoni Sanctorum Martyrum inferuit: & jura, quæ ex hujusmodi causis Romanis Pontificibus pendi solent, ut inde Altaria duo in eadem Basilica erigerentur, alterum in memoriam Divi Barbatì Archiepiscopi Beneventani, alterum verò in memoriam ejusdem Sancti Joannis Nepomuceni, attribuit. Indulfit deinde, ut in eadem Basilica xxiv. Martii solemnia Beati Fidelis a Sigma-
ringa agerentur.

LXXI. Sed Ecclesiæ Beneventanæ sollicitudo Benedictum urgebat, ut iter illuc repeteret tertium Provinciale Concilium celebraturus: duo enim ante Pontificatum Romanum Beneventi coegerat. Româ discessit xxviii. Martii post habitum Consistorium, in quo Camillum Cybo ex Ducibus Massæ & Carariæ, Patriarcham Constantinopolitanum, Apostolico Palatio Præfectum, quem S. R. E. Presbyterum Cardinalem prænuntiaverat, purpureo Galero ornavit. Marinum primò profectus, inde Velitras, atque Cisternam, tum Privernum, & per Monasterium Fossanovæ Tarracinam; Kalendis verò Aprilis in fines Regni Neapolitani devenit.

Benedictus Beneventum secundo proficiscitur.

LXXII. Romani sanè hujusmodi disces-
P sum

Romani discessum Pontificis dolent.

sum Pontificis sui ægrè tulerunt, graviter
questi, eum, qui ob senium jam ad occasum
vergebat, Româ abire, fortè non reversum.
Sed quot priscos inter Romanos Pontifices
hujusmodi itinera etiam in summa senectute
frequentarunt aut ex privata, aut ex publica
causa? & sanè non solùm Ecclesiæ Beneven-
tanæ, sed & Christianæ Reipublicæ intererat,
ne Benedictus Urbe concluderetur, cujus vita
norma vivendi Episcopis præsertim erat. Pa-
storalis enim officii actiones Romæ dumtaxat
expletæ segniùs irritassent aliorum animos
demissæ per aures, quam fidelibus oculis va-
riis in locis subjectæ. Illud memoria dignum,
quod licèt adversante aurâ Pontifex Româ di-
scesserit, serenum tamen cœlum expertus est,
ac postremâ itineris die, cum pluvia ingru-
ret, Benedictus factò signo Crucis, & Fami-
liaribus benè sperare jussis, pluviam ad quin-
quaginta retrò passus arcere visus, itaut cum
omni comitatu a pluvia prorsus intacto quin-
tâ Aprilis, quæ in feriam tertiam ante Domi-
nicam Palmarum incidit, Beneventum tenu-
rit, quò etiam S. R. E. Cardinales Nicolaus
Coscia, & Franciscus Antonius Finius accef-
serunt, ubi inter pietatis ac religionis opera
reliquum tempus, ac insequentem Majorem
Hebdo-

Hebdomadam transegit . Res planè hominum admiratione dignissima , quod cuncta , quæ vix florente ætate Episcopi in suis Ecclesiis eo tempore explere solent , aliaque plura , quæ Episcopi agere non solent , ipse jam octogenarius in Ecclesia Beneventana præstaret , in qua frequenter etiam ad populum dixit . Sed & in Paschalibus festis , totoque tempore , quo Beneventi mansit , quot labores suscepit ? quot præclara edidit pastoralis vigilantia ? quot liberalitatis exempla ? Non tamen legationes Principum , & Sedis Apostolicæ negotia , ne quid moræ indè acciperent , intermittere consuevit .

LXXIII. Mense Majo Concilium Provinciale in Metropolitana Ecclesia Beneventana celebravit , convenientibus illuc non solum Provinciæ Episcopis , sed & aliis ex diversis regionibus Prælatis , tùm ut Benedictum inviserent ac venerarentur , tùm ut insolitam actionem susciperent , inter quos Mondillus Urfinus ejus ex fratre nepos , quem diù inter Presbyteros Congregationis Oratorii Divi Philippi Nerii Neapoli versatum ex Episcopatu Melphis & Rapollæ ad Archiepiscopatum Capuanum superiori anno MDCCXXVIII. transtulerat , & nuper Constantinopolitanæ

Concilium Provinciale Beneventi cogit .

Mondillus Urfinus Archiepiscopus Capuanus .

Ecclesiæ titulo decoraverat. Ego quoquē ibi fui, qui Firmo discefferam, ut sacra Apostolorum limina Romæ visitarem. Benedictus summæ benignitatis officiis excipere Præfules, ad mensam in communi coenaculo adhibere, splendide quidem ad sobrietatem, parcè ad luxum paratam, & de re Ecclesiastica Provinciæ illius prudenter statuere: Nepotem, verò hortari, ut quæ ipse in Archiepiscopatu Beneventano præstiterat, ageret ille in Capuano. Expletis Concilii Sessionibus Ecclesiam Sancti Bartholomæi Apostoli, quam a secundo Terremotu iterum everfam, rursus a fundamentis elegantius restituerat, solemni ritu dicavit, & quæ pro sacris ejusdem Apostoli Lipsanis ex veteribus illius Ecclesiæ monumentis habentur, in porphyretica urnâ olim conclusa, sub Aram maximam collocavit.

Benedictus Romam revertitur.

LXXIV. Ad finem mensis Benevento discessit viam repetens Romam versus eodem itinere. Substitit per aliquot dies Albani in ædibus, quas ibi magnificè construxerat, & eleganter ornaverat Nicolaus Maria Lercarius S. R. E. Cardinalis, Benedicti primus Administer, & a Secretis Regiminis, qui Velitras usque Summo Pontifici obviam venerat, qua
in

in civitate Benedictus nuntium accepit de obitu Gregorii Sellari S. R. E. Presbyteri Cardinalis, quem ex Ordine Fratrum Prædicatorum superiori anno ad hanc dignitatem evehxerat: indè Romam regressus, ubi in Basilica Liberiana, ad quam primò grates acturus Deo de incolumi ac prospero itinere descendit, a Sacro Cardinalium Collegio, & Romano Senatu honorificè exceptus.

LXXV. At non levis Benedicto cura, Captivi a Benedicto redempti. quod sub tempus itineris sui Beneventum versus barbari Piratæ ad Montem Circejum plures Pontificiæ Ditionis Familias interceptissent, & in miseram adduxissent servitutem. De redimendis igitur Captivis tantus ei ardor incessit, ut neque studiis, neque officiis, sed nec pecuniæ parceret, cum redemptionis opus maturaret, votique compos factus est: siquidem sub Autumnum ejusdem anni Captivos omnes è Barbarorum servitute redemptos libertati, ac patriæ restituit.

LXXVI. Mense sextili balneis in Vaticano usus, quibus ipse quotannis uti consueverat, sed corporis viribus sensim deficientibus nihil a laboribus temperabat: eadem in sacris actionibus, eadem in audiendis singulis, eadem in expediendis Sedis Apostolicæ negotiis,

Vincentii a Paulo
Beatificatio.

tiis, atque iis maximè, quæ religionem spectabant, sedulitas; nam ut Vincentius a Paulo Presbyter Gallus, Institutor Congregationis Missionis, necnon Matronarum & Puellarum Charitatis, inter Beatos Confessores haberetur, indulgit, cujus rei solemnitas XXI. Augusti in Vaticana Basilica peracta est; & mense Septembri in Nativitate Beatissimæ Virginis Mariæ, in Ecclesia ejusdem Beatæ Mariæ *de Populo* nuncupata, post celebrationem privati Sacri, Beatæ Julianæ de Falconeriis Ordinis Servorum Mariæ Canonizationem, & VI. Octobris Ven. Servo Dei Petro Forierio Canonico Regulari Sancti Augustini Congregationis Lotharingicæ Beatorum titulos decrevit.

B. Julianæ de Falconeriis
Canonizatio.

Petri Forierii
Beatificatio.

Secessus ad Montem
Matium.

LXXVII. Secessit deindè ad Montem Marium propè Urbem, prout illi in autumnalibus feriis mos erat, in parvo Monasterio Ordinis Prædicatorum diversatus, ubi tamen, cum Deo vacaret, sacras actiones, si occasio ferret, alacriter amplectebatur. Kalendis Novembris in Urbem descendens non solum consueta solemnia dierum illorum peregit, sed & in generali quatuor Temporum Ordinatione mensis Decembris centum & amplius viros diversis Ordinibus initiavit, & in Nat-

talitiis Servatoris nostri, quæ festa Benedicto in terris postrema fuerunt, Familiarium suorum industriâ factum est, ne consecratione aliqujus Episcopi eâ nocte detineretur: cætera enim præstare non destitit, quamvis fractis viribus & ægro corpore vix laborem sustineret.

LXXVIII. Inter plures Divos, quorum Officia ad Canonicas Horas recitanda Benedictus ordinaverat, meritò rationem habuit Sancti Gregorii VII. Romani Pontificis, cujus doctrinam & fortitudinem animi, summosque labores pro vindicanda Ecclesiastica libertate gravissimi Scriptores sæculi XI. testantur, & Beatus Petrus Damiani eum adhuc Cardinalem sanctissimi & purissimi consilii virum appellat. Cum autem in lectionibus recitandis aliqua inserta reperirentur ex iis, quæ Gregorius statuit contra conatus Henrici Imperatoris in Ecclesiam, graviter id acceptum est ab aliquibus Principibus, porro non ab omnibus; plures enim publicè edi lectiones illas in ditionibus suis mandarunt. At Benedicto immotum fixumque fuit, ne vindicata a Divo Gregorio VII. Ecclesiæ libertas silentio involveretur, objecitque Apostolicas Constitutiones iis, qui contra moliebantur, mansit pro-

D. Gregorii VII.
lectiones Benedi-
ctus tuctur.

propterea Gregorio cultus & honor æquè ac Benedicto pro gloria Prædecessoris zelus, animique constantia.

Consilia de Parma & Placentia.

LXXIX. Verùm inter summos Principes vehementer agebatur de transferendo in Italiam Carolo Regis Hispaniarum ex secundis nuptiis filio primogenito, cui Farnesiæ, & Mediceæ Domûs successio ex conditionibus pacis initæ anno Jubilæi adjudicabatur; at cum Parmam & Placentiam beneficiario jure a Sede Apostolica Farnesii tenerent, non levis indè Benedicto injecta est sollicitudo, ne quid juribus Sedis Apostolicæ iniquum fieret, neve nobilissima illa Romanæ Ecclesiæ Feuda ab exteris militibus occuparentur, multis in eam sententiam euntibus, quæ Benedicto quoquè probabatur, ut præsidium militum Ecclesiæ Romanæ civitatibus illis imponeretur, aliis contra sentientibus rem discriminis plenam, nec sine gravi sumptu perficiendam fore.

1730

Benedictus nil infalubritate aeris commotus religionis ac pietatis operibus insistentem agrotat, ac moritur 1730.

LXXX. Interea multis in regionibus Italiæ, ac Romæ præsertim ex diuturna ac nimia præcedentis Æstatis, atque Autumnii siccitudine, ut Medici rectè existimabant, quædam suborta est infalubritas aeris, quæ graves ac vitiosos gignebat pituitæ fluxus (catarrhos vocant) senibus exitiales. At Benedictus nil pla-

planè sibi temperabat , nam XII. Februarii in Dominica Sexagesimæ Ildephonsum de-Tufo Monachum Olivetanum in Episcopum Hieracii in ora Calabriae consecravit , atque hic postremus fuit Episcoporum omnium , qui tali honore dignati sunt . Deindè cum Marcus Antonius Cardinalis Ansideus extremum diem obiisset , Benedictus funeris exequiis in Templo Divi Augustini xv. Februarii adesse voluit , quo pietatis officio cæteros S. R. E. Cardinales , qui Romæ obierant , fuerat profecutus , nil veritus Cœli inclementiam , graffantemque morbum , nam deficientes corporis vires charitas sustentabat . Indè ergò lentâ febre correptus ægrotare cœpit , ac ferè triduum lecto decubuit piis precationibus intentus , donec XXI. ejusdem mensis feriâ III. ante Cineres , cum rei divinæ flexis genibus pro religione sua præsens , Christi Corpore refectus esset , mox in lectulo statas ad horas Canonicas preces recitasset , ad Completorium veniens , imminenti migrationis suæ dedit indicia ; quare Christiano ritu celeriter inunctus horâ XXII. inter Sacerdotum preces & lacrymas placidissimè sublatus est , annos natus LXXXI. & ampliùs XX. dies , nam Februaris illi mortalis vitæ initium atque finis.

Q

Ple-

Pleraque etiam ipsi Februario mense contigerunt, solemnitas votorum religiosorum nuncupatio, ordinatio in Presbyterum, cooptatio inter S. R. E. Cardinales, consecratio in Archiepiscopum: seditque in Pontificatu Romano annis quinque mensibus octo, additis diebus quatuor supra viginti. Tacitus statim rumor per Urbem de Pontifice obeunte, sed nec publicus, nec manifestus, nam cum eo die veteri quadam vulgi licentiâ Bacchanalia complerentur, vix populus adduci potuisset ad faniora consilia.

Tumultus aliquis in Urbe.

LXXXI. Insequenti autem die tumultus aliquis concitatus per Urbem (ut non rarò tempore viduitatis Ecclesiæ Romanæ fieri solet) ab iis, qui regimen defuncti Pontificis æquo animo non ferebant, homini sanctissimo quædam objicientes inania simul & falsa. Alii laudare illum, sed in aliquos Familiæ & Clientes ejus exercere odia; contra verò ii, quibus inimicitiarum causæ exploratæ erant, quique nec odio nec amore ducebantur adhuc prisca moris incorruptâ mente retinentes Ecclesiam, imminetia mala, atque inde ubique gentium exoritura scandala statim prospicere, modò ingemiscere, modò indignari.

LXXXII.

LXXXII. Profectò Sacro Cardinalium Collegio illa animorum commotio vehementer displicuit, & maximè eo tempore vacationis Sedis Apostolicæ, cum Romæ ad Comiticia celebranda summa populi quies, atque expers omnis periculi securitas curanda est; non enim nisi in loco maximè tuto Comiticia haberi, suffragia ferri, atque electionem Romani Pontificis a Cardinalibus peragi oportet. Turbatâ itaque tumultibus Urbe, statim S. R. E. Cardinales omnem operam adhibere, ut comprimerent rem, coercerentque homines seditiosos, minimè passi coortas turbas invalescere.

Cardinalium
Collegium ru-
multum cohibet.

LXXXIII. Inter hæc curabatur defuncti Pontificis funus ritibus consuetis. Magnus populi accursus & mœror: unusquisque mortales exuvias venerari, ac, si posset, osculari gestiebat: laudatâ illius memoriâ a Magistro Thoma Augustino Ricchinio Cremonensi ex Ordine Prædicatorum castissima, nec mendaciis fucata Oratione, & xxv. Februarii in Sacello, ubi Canonici Basilicæ Vaticanæ divinam Psalmodiam agunt, sub primam noctis horam Benedicti corpus, quod publicè confluentium venerationi hætenùs in ea Basilica expositum fuerat, tribus loculis primo cu-

Benedicti funus.

pressino, secundo plumbeo, tertio ligneo inclusum, & supra januam, qua ad Musicorum odeum ascenditur, depositum.

Cardinales xxix.
a Benedicto ad-
fci.

LXXXIV. Sanctæ Romanæ Ecclesiæ Cardinales xxix. Benedictus adlegit, quorum indicem infra dabimus, viros sanè multis nominibus hoc honore dignissimos, inter quos ex Consanguineis nemo: ex iis, quos antea Benedictus vix noverat, plures. Placuit enim ei rationem meritorum habere, prout unusquisque apud Sedem Apostolicam non sub ipso tantum, sed etiam sub prioribus Pontificibus meruisset, nec ultima illi laus est, quod Prosperum Lambertinium Bononiensem excellentiâ ingenii ac doctrinæ, integritate vitæ, perpetuitate famæ florentem, qui sub Clemente XI. ac Innocentio XIII. qua Congregationis Cardinalium Sacri Concilii Tridentini Interpretum a Secretis, qua Fidei Promotor, qua muneribus aliis præclarè gestis plurimum meruerat, Anconitano Episcopatu ornatum cooptaverit, futurum aliquandò sibi in Pontificatu Romano successorem. Præterea veteres Cardinales Benedictus tanti fecit, ut præcipuas illis rerum administrationes daret, tres etiam apud se adhiberet, scilicet Fabricium Paulutium, Petrum Marcellinum

num

num Corradinum, & Fabium Oliverium iisdem in muneribus, quibus apud superiores Pontifices functi erant, primum a Secretis Regiminis, secundum Pro-Datarium, tertium a Secretis Brevium.

LXXXV. Cæterum sub Benedicto religio per omnem modum amplificata, Episcopatus vigor, in quo Divinâ institutione religionis jura nituntur, multis sublatis impedimentis, quæ Episcopis objiciebantur, ubique gentium servatus, pax inter Christianos Principes firmata, cultus & amor a Principibus cunctis Romano Pontifici, tamquam communi Parenti procul a suspicione ac studio partium exhibitus, Comaculum Ecclesiæ Romanæ restitutum. Nec prætereundum, quod nihil mali Sedi Apostolicæ, aut ejus Ditioni, aut reipublicæ Christianæ supervenit: non hæresis, non schisma, non bellum, non pestis, non fames, non terræmotus, quæ publicæ utilitati officere sæpè acerbitate temporum solent, quandoque etiam subditorum potius, quàm Principis culpâ. Profectò alii Romani Pontifices hæc omnia in votis habuerunt, atque in consiliis, attamen qui tantam rerum ac temporum felicitatem, quantam Benedictus XIII. fuerit affectus, rarus admodum ac ferè nullus.

Reipublicæ Christianæ bonis sub Benedicto.

LXXXVI.

Modestia ac liberalitas Benedicti, perpetuusq; labor.

LXXXVI. Vestigalia quoque Benedictus imminuit ad levamen subditorum, & sumptibus, quantum potuit, pepercit, ab Aulæ fastu, & quocumque splendido apparatu maximè abhorrens, cum in rebus omnibus humilitatis fastigium teneret. Quicumque in conclavia, ubi Benedictus familiariter versabatur, aut in ejus cubiculum pedem intulisset, nil planè in lecto, in sellis, in parietibus poterat intueri, quod religiosam paupertatem ac modestiam cum summa dignitate conjunctam non redoleret. Liberalitatem tamen, & largitiones in pauperes præ cæteris mortalibus coluit; virtus enim hæc, quem magis decet, quam Romanum Pontificem? Divum Gregorium Magnum imitatus, cujus tanta in pauperes liberalitas fuit, ut id ipsi vitio datum fuerit, quod in vita Sabiniani, qui Gregorio in Pontificatu Romano successit, Bartholomæus Platina scribit. Et cum ærario ex imminutis subditorum oneribus decrescenti parceret, ne vestigalia, quæ ipse abrogaverat, restituere, vel nova, quæ proponebantur, jubere cogeretur, iis, quæ sibi peculiariter obveniebant, nunquam pepercit, largitus quandoque, deficiente pecunia, quidquid ad manus erat. Omnia enim cum
Apo-

Apostolo arbitrabatur veluti stercora , ut Christum lucrificeret , exemploque suo cæteros doceret , terrena hæc atque caduca despiciere , cœlestia verò ac in ævum mansura inquirere , ostenderetque Ecclesiam habere , aurum , non ut servet , sed ut eroget . Et quomodò poterat pecuniæ parcere , qui sibimet nunquam pepercit , quin se impenderet ac superimpenderet in Dei gloriam , in salutem hominum , in commodum subditorum ? Iis profectò Benedictus minimè acquievit , qui sibi vacationem & requiem a laboribus suadere conabantur : se nunquam , quod muneris sui erat , refugisse affirmabat , imò a se tantâ animi alacritate expleri , ut tædium vel molestiam caperet nullam : singularis beneficii loco se a Deo accepturum , si ad Aram operanti , aut Pontificiis actionibus insistenti sibi mortem contigisset oppetere . Qua de re si cupis , Lector , votum ab eo jamdiù conceptum intelligere , vide quæ ipsemet Benedictus in Lectione sua XVII. Exodi scripsit , ubi id mortis genus non solum a Deo petit , sed etiam auditorum suorum suffragiis nititur impetrare .

LXXXVII. Fatemur sanè hanc eandem Benedicti liberalitatem sensisse etiam aliquos

Benedicti munificentia & gratissimus animus ,

ve-

veteres ejus Clientes, non autem Consanguineos, quos utpote summo loco natos, & avitis opibus, ac amplâ nobilium Feudorum ditione fulgentes propter priscam quamdam & severam Ecclesiæ disciplinam, ac insuetam prorsûs abstinentiam augere non studuit: sed non supra modum id fuit. Quod licet temperantiam quamdam ac moderationem rectè exposcat, tamen, si æquis oculis rem inspiciamus, ratione & auctoritate non caret; Pius enim V. cujus memoriam inter Divos colit Ecclesia, Innocentius XI. aliique Sanctissimi Romani Pontifices Administrorum suorum, ac Familiarium fortunas ampliare non dubitarunt. Porro Benedictus, qui juxta Apostoli monitum beneficentiæ in omnes; qua Deum promeremur, oblivisci non poterat, ad hanc siquidem velut a natura, genere, institutione factus videbatur, quomodo oblivisci poterat beneficentiæ in suos, quorum obsequiis & familiaritati in minori fortuna diù multumque assueverat? Qui & alterum Apostoli monitum summopere cordi habebat, *grati estote*, & sanè cujuslibet accepti utcumque tenuis beneficii memorem sese atque gratissimum semper exhibuit, quomodo erga suos minus gratus, ac liberalis esse potuisset?

LXXXVIII.

*Ad Hebr. 13.
v. 16.*

Ad Col. 3. v. 15.

LXXXVIII. Scimus quidem in amplissima rerum administratione inter multiplices Aulicos, & Familiares facile posse ad importunas postulantium preces quædam a Principe concedi, quæ concedenda non forent, quæque obreptionis aut subreptionis vitio laborent, ac præsertim ubi postulantes Principem nacti sint naturâ facilem, qui aliorum ingenia metiatur ex suo, & ad extremum senium vergens, decrefcentibus mentis & corporis viribus, nequeat accuratè omnia rimari atque expendere; quamobrem sapiens & sanctus Rex David extrema prospiciens vehementer Deum rogabat: *ne projicias me in tempore senectutis, cum defecerit virtus mea, ne derelinquas me*: Et illorum certè, qui facilitate & clementiâ Principis abutuntur, si qui unquam fuerunt, improbamus artes: sed nec laudandi videntur, qui ea, quæ a Principe aguntur, ipsis inconsultis, statim notant atque reprehendunt. Multum enim unicuique Principi, ac præsertim electo a Deo, licet per ministerium hominum, Romano Pontifici deferendum est, qui divino quodam afflatu, nutuque regitur; potissimum verò Benedicto, qui in rebus omnibus consilium a Deo petere, ejusque auxilium quotidie implorare assiduo

R

pre-

precandi studio consueverat, productis orationibus a prima luce, & quandoque etiam nocte in multas horas. Et sanè temporum ac rerum felicitatem, qua ipso Pontifice usi sumus, precibus ejus referri oportet acceptam.

Querelæ contra aliquos Familiares vulgæ nil Benedictio detrahunt.

LXXXIX. At quædam vulgatæ querelæ contra aliquos ex Familiaribus Benedicti de nonnullis. Nostrum non est de his scribere, quia Benedicti non sunt. Certè felix ille Princeps, & quasi supra humanam conditionem positus videretur, cui contingeret tales Familiares omnes habere, quales cuperet, quorum virtutibus nulla admiscerentur vitia, & quod difficilius est, quibus publica tantum res, nihil privata cordi foret. Videant autem qui statuunt, neminem a Principe inter Familiares, & Clientes habendum, nisi qui perfectus absolutusque sit, quid non paucis fieret, si in hujusmodi consilii Principem inciderent, si cum honores ex ordine peterent, aliquo vitæ errore deprehenso, licet multorum laborum, & obsequiorum meritis redempto, repulsam ferrent. Porro a sapientissimo omnium hominum admonemur, cogitationes mortalium timidas esse, & providentias nostras incertas, quare non est providentia Principis statim accusanda, si quid in moribus alio-

Sap. 9. v. 14.

aliorum occurrat , quod non probetur . Non enim cum perfectis vivimus , & ipsum regimen hominum , quamvis ad ea , quæ perfecta sunt , dirigat , juxtà summorum Theologorum sententiam perfectum esse non potest . Hæc autem , quæ conditionis potius humanæ , quam Principis sunt , nihil detrahunt Benedicto , cujus memoria ab æquis rerum æstimatoribus tamdiù laudabitur , quamdiù apud homines religio , pietas , ac liberalitas in pretio erunt .

XC. Et quidem quàm altè omnium insideret animis opinio de Benedicti virtute , ac sanctimonia , brevi patefactum est . Frater Thomas Ripoll Magister Generalis Ordinis Prædicatorum repetebat mortales Benedicti exuvias , quod ille sæpè cum viveret ex christiana humilitate animi dixerit , non aliud sibi sepulcrum deberi , quàm commune inter Fratres Ordinis sui , inde jure postulabat reddi sibi corpus ejus in præcipuo Ordinis Templo S. Mariæ supra Minervam condendum . Clemens XII. Benedicti successor annuit votis . Quapropter XXI. Februarii anno MDCCXXXIII. vertente triennio ab obitu Benedicti sub primam noctis horam , postquàm Capitulum , & Clerus Vaticanæ Basilicæ cum Annibale Car-

1733

Benedicti funus
inauguratum in
Vaticano anno
1733.

R 2

dina-

dinali Albano Archipresbytero, atque aliis decem S. R. E. Cardinalibus in Sacellum. Psallentium convenissent, deposito Benedicti loculo, ac referato, adstantes omnes corpus ejus integrum, vestesque prorsus illæfas inspexerunt mirâ animorum ad pietatem, & ad lacrymas commotione. Nullus ibi gravis odor, nulla tristis mortis imago, sed grandis de adepto æternæ Gloriæ præmio fiducia. Interim parabatur funus è Vaticano deducendum, Canonicis, & Clero universo illius Basilicæ vehementer dolentibus, eripi sibi pretiosum, quem asservabant, thesaurum, contra gaudentibus Fratribus, restitui sibi decus, & ornamentum Ordinis sui, omnibus verò summo studio certantibus, ut quique posset memoriam defuncti Pontificis impensius honorare. Vaticanum Capitulum acceptorum beneficiorum memor, rem potissimum urgente Albinio Archiepiscopo Athenarum, de Simone Episcopo Marcianæ, & Oliverio Prothonotario Apostolico ejusdem Basilicæ Canonicis, primas egit; nam antequam efferretur, solemnes Exequias XXII. Februarii instauravit, erecto propè Confessionem Apostolorum Petri & Pauli magnifici planè operis Theatro, Castroque doloris excelso supereminente Tholo,

lo, sub quo Benedicti locus & Pontificalia Insignia erant, descendantibus è Tholi testudine velis ad loculi latera, adeò splendide, ut auro, argento, ac quadringentis & amplius ardentibus facibus micarent omnia. Clemens XII. ad singulas Aras Vaticanæ Basilicæ innumera Sacrificia pro Decessoris requie, stipendiis liberaliter erogatis, Deo offerri iussit, unaquaque Arâ in eam causam plenissimi suffragii privilegio donatâ. Solemni etiam ac Pontificali Sacro parentatum est: inde laudatâ memoriâ a Josepho Simonio Assemano è Monte Libano, tunc Presbytero Beneficiario ejusdem Basilicæ, modò Canonico, brevi, elegantique Oratione, qua collata a Benedicto in Basilicam Vaticanam dona, ac beneficia recensuit, ac præsertim, quod Mensæ Capitularis proventus ob iteratas aliquot annis rei agrariæ calamitates attritos, attributis multis aureorum millibus uno die cumulatissimè reparaverit, & novas, amplasque ædes pro Alumnis Vaticani Seminarii erexerit, ac instruxerit. Postremò a quinque ex Canonicis Pontificali dignitate fulgentibus majoris potentiae, ut vocant, statis ritibus absolutiones adhibitæ.

XCI. Insequenti die Dominica, XXIII. Februa-

*Benedicti funus
delatum ad Tem-
plum S. Mariæ su-
pra Minervam ,
solemnēque ibi
exequiæ .*

bruarii funus è Vaticano ad Templum S. Mariæ supra Minervam sub noctem deductum est eâ pompâ , quæ triumphi speciem referret , omnes Religiosi Ordines , & universus Clerus urbanus præibant : Canonici Patriarchalium Ecclesiarum per vices sustentabant loculum auro fulgentem , quem Prætoriani milites circumdabant : ponē sequebantur Cæremoniarum Magistri , inde Præfectus Palatio Apostolico , atque omnes Præfulum ordines , quique a sacro Cubiculo Summi Pontificis erant . Ubi ad Arcem Adrianam ventum est , explosa tormenta bellica : mœstus ubique æris campani fragor , coruscantes undique faces (quas ad quatuor millia plerasque a Cardinalibus , quos Benedictus adlegerat , aliisque piis Fidelibus oblatas fuisse ferunt) ut nox illa tot irradiata fulgoribus veluti dies splenderet . Arrisit placidum , ac serenum Cœlum in summa hyeme . Mirus populi accursus , verùm præ mœroris magnitudine , & in defunctum Pontificem pietate nullus popularis strepitus , nullus , ut fieri solet , clamor , sed tacitum ubique silentium . In medio Templo S. Mariæ supra Minervam deposito loculo Petrus Cardinalis Otthobonus solemnem absolutionem peregit coram nonnullis aliis Cardinalibus . FERIA II.
in

in eodem Templo exequiæ habitæ splendide , & magnificè Sacro Cardinalium Collegio , & cunctis Præfulum ordinibus magnâ frequentiâ funus cohonestantibus . Joannes Baptista Cardinalis Alterius , primus ex iis , quos Benedictus elegerat , solemniter ad Aram operatus est , deinde cum aliis quatuor , Petra scilicet , Lercario , Finio , & Carafa , qui a Benedicto Cardinalatûs honorem acceperant , supremas absolutiones exequutus , sed ante has Venantius Philippus Pierfanti ab intimo Sacello Summi Pontificis , & Apostolicarum Cæremoniarum Magister , Benedicti memoriam . luculentâ Oratione laudavit , atque inter virtutes ejus summoperè commendavit christianam animi demissionem , religionem , & charitatem in Deum , atque in omnes præclaris uniuscujusque virtutis productis exemplis . Denique cum militum excubiæ undique dispositæ ardens accurrentis populi studium . comprimere , & vim arcere non possent , quin unusquisque aliquid de feretro illius veluti loculi attactu sacrum sibi deposceret , aut arriperet , clausis Templi foribus sub noctem ejusdem diei locus ipse ad facellum S. Mariæ Magdalenæ propè Vestiarium Templi tumulo compositus est , donec Mausoleus erigeretur .

XCII.

Mausoleum erigitur, in quo mortales Benedicti exuviae conduntur 1739.

XCII. Serò Mausolei honorem Romanis Pontificibus plerumque contigisse vidimus, at ocyùs Benedicto. Curavit illud Magister Generalis, & inclytus Prædicatorum Ordo in sacello Divi Dominici, quod Benedictus vivens instauraverat, atque ornaverat, nomine non inscripto, nec (ut mos est) appposito stemmate; primam tamen ideam operis, veteres ac virides adductas ex Oriente columnas, & pretiosa quæque marmora Alexander Cardinalis Albanus in Benedictum summè pius, & gratus contulit, Angelus Maria Cardinalis Quirinus S. R. E. Bibliothecarius Benedicti statuam ex candido marmore, Nicolaus Maria Cardinalis Lercarius alteram Humilitatis, Franciscus Antonius Cardinalis Finius Religionis alteram affabrè sculptas, Dominicus verò Gravinatum Dux Benedicti Pronepos anaglypha ad urnam ex alabastrite, ubi Concilium Romanum, a Benedicto habitum in Laterano, repræsentatur: cætera ex ære, & auro fulgentia, multosque sumptus ad perficiendum opus Frater Thomas Ripoll Magister Generalis Ordinis Prædicatorum liberaliter adjecit. Perfecto eleganter opere anno MDCCXXXIX. XXII. Februarii, eo scilicet die, qui anniversariam memoriam obitus proximè

mè sequebatur , locus in novum sepulcrum illatum est , compositusque sub fornice ejusdem Mausolei . Qua in re duo Benedicto contigerunt , alterum juxtà votum ejus , alterum contrà . Primum , quod propè tumulos Fratrum Ordinis Prædicatorum , qui ibi inferiùs jacent , conquiesceret : secundum , quod eo opere , atque splendore sepulcrum ejus paratum sit , a quo ipse semper abhorruebat . Licet clausis Templi januis , & secretò transacta res fuerit , tamen nonnulli Cardinales , plures Præsules olim familiares ejus , ac Principes viri interfuerunt , nec defuit populi frequentia : tanto studio omnes in Defunctum ferebantur , ut nec deferere possent , nec oblivisci .

XCIII. Quod si habitum quoquè corporis ejus posteri noscere cupiant , decens ille potius quàm sublimis fuit : caput ferè calvum , spatiosa frons , nasus aquilinus , nihil metus in vultu , candida oris gratia , nisi quod ex consortio sermonis Domini quandoque rubesceret ; sed figuram animi magis quàm corporis ex factis , dictisque illius , quæ nos recensuimus , amplectamur : sicut enim vultus hominum , ita etiam eorum simulacra , & imagines , quamvis marmore , aut ære fingantur , mortales sunt , ac temporis injuriis opportunæ ;

Habitus corporis .

S

for-

forma mentis æterna, quam referre non per alienam materiam, & artem, sed studiis ac literis nostris conati sumus. Si verò in magna gestarum rerum copia non omnia fuimus profecuti, nemo nobis succenseat; non enim hoc nostro Commentario libello historiam scripsimus, sed vitam, veterum brevitæ delectati, qui summos viros nobis tradiderunt. Profectò pauca enarravimus, multa attigimus, pleraque perstrinximus, ex quibus animi indicia moresque elucent, pictores imitati, qui ex facie & vultu imaginem desumunt, de cæteris membris magnoperè non laborant. Disertam rerum historiam, annalesque luculentos libenter permittimus aliis. Utinam possemus aliquid ex virtutibus illius moribus quoque nostris reddere, quod licet arduum valdè, ac difficile sit, non tamen supra imitationem positum arbitremur. Longè quidem, sequamur tamen, gradu quamvis infirmo, vestigia ejus, quem Deus Omnipotens elegit, proposuitque Ecclesiæ, ut cæteri Christifideles, ac præsertim Episcopi etiam ætate nostrâ veri Pastoris formam, quam potissimum imitarentur, haberent.

CAR-

CARDINALIUM COOPTATIONES

I.

xi. *Septembris* MDCCXXIV.

Joannes Baptista de Alteriis Romanus, Clementis X.
 Pronepos, Clericorum Rev. Cam. Apostolicæ Decanus,
 & Archiepiscopus Tyri. Presbyter.
 Alexander Falconerius Romanus S. Rotæ Auditor, Ur-
 bis Gubernator, & Vice-Camerarius. Diaconus.

II.

xx. *Novembris* MDCCXXIV.

Vincentius Petra Neapolitanus Archiepiscopus Dama-
 scenus, Decanus Signaturæ Gratiarum, & Sacræ
 Congregationis negotiis, & Consultationibus Epi-
 scoporum, & Regularium præpositæ a Secretis.
 Presbyter.

III.

xx. *Decembris* MDCCXXIV.

Prosper Marefiscus ex oppido Montis Sancti Firmanæ
 Diocesis, Archiepiscopus Cæsareæ, trium continen-
 ter Romanorum Pontificum, Clementis scilicet XI.
 Innocentii XIII. & ipsius Benedicti XIII. Auditor.
 Presbyter.

Frater Augustinus Pipia Sardus, Generalis Magister
 Ordinis Prædicatorum. Presbyter.

S 2

IV.

IV.

XI. *Junii* MDCCXXV.

Nicolaus Coscia Diœcesis Beneventanæ, a Secretis Supplicum Libellorum, & in Archiepiscopatu Beneventano cùm spe futuræ successione ipsius Benedicti Coadjutor. Presbyter.

Nicolaus de Judice Neapolitanus Apostolico Palatio Præfectus sub tribus Romanis Pontificibus, Clemente scilicet XI. Innocentio XIII. & ipso Benedicto XIII. Diaconus.

V.

XI. *Septembris* MDCCXXVI.

Andreas Hercules de Fleury Gallus, olim Episcopus Fori Julii, & Christianissimi Regis Galliarum Præceptor, atque inde florentissimi Regni primus Administer. Presbyter.

VI.

XI. *Decembris* MDCCXXVI.

Novem Cardinalibus creatis duos tantum Benedictus nuncupavit, Lercarium scilicet, & Cozzam, reliquos in pectore suo servavit opportuno tempore publicandos.

An-

Angelus Maria Quirinus Ordinis S. Benedicti Congregationis Casinensis Venetus, Archiepiscopus Corcyrae, atque inde ad Episcopatum Brixientem translatus, cujus publicam nuncupationem in xxvi. Novembris mdccxxvii. distulit. Presbyter.

Nicolaus Maria Lercarius Januensis, Archiepiscopus Nazianzenus, olim Sacro Cubiculo Praefectus, tunc verò primus Administer, & a Secretis Status. Presbyter.

Marcus Antonius Ansidei Perusinus, Episcopus Perusinae, & Supremae Inquisitionis Assessor, cujus nuncupationem distulit in xxx. Aprilis mdccxxviii. Presbyter.

Prosper Lambertinius Bononiensis, Episcopus Anconae, Sacrae Congregationi Eminentissimorum Cardinalium Concilii Tridentini Interpretum a Secretis, & Fidei Promotor. Presbyter. Dilata nuncupatione in xxx. Aprilis mdccxxviii.

Franciscus Antonius Finius natus Minerbini, olim Episcopus Avellini, & Frigenti, tunc Archiepiscopus Damasci, Examiner Episcoporum, & Sacro Cubiculo Praefectus, quem publicè nuncupavit xxvi. Januarii mdccxxviii. Presbyter.

Frater Laurentius Cozza ex oppido S. Laurentii Diocesis Montis Falisci, Generalis Minister Ordinis Fratrum Min. de Observantia S. Francisci. Presbyter.

Frater Gregorius Selleri Diocesis Perusinae Ordinis Praedicatorum, Sacri Palatii Magister a temporibus Clementis XI. Romani Pontificis, & deinceps: xxx. Aprilis mdccxxviii. publicè nuncupatus. Presbyter.

An-

Antonius Bancherius Pistoriensis, Urbis Gubernator,
& Vice-Camerarius. Diaconus.

Carolus Collicola Spoletinus sub tribus Romanis Pontificibus Clemente XI. Innocentio XIII. & Benedicto XIII. Rev. Cam. Apostolicæ Thesaurarius Generalis; & hos duos Bancherium scilicet, & Collicolam Diaconos Cardinales publicè nuncupavit xxx. Aprilis MDCCXXVIII.

VII.

xxvi. *Novembris* MDCCXXVII.

Didacus de Astorga & Cespedes Hispanus, Archiepiscopus Toletanus. Presbyter.

Sigismundus Kollonitschius Germanus, Archiepiscopus Viennæ in Austria, & S. R. I. Princeps. Presbyter.

Philippus Ludovicus Sinzendorfius Germanus Episcopus Jaurini. Presbyter.

Joannes de Motta & Sylva Lusitanus. Presbyter.

VIII.

xxx. *Aprilis* MDCCXXVIII.

Frater Vincentius Ludovicus Gotti Bononienfis Ordinis Prædicatorum Sacræ Theologiæ Magister, atque editis contra Piccininum libris celebris. Presbyter.

Leander a Portia Ordinis Sancti Benedicti Congregationis Casinensis, Episcopus Bergomi. Presbyter.

IX.

IX.

xx. *Septembris* MDCCXXVIII.

Petrus Aloysius Carafa Neapolitanus, Archiepiscopus Larissæ, olim Nuntius Apostolicus in Hetruria, & S. Congregationi de Propaganda Fide a Secretis, tunc verò a Secretis S. Congregationis negotiis, & consultationibus Episcoporum & Regularium præpositæ. Presbyter.

Joseph Accoramboni Diœcesis Spoletinæ, Archiepiscopus Philippi, Benedicti XIII. Auditor. Presbyter.

X.

xxiii. *Martii* MDCCXXIX.

Camillus Cybo Patriarcha Constantinopolitanus, olim R. Cam. Apostolicæ Generalis Auditor, tunc Apostolico Palatio Præfectus. Presbyter.

XI.

vi. *Julii* MDCCXXIX.

Franciscus Burghesius Romanus, Archiepiscopus Trajanopolitanus, Sacro Cubiculo, & mox Apostolico Palatio Præfectus. Presbyter.

Frater Vincentius Ferrerius Niciensis Ordinis Prædicatorum, Episcopus Alexandriæ. Presbyter.

XII.

I N D E X

RERUM PRÆCIPUARUM.

A

- A** Bbates ab Episcopis benedicti . num. xxxix.
 Academia Theologica Romæ . num. l.
 S. Agnes de Monte Politiano . num. liv.
 Agricolæ pluvio tempore a Benedicto aluntur . num. lxix.
 Alexander Albanus apud Cæsarem causam de restituendo Comaclo solerter agit . n. xxxvii.
 Cardinalis n. xliii. in Benedictum summè pius & gratus . n. xcii.
 Alexander Falconerius Cardinalis . n. xxxiii.
 Allocutio Benedicti ad Cardinales de Comaclo recepto . num. xxxvii.
 S. Aloysius Gonzaga . n. liv.
 Altaria in Cathedralibus , & majoribus Ecclesiis privilegiis donantur . num. xx.
 Angelus Maria Cardinalis Quirinus . n. xcii.
 Annibal Cardinalis Albanus Benedictum XIII. in Pentecoste Vaticanam Basilicam ingredientem alloquitur . n. xviii.
 Ejus laus . n. xliii.
 Annus Jubilæi Benedictus indicit . n. xxxiv. Gesta eo anno perstringuntur . n. xxxv. & seqq.
 Ejusdem anni finis , n. xlvii.
 Antonius Farnesius Parmæ & Placentiæ Dux . n. lxi.
 Aquas longo ductu Cardinalis Urfinus Archiepiscopus Benevento infert . n. xii.
 Aquilanæ Ecclesiæ instaurationi Benedictus consulit . n. xxxi.
 Archiva Ecclesiarum . n. xxxix.
 Atestini Principes quo jure Comaclo tenuerint . n. xxxvii.
 Auctoritatem Apostolicam in Polonia Benedictus tuctur . n. lxxvii.
 D. Augustini sacra lipsana . n. lxxiii.
 Fr. Augustinus Pippa Ordinis Prædicatorum Cardinalis . n. xxxiii.

B

- B** Abylonensis Episcopi attentata in Belgio . n. xl.
 Baptisma per immersionem a Benedicto adhibitum . n. xxxviii.
 D. Bartholomæi Apostoli facta lipsana , ac Templum Beneventi . n. viii. & lxxiii.
 Basilica XII. Apostolorum Romæ a Benedicto consecratur . n. xxviii.
 Basilica D. Pauli via Ostien. subsidiis Benedicti instauratur . n. xxxix.
 Belgii fœderati Missiones . n. xlii.
 B. Benedictus XI. ex Ordine Prædicatorum . n. xviii.

T

Be-

Benedicti XIII. genus, ortus, educatio. n. i. Principatui Familie præfert Ordinem Prædicatorum. *Ibidem*. Vita & gesta ejus in Claustis. n. ii. Invitus cogitur a Clemente X. Cardinalatus honorem accipere. n. iii. Archiepiscopus Sipontinus renunciatur, & gesta ab eo Siponti. n. iv. Transfertur ab Innocentio XI. Casenam, inde Beneventum. n. v. Gesta Beneventi. n. vi. & seqq. Mira ejus constantia in propulsandis malis ex primo & secundo Terræmotu supervenientibus. n. vii. & ix. Magnificencia & liberalitas Beneventi in operibus pietatis. n. x. & seqq. Longo ductu aquas Benevento infert. n. xii. A Clemente XI. decernitur Legatus ad Cæsarem. n. xiv. Episcopus Tusculanus, inde Portuensis; pro Ecclesia Ostien. ac Velit. renuit judicio contendere, deinde tamen jus ad has illi deferretur. n. xv. Regule D. Dominici tenax; ejus amor & beneficia in Ordinem Prædicatorum. n. xvi. Ingenii monumenta, & sacrarum literarum studia. n. xvii. Invitus eligitur in Romanum Pontificem. n. xviii. Cardinalibus gratias agit de electione. n. xix. Dei opem implorat, Jubilæum indicit: Ecclesias Regni Neapolitani Spoiliis Episcoporum, Animas purgatorii in locis detentas suffragiis juvat. n. xx. Ejus ordo & facilitas in audiendis singulis. n. xxi. Qualis fuerit erga Episcopos. n. xxii. Vectigalia subditis imminuit. n. xxiii. Comæ fictitiæ usum à Clero tollit, & alia statuit Pontificatus initio. n. xxiv. & seqq. Non solum publicè & semipublicè, sed etiam privatim per Urbem incedit, sacras Aedes, Valetudinaria &c. visitat, & Choro Psallentium interest in singulis Ecclesiis. n. xxvii. Preces ad auroræ, meridei, ac noctis signa flexis genibus recitandas esse exemplo docet. n. xxix. Triumphalis Arcus honorem in Capitolio respuit. n. xxx. Infirmitatem spiritualem salutem in Valetudinariis Urbis curat. n. xxxi. Concilium Provinciale Romanum indicit. n. xxxii. Cogit. n. xxxix. Novos Cardinales cooptat. n. xxxiii. Annum Jubilæi indicit, & Portam Sanctam in Vaticano aperit. n. xxxiv. Ejus pietatis opera, & laus eo anno. n. xxxv. & seqq. Funeribus exequiis Cardinalium, & anniversariis Clementis X. interest semper. n. xxxvi. Comaculum recipit. n. xxxvii. Auget cultum D. Philippi Neri. n. xl. Protestatur de servandis juribus Sedis Apostolicæ in Parmam & Placentiam. n. xli. Novas Cathedras Episcopales erigit. n. xlii. Urbium beneficiis profequitur. n. xliii. Comprimit attentata à Refractariis in fœderato Belgio.

gio. n. XLIV. Ludum sortium Romæ exerceri vetat. n. XLV. Vignanellum adit consecrandæ Ecclesiæ causa. n. XLVI. Portam Sanctam in Vaticano claudit. n. XLVII. Gesta anno MDCCXXVI. n. XLVIII. & seqq. Gesta anno MDCCXXVII. n. LV. & seqq. Beneventum eo anno proficiscitur, ac Romam revertitur. n. LVI. LVII. & LVIII. deinde Viterbium LXI. Gesta anno MDCCXXVIII. n. LXIII. & seqq. Gesta anno MDCCXXIX. n. LXIX. & seqq. Rursus Beneventum pergit, ubi III. Provinciale Concilium cogit. n. LXXI. LXXII. & LXXIII. Nil insalubritate aeris commotus, religionis ac pietatis operibus insistens ægrotat, ac moritur. n. LXXX. Ejus funus. n. LXXXIII. Ejus modestia ac liberalitas, perpetuusque labor. n. LXXXVI. Munificentia, & gratissimus animus. n. LXXXVII. Orandi studium assiduum. n. LXXXVIII. Nihil ipsi detrahunt querelæ contra aliquos Familiæ vulgatæ. n. LXXXIX. Ejus funus instauratum in Vaticano anno MDCCXXXIII. n. XC. Delatum ad Templum S. Mariæ supra Minervam, solemnesque ibi exequiæ. n. XCI. Ibidem Mausoleum erigitur, in quo conditur. n. XCII. Habitus corporis. n. XCIII. Benedictus Cardinalis Pamphilius. n. XVIII. XXX. XXXIV. & XLVII. Beneventanus Senatus monumentum statuit Cardinali Ur-

sino Archiepiscopo in foro Divi Bartholomæi. n. XII.

Beneventanæ Ecclesiæ regimen sibi servat Benedictus XIII. Illuc proficiscitur. Acta in itinere & civitate. num. LVI. Inde discedit. n. LVII. Rursus illuc contendit, ac III. Provinciale Concilium celebrat. n. LXXI. & seqq.

Beneventi gesta a Cardinali Ursino Archiepiscopo. n. VI. & seqq. Beneventum Terramotu concutitur anno MDCLXXXVIII. n. VII. rursus. MDCCII. n. IX.

Bernardinus Guinilius primus Archiepiscopus Lucensis. n. LIII. Bernardinus Perfectus. n. LXIII.

C

Cæremonialis liber a Benedicto emendatus. n. LV.

Cæsar scilicet Carolus VI. arma in Turcas parat. n. XIV. Comaculum Sedi Apostolicæ restituit. n. XXXVII. Pacem init cum Rege Hispaniarum. n. XLI. Alia. n. LXIV.

Cæsena gesta a Cardinali Ursino Episcopo. n. V. Constituta ab eodem Romano Pontifice. n. LIII.

Camillus Cybo Præfectus Palatio. n. LXV. Cardinalis. n. LXXI.

Camillus Paulutius Nuntius Apostolicus. n. LXVII.

Canonizatio Sanctorum. n. LIV. LXIII. LXX. & LXXVI.

Captivi a Benedicto redempti. n. LXXV.

T

Car-

- Caraffa Cardinalis. *n.* xci.
 Cardinales xxxix. a Benedicto ad-
 lecti. *n.* lxxxiv.
 Cardinalium Collegium Romæ
 tumultum cohibet. *n.* lxxxii.
 Carmelitas Discalceatos Cardi-
 nalis Ursinus Beneventum in-
 vehit. *n.* x.
 Carolus Hispaniarum Princeps.
n. xli. & lxxxix.
 Carolus Thomas Cardinalis Tur-
 nonius. *n.* lxii.
 Casinense Monasterium. *n.* xxxix.
 Ejusdem Ecclesia a Benedicto
 consecratur. *n.* lvii.
 Cingulum civitas Episcopalis.
n. xlii.
 Clemens IX. consilium Petri
 Francisci Ursini de suscepto
 habitu Prædicatorum probat,
 rejectis querelis Consanguin-
 eorum. *n.* ii.
 Clemens X. Fr. Vincentium Ma-
 riam Ursinum invitum cogit
 Cardinalatus honorem accipe-
 re. *n.* iii.
 Clemens XI. usum Mitræ Cano-
 nicis Beneventanis indulget.
n. ix. Decernit Cardinali Ur-
 sino legationem ad Cæsarem.
n. xiv. De Comaclo recupe-
 rando laborat. *n.* xxxvii. Ejus
 ortus. *n.* xliii. Alia *n.* l. lxii.
 lxiv. lxvi.
 Clemens XII. innumera Sacrifi-
 cia pro Benedicti requie Deo
 offerri jubet. *n.* xc.
 Clemens Augustus è Bavaria Ar-
 chiepiscopus Colonienfis a Be-
 nedicto Viterbii consecratur.
n. lxi.
 Clementina Sobieschi Regina
 Britanniae. *n.* xxxv.
 Clerici Regulares Matris Dei
 Beneventum evocati. *n.* ix.
 Clerici Regulares Sancti Pauli.
n. xlviii.
 Coenobium S. Sixti instauratur.
n. lxv.
 Color violaceus a Benedicto ad-
 hibitus. *n.* xxxvi.
 Comacini descriptio, & jura Sedis
 Apostolicæ; ea civitas a Cæ-
 sarianis occupatur, a Benedi-
 cto XIII. recipitur. *n.* xxxvii.
 Comacini seditio usus a Benedicto è
 Clero sublatus. *n.* xxiv.
 Concilium Provinciale Beneven-
 tanum I. & II. sub Archiepi-
 scopo Ursino. *n.* viii. Tertium
 sub eodem Romano Pontifice
n. lxxxiii.
 Concilium Romanum indicitur.
n. xxxii. Ejus acta summam.
n. xxxix.
 Conciones de tempore Quadra-
 gesimæ & Paschatis. *n.* xvii.
 Consecrationes Ecclesiarum, &
 Altarium fixorum a Benedi-
 cto XIII. peractæ. *n.* xlix.
 Consecratio Virginum in Mona-
 sterio D. Ambrosii. *n.* lxiii.
 Cruciferi Beneventum evocati a
 Cardinali Ursino. *n.* x.

D

- D. **D**ominici Sacellum Ro-
 mæ a Benedicto instau-
 ratum. *n.* xcii.
 Dominicus Ursinus Gravinatum
 Dux. *n.* xcii.

Ec-

E

Eccliesiarum Cathedralium, & Collegiatarum reparationi consultitur. **n. xxxix.**

Episcopi assumpti ex Familiaribus Cardinalis Ursini ante Pontificatum Romanum. **n. xvii.**

Episcopi a Benedicto XIII. benignè excipiuntur. **n. xxii.** E Regularibus Ordinibus assumpti monentur de servandis Ordinibus institutis. **n. xxiv.** Si Ecclesias dimittant, revertantur ad claustra. **n. xlviii.**

Episcopis Cardinalibus apud proprias Ecclesias commorantibus Decanatus jus, & Episcopatus Offitium ac Velit. optio datur. **n. xxvi.**

Episcoporum consecrationes Benedictus XIII. peragit. **n. xxvii.**

Episcopum qualem esse oportet. **n. ix.**

Eugubina Ecclesia Metropoli Urbini subijcitur. **n. xliii.**

F

Fabius Cardinalis Oliverius. **n. lxxxiv.**

Fabiano Cathedra Episcopalis datur. **n. lxxv.**

Fabricius Cardinalis Paulutius. **n. xxxiv.** **xlvii.** **xlviii.** **li.** **lxxxiv.**

Ferdinandus Ursinus Dux Gravinatum pater Benedicti XIII. **n. i.**

B. Fidelis a Sigmaringa. **n. lxx.**

S. Franciscus Solanus. **n. liv.**

Franciscus Farnesius Parmæ &

Placentiæ Dux triumphalem Arcum Benedicto statuit ad Hortos Palatinos. **n. xxx.**

Franciscus ab Aquaviva & Aragoia Cardinalis. **n. xxxvi.**

Franciscus Antonius Finius Cardinalis. **n. lxi.** **xcl.** & **xcii.**

Franciscus Maria de Aste Archiepiscopus Hydruntinus. **n. xv.**

Franciscus Blanchinus. **n. xviii.**

Fratres Excalceati Ordinis Sancti Augustini. **n. xlviii.**

Fratres Minores S. Francisci, quos Reformatos dicunt, Cardinalis Ursinus Beneventum accerfit. **n. x.**

G

Galeatius Cardinalis Mariscottus. **n. li.** & **lxi.**

D. Gregorii VII. Lektionen Benedictus tuetur. **n. lxxxviii.**

Gregorius Sellari Cardinalis. **n. lxxxiv.**

H

Habitus Regularis a Regularibus Episcopis deferendus. **n. ii.**

Hospitium Sanctissimæ Trinitatis. **n. xxxv.**

B. Hyacintha Mariscotta? **n. lii.** & **lxi.**

I

Iacobus Picens. **n. liv.**

Jacobus III. Magnæ Britanniæ Rex. **n. xxxv.**

Jacobus Maria Conilio Ordinis Prædicatorum Episcopus Zaccynthi, & Cephaleniæ. **n. iv.**

T

Je-

Jeiunia severiora quanta abstinentia a Benedicto observata . n. lvi.

Jesu nominis cultus . n. lxiij.

Isidrophonsus de Tuso Episcopus ordinatur . n. lxxx.

Immunitas Ecclesiastica . n. xxxix.

Indiarum Orientalium Missiones, & decreta pro eisdem a Benedicto . n. lxii.

Innocentius XIII. spem recipienti Comaculum confirmat. num. xxxvii.

Joanna Frangipane Tolphia Mater Benedicti XIII. n. i. Ab eo Neoprebytero invistitur . n. ii. Gravinæ Coenobium condit Sanctimonialibus Ordinis Sancti Dominici, in quo decessit . n. xii.

Joannes Baptista Alterius Cardinalis . n. xxxiii. & xci.

Joannes Baptista Bussius pro re Catholica in foederato Belgio summopere laborat . n. xliv.

S. Joannes a Cruce . n. liv.

B. Joannes de Prado . n. lxiii.

S. Joannes Nepomucenus . n. lxx.

SS. Joannis & Pauli sacra lipsana . n. xlviii.

S. Josephi cultus auctus . n. liv.

Joseph Simonius Allémanus . n. xc.

D. Juliana de Falconeris . n. lxxvi.

L

L Ateranensis Ecclesiæ solennis possessio a Benedicto inita : inscripta præ foribus ejusdem Basilicæ . n. xxx. Consecratio . n. lxx. Aliæ . n. lxxviii. & lxx.

Lectiones in Exodum . n. xvii.

Livius de Carolis Marchio Pro-sedis . n. lviii.

Lucensis Archiepiscopatus . n. lxi.

Ludovicus Cardinalis de Noailles Archiepiscopus Parisiensis Constitutionem *Unigenitus* simpliciter & absolute recipit . n. lxxvi.

Ludus sortium a Benedicto vetitus . n. xlv.

M

M Affeus Farsettus Archiepiscopus Ravennas . n. lvi. Marcus Antonius Ansideus Cardinalis . n. lxxx.

D. Margarita a Cortona . n. lxxiii.

S. Maria ad Martyres Cardinallium Diaconia . n. xlii.

S. Mariæ in Domnica Templum instauratum . n. xxxi. In Presbyteri Cardinalis titulum erigitur . n. xlii.

Marius Frangipani Senator Urbis Benedictum in Capitolio alloquitur . n. xxx.

Mausoleum Benedicti XIII. n. xcii.

Michael Fridericus Cardinalis ab Althan . n. lvi. lvii. & lviii.

Mondillus Ursinus Archiepiscopus Capuanus . n. lxxii.

Montes erecti aut aucti pro reparatione Ecclesiarum, & pro frumento Beneventi . n. xi.

Montis Libani Christifidelibus Benedictus consulit . n. lxi.

Nico-

N

Nicolaus Coscia Cardinalis .
n. xln. Coadjutor in Archiepiscopatu Beneventano . n. lvi.

Nicolaus de Iudice Cardinalis .
n. xln.

Nicolaus Maria Mercarius a Secretis Regiminis , mox Cardinalis . n. li. Alia n. lxxiv. xci. & xcii.

Nicolaus III. Ursinus . n. xlix.

O

Ordo & benignitas Benedicti in audiendis singulis .
n. xxi.

Osien. ac Velit. Episcopatus . n. xv.

P

Pallii traditionem Archiepiscopis in Urbe præsentibus Benedictus sibi reservat . num. xxviii.

Palutius Cardinalis de Alteriis .
n. iii. & iv.

Parma & Placentia . n. xli. & lxxix.

Parochiales Ecclesiæ a pensionibus immunes . n. xxvi.

Patriarcharum privilegium . n. xxii.

Pax inita anno Jubilæi . n. xli.

Pedemontanis Ecclesiis Benedictus consulit . n. lx.

S. Peregrinus Laticus . n. liv.

Petri Francisci nomen Benedicto XIII. in Baptismate imponitur , n. i.

B. Petrus Forierius . n. lxxvi.

Petrus Marcellinus Cardinalis

Corradinus . n. xxxviii. & lxxxiv.

Petrus Cardinalis Othobonus . n. xxxiv. xlvii. & xci.

D. Philippi Neri ope Cardinalis Ursinus inter ruinas Terræ motus servatur . n. vii. Ejus cultus ab eodem Romano Pontifice augetur . n. xl. Ecclesia constructa & dicata Beneventi . n. lvi.

Philippus V. Hispaniarum Rex .
n. xli.

Philippus Ursinus . n. xxx. in Cardinalem Ordinis Prædicatorum beneficia confert . n. xxxiii.

Pompejus Sarnellus Abbas Collegii S. Spiritus , & Cardinalis Urfini Auditor . n. ix.

Pons Curvus civitas Episcopalis .
n. xlii.

Portuensis Episcopatus iustratur a Cardinali Urfino Episcopo .
n. xv.

Præbenda Theologalis & Pœnitentialis . n. xxxix.

Prædicatorum Ordo pro restituendo Templo , & Cœnobio Beneventi magna pecuniæ vi a Cardinali Urfino donatur . n. x. Alia ejus in hunc Ordinem beneficia . n. xvi. Protectionem Ordinis Benedictus suscipit . n. li. Privilegia confirmat & auget . n. lxx.

Præfecti Palatio jurisdictio . num. lxxv.

Præfectura Sacræ Congregationis Cardinalium Concilii Tridentini Interpretum . n. iv.

Pri-

Privernum civitas Episcopalis :
n. XLII.
Professio solennis Fratris Vincentii Mariæ Ursini in Ordine Prædicatorum . n. n.
Promotor Fiscalis pro omnibus Curis Ecclesiasticis Romæ a Benedicto statuitur . n. XXV.
Prosper Lambertinius Cardinalis . n. LXXXIV.
Prosper Marefusus Benedicti Auditor, Cardinalis . n. XXXIII.
Urbis Vicarius . n. LI.
Provincia Romana . n. XXXII.

Q

Quarta funerum portio .
n. XXXIX.

R

Raphael Cosmus de Hieronymis . n. L.
Rationes impensarum in pias causas a Cardinali Ursino Archiepiscopo Beneventi . n. XIII.
Reipublicæ Christianæ bona sub Benedicto . n. LXXXV.
Rizzardus Isolanus Beneventi Gubernator . n. LVI.
Romani discessum Pontificis dolent . n. LXXII.
Roncilionis civitatis jus datum . n. LXV.

S

Salernitanus Archiepiscopus . n. IV.
Sebastianus Tanarius Episcopus Ostien. & Velit. n. XV.

Secessus ad Montem Marium .
n. LXXXVII.
Seminaria Clericorum . n. XXXIX.
Vaticani Seminarii Aedes . n. XC.
B. Serapionis cultus . n. LXIII.
Sermones Mariani . n. VI. de purificatione Animarum . n. XVII.
Servorum B. Mariæ Cœnobium Beneventi ope Cardinalis Ursini absolutum . n. X.
Setia civitas Episcopalis . n. XLII.
Siciliæ Regi jus Apostolicæ Legationis a Benedicto redditur ; contractum tamen ac moderatum . n. LXIV.
Sinarum Imperatoris epistolas & dona Benedictus recipit . n. LXIX.
Sipontinus Archiepiscopus , & gesta ibidem a Cardinali Ursino Archiepiscopo . n. IV.
Societatis Jesu Presbyteros in Templi ac Collegii ædificatione Beneventi Cardinalis Ursinus ære juvat . n. X.
Alia illis Romæ indulget . n. LV.
S. Sophiæ Templum ac Monasterium Beneventi . n. XII.
Spolia Episcoporum ab Innocentio XII. Cathedralibus Ecclesiis Regni Neapolitani remittuntur . n. VIII.
Declaratio Benedicti XIII. de eadem re . n. XX.
S. Stanislaus Kostka . n. LIV.
Stipendia a Benedicto XIII. constituta Præsulibus Curie Romanæ . n. XIX.
Synodi Beneventi habitæ ab Archiepiscopo Ursino . n. VI.
Synodicon Diocæsanum S. Beneventanæ Ecclesiæ . n. VI.
Aliud Provinciale . n. XVII.

D. Tho-

T

D. **T**homæ doctrina de gratia
a Benedicto laudatur.
n. LXVI.

Fr. Thomas Ripoll Magister Ge-
neralis Ordinis Prædicatorum.
n. xc. & xcii.

S. Toribius Magrovegius . n. LIV.
Tumultus aliquis in Urbe . num.
LXXXI.

Tusculi gesta a Cardinali Ursino
Episcopo . n. xv.

V

Vaticanæ Basilicæ Altaria
consecrata . n. LV. Fons re-
generationis humanæ restau-
ratus . *Ibidem* . Mensa Capituli
ære alieno liberatur . n. LXV. &
xc. Canonici memores & grati.
Ibidem .

Veftigalia a Benedicto XIII. sub-
ditis imminuta . num. xxiii. &
LXXXVI.

Venantius Philippus Pierfancî .
num. xci.

Vignanellum Benedictus profici-
fcitur . n. XLVI.

B. Vincentius a Paulo . n. LXXVI.

Vincentius Antonius Muscettola
Episcopus ordinatur . n. LXVIII.

Vincentii Mariæ nomen Petrus
Franciscus Ursinus in Ordine
Prædicatorum sibi sumit . n. i.

Vincentius Petra Cardinalis . n.
xxxiii. Vifitator Tribunalium
Urbis . n. XLVIII. & xci.

Vincentius Santinius Nuntius A-
postolicus in Polonia . n. LXVII.

Violantis Beatricis è Bavaria
pietas . n. xxxv. Aurea Rosa
donatur . num. LXI.

Viterbium Benedictus profici-
tur , & acta ibidem . n. LXI.

Vitulani Collegium Canonico-
rum . n. x.

Ultrajectini Pseudo-Archiepisco-
pi infelix exitus . n. XLIV.

Urbium Benedictus beneficiis
prosequitur . n. XLIII.

Ursina Gens . n. i. & XLVIII.

X

Xenodochium amentium
transfertur . n. LXV.

Xenodochium D. Bartholomæi
Beneventi . n. x.

Xenodochium D. Gallicani Ro-
mæ . n. xxxviii.

F I N I S

ERRATA

CORRIGE

<i>Pag.</i>	<i>lin.</i>		
28.	10.	retinuitque etiam	retinuitque morem etiam
	23. & 24.	instaurutum	instauratum
45.	12.	prodire	prodire
81.	10.	sui	ejus
114.	3.	reversum	reversurum
115.	21.	susciperent	suspicerent
137.	2.	illatum	illatus



005664955

Continued on Page 10

